

DIZRA' CHAWE' CA NACA CHEE JESUCRISTO

La benne' ca' gulaque' xra gula chee Cristo
(Lc. 3.23-38)

- 1** ¹Da caní zaj naca na la chee benne' zaj naque' xra wdé chee Jesucristo. Jesús nigá nababe' zri'ine zre sua David, ne zri'ine zre sua Abraham.
- ² Abraham nigá guque' xra Isaac.
Isaac nigá guque' xra Jacob.
Jacob nigá guque' xra Judá, ne benne' biche' ca'.
- ³ Judá nigá guque' xra Fares, ne Zara, na' Tamar guque' xrna Fares, ne Zara caní.
Fares nigá guque' xra Esrom.
Esrom nigá guque' xra Aram.
- ⁴ Aram nigá guque' xra Aminadab.
Aminadab nigá guque' xra Naasón.
Naasón nigá guque' xra Salmón.
- ⁵ Salmón nigá guque' xra Booz, na' Rahab guque' xrna Booz nigá.
Booz nigá guque' xra Obed, na' Rut guque' xrna Obed nigá.
Obed nigá guque' xra Isaí.
- ⁶ Isaí nigá guque' xra David, benne' wenná bea.
Wenná bea David nigá, ne nu'ula na' nédxute guque' zru'ula Urías gulaque' xra xrna Salomón.
- ⁷ Salomón nigá guque' xra Roboam.
Roboam nigá guque' xra Abías.
Abías nigá guque' xra Asa.
- ⁸ Asa nigá guque' xra Josafat.
Josafat nigá guque' xra Joram.

Joram nigá guque' xra Uzías.

⁹ Uzías nigá guque' xra Jotam.

Jotam nigá guque' xra Acaz.

Acaz nigá guque' xra Ezequías.

¹⁰ Ezequías nigá guque' xra Manasés.

Manasés nigá guque' xra Amón

Amón nigá guque' xra Josías.

¹¹ Josías nigá guque' xra Jeconías ne benne' biche' ca' ca lu
zra ca' gate benne' Babilonia guleché'e benne' Israel ca'
lu xezr la xu Babilonia.

¹² Jeconías nigá guque' xra Salatiel.

Salatiel nigá guque' xra Zorobabel.

¹³ Zorobabel nigá guque' xra Abiud.

Abiud nigá guque' xra Eliaquim.

Eliaquim nigá guque' xra Azor.

¹⁴ Azor nigá guque' xra Sadoc.

Sadoc nigá guque' xra Aquim.

Aquim nigá guque' xra Eliud.

¹⁵ Eliud nigá guque' xra Eleazar.

Eleazar nigá guque' xra Matán.

Matán nigá guque' xra xetú benne' le' Jacob.

¹⁶ Jacob nigá guque' xra José, benne' chee María, xrna Jesús,
Bénnea' naque' Cristo.

¹⁷ Caní naca, gulaca chidá' cue' bènneache gate guzú lau
zua Abraham, ca bzrinte zra zua David, na' gulaca xechidá'
cue' bènneache ca' gate guzú lau zua David, ca bzrinte zra gate
na' benne' Babilonia ca' guleché'e benne' Israel ca' lu xezr la xu
chee', na' gulaca xechidá' cue' bènneache ca' gate guzú lau zra
na', ca bzrinte zra gulaj Cristo.

Ca guca gate gulaj Cristo

(Lc. 2.1-7)

¹⁸ Caní guca gate na' gulaj Jesucristo. María, xrna Jesús ba
nachébebe' gácabe' zru'ula José. Nédxula ca za xelenite', nu'ula
nigá ba zue' zi'i ne chee xel-la' waca chee Be' Lá'azxa chee
Dios. ¹⁹ José, benne' chee María nigá, naque' benne' xrlátaje.
Quebe guca lazre' gul'éene' ca ba naca chee María lau benne'
xezre ca'. Guca lazre' gusané' le' bagácheze. ²⁰ Dxácate dxudé
lazre' da nigá, ble'e lau tu gubáz chee xabáa, gubáz chee
Xránadxu, ga zua José na' lu bchigala, na' guzre' le':

—José, zri'line zre sua David, quebe zrebu' si' lu na'u María chee gácabe' zru'ulu', lawe' da bidu biu na' sanbe' zabe' ne chee Be' Lá'azxa chee Dios. ²¹Zrú'ulu' gúxrube' tu bidu biu cheebe', na' lue' gu'u labe' Jesús. Caní gu'u labe' lawe' da guselabe' bénneache lu dul-la da zaj nabague'.

²²Xúgute da caní gulaca ca' chee guca ca da gunná Xránadxu lu dxu'a benne' ca' buluchálaje' waláz chee'. ²³Caní gunné':

Tu nú'uladau' gúadaube' sanbe' tu bidu biu cheebe', na' xelu'e labe' Emanuel.

Emanuel zéaje na: Dios zúalene' dxi'u.

²⁴Ca bebán José, na' bene' cáteze gunná gubáz chee Xránadxu, na' guzí' lu ne'e María chee gácabe' zru'ule'.

²⁵Quebe gulaque' tuze ca gusandxa María bidu biu nedxu cheebe', na' buluzúe' labe' Jesús.

Dxeleznín benne' sina ca' lu xezre Jerusalén

2 ¹Bidau' Jesús gúlajbe' lu xezre Belén da nababa xezr la xu Judea gate dxenná bea benne' le' Herodes ga na'. Nadxa beleznín benne' ca' lu xezre Jerusalén, benne' zá'aque' chalá'a naga dxalaj gubizra, zaj naque' benne' sina gula. ²Na' gulenabe':

—¿Ga zua bidu na' ba gúlajbe' chee gácabe' benne' nna bé'ene' benne' judío ca'? Gate zuantu' chalá'a naga dxalaj gubizra blé'entu' belaj cheebe', na' bla'ntu' nigá chee gúe lá'ana gúe szrentu'-be'.

³Ca guneze Herodes, benne' wenná bea, da nigá, na' guzúe' stebe, ne cá'anqueze guca chee xúgute benne' zaj zre'e Jerusalén. ⁴Nadxa Herodes, wenná bea na', btupe' xúgute benne' xíchaje chee bxruze ca', ne benne' dxuluxuzájle'e da nadxixruj bea Dios, na' gunábene' benne' ca':

—¿Gazra na' galaj Cristo?

⁵Benne' caní gulé'e le':

—Lu xezre Belén da nababa xezr la xu Judea, lawe' da bzuaj caní tu benne' bchálaje' waláz chee Dios, gate na' gunné':

⁶Lue', Belén chee xezre ca' zaj nababa na Judá, nacu' lue' xezre da quebe naca na da bzébedxa ládujla benne' ca' dxelenná be'ene' xezr la xu Judá nigá, lawe' da ládujla bénneache chiu' dxuaj tu benne' nna be'e, na' guxúequeze' bénneache chia', benne' Israel.

⁷Nadxa Herodes, wenná bea na', bláwizre' bagácheze benne' sina gula ca', na' gunábene' le' bátala ble'e lau belaj na' belelé'ene'. ⁸Nadxa gusel-le' benne' ca' chjaque' xezre Belén, ne guzre' le':

—Le chjaca na', ne le naba xanne' chee bidu na', na' ca cheajxrácale-be', na' le guzén neda' chee cha'a neda' gúe lá'ana gúe szrena'-be'.

⁹Ca bexuzre belén benne' sina gula ca da gunná Herodes, wenná bea, nadxa besiá'que', na' belaj da belelé'ene' gate zaj zre'e chalá'a naga dxalaj gubizra zeaj na lau le', na' bzrinte na, ne guzúa na naga zua bidu na'. ¹⁰Gate benne' sina gula ca' belelé'ene' belaj na', nadxa gulebé'ene'. ¹¹Ca gulu'e lu xu'u, belelé'ene' bidu na', ne xrnabe' María. Nadxa buluzú zribe' dxelúe lá'ana dxelúe szrene' bidu na'. Nadxa gulesálaje' xua chee' ca', ne bulunézruje'-be' oro, ne xalaj zixre, ne mirra da naca na zichaj. ¹²Ca gudé na', Dios guzre' benne' ca' lu bchigala québedxa xelexedé' naga zua Herodes. Chee le na belexequé'e neza xula, belexezrine' lazrie'.

Ca guca beleché'e Jesús lu xezr la xu Egipto

¹³Ca gudé besi'aca benne' sina gula ca', nadxa tu gubáz chee xabáa, gubáz chee Xránadxu ble'e lawe' José lu bchigala, na' guzre' le':

—Guxasa. Becá'a bidu na', ne xrnabe', na' le chjaca lu xezr la xu Egipto, na' xegá'anu' ga na' ca zrindxa zra xapa' lue' xetú. Caní dxal-la' gunu' lawe' da wexilaj Herodes bidu nigá chee gutie'-be'.

¹⁴Nadxa José guxase', na' chizrélala beche'e bidu na', ne xrnabe', na' bexu'e-be' lu xezr la xu Egipto. ¹⁵Gulezré'e na' ca bzrindxa zra gute Herodes. Caní guca ca naca da gunná Xránadxu lu dxu'a benne' bchálaje' waláz chee', gunné':
“Xuláwizra' bi biu chia' chee xedxúajbe' lu xezr la xu Egipto.”

Dxenná be'e Herodes benne' ca' xelútie' bidu biu ca'

¹⁶Gate gúquebe'e Herodes gulezí xé benne' sina ca' le', na' bzrá'ale'e, ne gunná bé'ene' benne' ca' xelútie' xúgute bi biu dx'énedau', ca zrinte bidu ca' ba zaj zua chup iza, bidu ca' zaj zrabe' xezre Belén, ne bidu ca' zaj zrabe' lu xézredu ca' zaj naxechaj na xezre Belén na'. Caní ben Herodes cáteze buluzén benne' sina gula ca' le' ca naca zra na' belelé'ene' belaj na'.

¹⁷Ca'an guca ca da bzuaj Jeremías, bénnea' bchálaje' waláz chee Dios ba guca zan' iza, gunné':

¹⁸Guca tu schaga lu xezre Ramá.

Guca webezre, ne gulebezre xache'.

Raquel na' dxebézrele'e chee bi chee' ca'.

Québequeze dxaca lazre' xexaca zrene'

lawe' da ba gulate bi chee' ca'.

¹⁹Ca gudé gute Herodes, na' tu gubáz chee xabáa, gubáz chee Xránadxu ble'e lawe' José lu bchigala naga zue' Egipto, na' guzre' le':

²⁰—Guxásache. Beche'e bidu chiu' nigá, ne xrnabe'. Bexíaj lu xezr la xu Israel, lawe' da ba gulate benne' ca' gulaca lazre' xelútie' bidu nigá.

²¹Nadxa guxasa José, na' beche'e bidu na', ne xrnabe', na' belexezrine' lu xezr la xu Israel. ²²Ca guneze José dxenná bea Arquelao naga nababa Judea waláz chee xre', Herodes na', na' bzrebe José xexíaje' ga na'. Nadxa bexíaje' naga nababa Galilea ca da ba guzre gubáz chee xabáa le' lu bchigala. ²³Ca bezrine' na', na' bexíaje' cheajxezúe' lu xezre Nazaret. Caní guca ca da gulenná benne' ca' buluchálaje' waláz chee Dios, gulenné' Jesús nigá si le' benne' Nazaret.

Juan dxegu'e lban le'e xixre' lawe' lataj

(Mr. 1.1-8; Lc. 3.1-9, 15-17; Jn. 1.19-28)

3 ¹Ca lu zra ca' bla' Juan, bénnea' bchue' bénneache nisa, dxegu'e lban le'e xixre' lawe' lataj naga nababa Judea.

²Dxenné':

—Le xebí'i lazre' lawe' da ba zua gáguzze zra nna bea Dios lu xezr la xu nigá.

³Juan nigá naque' bénnea' bchalaj Isaías chee'. Isaías bchálaje' waláz chee Dios gate bzuaje' caní:

Dxene chi'i benne' dxebezre xe'e le'e xixre' lawe' lataj, dxenné':

Le gucá'ana chawe' neza naga te Xránadxu.

Le xulí neza lase ca' lau Le' naga tée'.

⁴Zra lana Juan nigá nune na xicha zra camello, ne bazxu dxu'a le'e chee' naca na xide, na' dxawe' biche xuaj, ne bzrína'dau' chee bézudau'. ⁵Belezcín benne' belenne' ca da dxuchalaj Juan, benne' zá'aque' xezre Jerusalén, ne benne' chee xúgute xezre ca' zaj nababa Judea, ne benne' zá'aque'

xézredu ca' zaj nnita gáguze xegu Jordán. ⁶Ca gulexrúalepe' dul-la chee', Juan nigá bchue' benne' ca' nisa lu xegu Jordán.

⁷Gate ble'e Juan benne' zan benne' xudau' fariseo, ne benne' xudau' saduceo zá'aque' chee' xelexedxúe' nisa, na' guzre' benne' ca':

—Le'e, be snia. ¿Zua nu guzre le'e guzrúnajle da ba xa' da za'?

⁸Le gun da xrlátaje da xelunna bea na ba bebí'i lázrele. ⁹Quebe guéquele lale, dxennale le'eze: “Nalatu' lawe' da nácantu' xrtia Abraham.” Neda' dxapa' le'e: Dios waca xexune' xiaj caní zri'ine xrtia Abraham. ¹⁰Le'e nácale ca xaga ca'. Xia waga bache nalá na chee chugu na xaga ca', na' xúgute xaga ca' quebe dxelebía na da zixre chawe' welechugue na, na' xelexze na lu xi'. ¹¹Da li neda' dxuchúa' le'e nisa, da dxunna bea na ba bebí'i lázrele, san Bénnea' ze'e ca te chia' neda', Le' guné' ca da zéaje xel-la' dxedxúa nisa, guzúe' le'e Dios Be' Lá'azxa, ne xi' chee'. Benne' nigá nácaxé' blau ca neda', na' quebe zaca' cuéajza' zrele' xu'u ni'e. ¹²Cá'anqueze nácale ca zrua' xtila. Benne' nigá ba nu'e da dxun be', cuéaje' xrte zrua' xtila na', na' xebéaje' chalá'ala xizre chee na, na' xuzrá chawe' zrua' xtila na' lu da'a chee na, san guzezxe' xizre na' lu xi' da quebe xexula na.

Da guca gate gudxúa Jesús nisa

(Mr. 1.9-11; Lc. 3.21-22)

¹³Nadxa Jesús bezé'e naga nababa Galilea, na' bezrine' dxu'a xegu Jordán naga zua Juan chee' guchúe' Le' nisa.

¹⁴Nédxute Juan quebe guca lazre', na' dxe'e Jesús:

—Lue' dxal-la' guchú'u neda' nisa. Quebe zaca' neda' guchúa' Lue' nisa.

¹⁵Jesús guzre' le':

—Be' lataj gaca caní na'a. Dxun na ba xen gundxu xúgute da xrlátaje lau Dios.

Nadxa Juan bene' ca'. ¹⁶Gate bexuzre gudxúa Jesús nisa, na' la bxálajte xabáa, na' ble'e Juan Be' Lá'azxa chee' Dios dxétaje' ca tu gugu chíchidau', zeajsúaba' lawe Jesús. ¹⁷Nadxa ben tu chí'i lu be', gunné':

—Benne' nigá naque' Zrí'inequeza' nazrí'ite lazra'. Dhezaca ba lázrele' Le'.

Dxaca lazre' da xriwe' gun na бага Jesús zria

(Mr. 1.12-13; Lc. 4.1-13)

4 ¹Nadxa Be' Lá'azxa chee' Dios la guché'te' Jesús le'e xixre' lawe' lataj naga gúe lazre' da xriwe' gun zréaje na Le'.

²Quebe bi gudagu Jesús chua zra chua xēla, na' ca gudé na' gudunē'. ³Nadxa da xriwē' bzin na naga zua Jesús chee gun zréaje na Le', na' dxē na Le':

—Che Lue' nacu' Zri'ine Dios, gunná be'e xiaj caní xelexaca na xeta xtila.

⁴Jesús bechebe':

—Lu xiche chee Dios dxenné': “Quebe gaca ban nu benne' gawē' xétaze, san nen xúgute dizra' chee Dios gaca bane'.”

⁵Nadxa da xriwē' guché na Jesús lu xezre lá'azxa Jerusalén, na' bzua na Le' xíchajte xudau', ⁶na' guzre na Le':

—Che Lue' nacu' Zri'ine Dios, guxrite' nigá, lawe' da dxenná lu xiche chee Dios:

Dios nna bé'ene' gubáz chee xabáa chee' ca'
chee xelácalene' Lue'.

Welexechise' Lue' nen ne'e

chee quebe gunu' zi' ni'u lu xiaj ca'.

⁷Na' gunná Jesús:

—Cá'anqueze dxenná lu xiche chee Dios, dxē'e bēnneache: “Quebe guchínenu' Xranu' Dios cáteze dxaca lazru'.”

⁸Nadxa da xriwē' guché na Le' tu lu xi'a sibe, na' ble'e na Le' ca naca xúgute cue' xezr la xu zaj nnita lu xezr la xu, ne ca naca xel-la' guni'a chee na. ⁹Na' gunná da xriwē', dxē na Le':

—Xúgute da caní gunna' chiu' che guzú zribu' gucá'ana szrenu' neda'.

¹⁰Nadxa Jesús guzre' na:

—Bexíaj, da xriwē', lawe' da dxenná Dios lu xiche chee', dxē'e bēnneache: “Bca'ana szren Xranu' Dios, ne be lá'ana tuze Le'.”

¹¹Nadxa da xriwē' becuasa na lau Jesús, na' belezrín gubáz chee xabáa chee Dios, ne bulunézruje' da dxechine Jesús.

Dxuzú lau Jesús dxuchálaje' xrtizra' Dios naga nababa Galilea (Mr. 1.14-15; Lc. 4.14-15)

¹²Gate ben Jesús xu'u Juan lizre xia, na' bezé'e zexíaje' naga nababa Galilea. ¹³Quebe bga'ana Jesús xezre Nazaret. Xeajsúe' lu xezre Capernaum da zua na dxu'a nísadau' naga zaj zra' xrtia Zabulón, ne xrtia Neftalí. ¹⁴Caní guca ca da bzuaj Isaías, benne' bchálaje' waláz chee Dios, gunné':

¹⁵Lu xezr la xu chee Zabulón, ne chee Neftalí,
naga zrua neza da zeaj na dxu'a nísadau',

chalá'a naga dxalaj gubizra xechalá'a xegu Jordán.
Naga nababa Galilea,
naga zaj zra' benne' quebe zaj naque' judío.

¹⁶Bénneache zaj zra' lu da chul-la belelé'ene' tu da
dxusaníle'e na,
na' benne' zaj zra' naga xu'u zrul-la chee xel-la' gute
ba bsaní' tu xi' naga zaj zre'e.

¹⁷Ca lu zra na' guzú lau Jesús dxegu'e lban, dxenné':

—Le xebí'i lázrele, lawe' da ba zua gáguze zra nna bea Dios
lu xezr la xu nigá.

Jesús dxuláwizre' tapa benne' wezén bela

(Mr. 1.16-20; Lc. 5.1-11)

¹⁸Gate na' zeaj Jesús dxu'a nísadau' ga nababa Galilea, na'
blé'ene' chupa benne'. Tue' le' Simón, ne zua xetú le' Pedro,
na' xetúe' le' Andrés, biche Simón na'. Benne' caní zaj naque'
benne' wezén bela, na' dxuluzale' xixruj bela chee' lu nisa.

¹⁹Nadxa Jesús dxe'e benne' caní:

—Le gun neda' tuze, na' guna' le'e benne' gutúpale chia'
bénneache ca dxunle dxezenle bela.

²⁰La bulucá'anate' xixruj chee' ca', na' zjácálene' Jesús.

²¹Xelátédauze gusá'aque', na' ble'e Jesús xechupa benne'.
Tue' le' Jacobo, ne xetúe' le' Juan, biche Jacobo nigá. Zaj
naque' zri'ine Zebedeo, ne zaj xu'e tu lu da dxedá lawe'
nísadau' nen xre', dxelexún chawe' xixruj chee'. Jesús bláwizre'
le', ²²na' la bulucá'anate' da dxedá lawe' nísadau' na', ne xre',
na' zjácálene' Jesús.

Jesús dxusédené' bénneache naga nababa Galilea

(Lc. 6.17-19)

²³Zeaj Jesús xúgute xezre zaj nababa Galilea, na' tu tu xezre
ca' dxuzéajni'ine' bénneache lu xu'u ca' naga dxulucá'ana
szren benne' judío ca' Dios. Na' dxegu'e lban ca nna bea Dios,
ne dxexune' xúgute benne' ca' ca zaj naca xízrawe' cha chee'.

²⁴Ca'an guca, xúgute benne' chee xezr la xu Siria belenne'
ca da dxun Jesús, na' belezrine' lau Jesús, zaj naché'e benne'
we' ca', benne' zaj xu'e xízrawe', ne benne' zaj zue' lu xel-la'
dxudía, ne benne' zaj xu'e be' xriwe', ne benne' zaj xu'e chuna',
ne benne' zaj naxrú'unié' bine, na' bexún Jesús xúgute benne'
caní. ²⁵Zjácále benne' zan Le', benne' zaj nababe' xezre ca'

zaj nababa Galilea, ne benne' zá'aque' xezre Decápolis ca', ne benne' Jerusalén, ne benne' zaj nababe' xezre ca' zaj nababa Judea, ne benne' zá'aque' xechalá'ala xegu Jordán naga dxalaj gubizra.

Lban da bchalaj Jesús tu lu xi'a

5 ¹Gate ble'e Jesús xúgute benne' zan ca' zá'aque' naga zué', nadxa guluéne' tu lu xi'a, ne gudxé'e na'. Nadxa benne' ca' dxusede Jesús beledube' cuité'. ²Nadxa guzú lau Jesús dxusédene' benne' ca'.

Nu benne' naca chee' tu da ba neza

(Lc. 6.20-23)

³Gunná Jesús:

—Da ba neza zrente naca na chee benne' ca' dxelexúnbe'e ca naca xel-la' dxexazrje chee' lau Dios. Benne' caní zaj naca chee' xelexú'e naga dxenná bea Dios xabáa.

⁴Da ba neza zrente naca na chee benne' ca' dxelelé'ele' zaj zué' lu da baxache' lawe' da zaj nabague' dul-la. Dios dxexúe zrene' benne' caní.

⁵Da ba neza zrente naca na chee benne' zaj naque' zren lazre'. Benne' caní xelezí'e chee' xezr la xu da nachebe lazre' Dios gunézruje' benne' caní.

⁶Da ba neza zrente naca na chee benne' du lazre' dxelaca lazre' xelune' da naca xrlátaje lau Dios. Dios gácalene' benne' caní.

⁷Da ba neza zrente naca na chee benne' dxelexexache lazre' benne' xula. Dios wexache lazre' benne' caní.

⁸Da ba neza zrente naca na chee benne' ca' zaj xu'u xichaj lázrdawe' da xrlátaje. Benne' caní welelé'ene' Dios.

⁹Da ba neza zrente naca na chee benne' dxelebeza zri lazre' nen bénneache. Dios guzúe' le' ca bi cheéqueze'.

¹⁰Da ba neza zrente naca na chee benne' dxeledé'e xel-la' zi' lu na' benne' ca' dxelune' chee' da calēla cate' dxelune' da xrlátaje. Benne' caní zaj naca chee' xelexú'e naga dxenná bea Dios xabáa.

¹¹Da ba neza zrente naca na chee le'e che benne' dxelenné' schanni' chee, ne dxelune' chee da calēla, ne dxelenné' chee xúgute dizra' wen lazre' lawe' da nácale chia' neda'. ¹²Le be, ne le xezaca ba lázrele lawe' da wazile

tu da zrente da gunna Dios le'e xabáa. Caní gaca na lawe' da cá'anqueze caní guláu zi' xuzre' benne' ca' buluchálaje' waláz chee Dios, benne' ca' gulezré'e nédxudxa ca le'e.

Nácale ca zede', ne ca tu xi' lu xezr la xu

(Mr. 9.50; Lc. 14.34-35)

¹³Na' gunná Jesús:

—Le'e nácale ca zede' chee bènneache lu xezr la xu nigá. Che zede' nigá xenite xel-la' sna'a chee na, ¿ájazra gácalele bènneache ca'? Québedxa gaca guchínedxu zede' caní. ¡Chú'unadxu na, na' xululéaj bènneache le na!

¹⁴Le'e nácale ca tu xi' chee bènneache zaj zre'e xezr la xu. Tu xezre da zua na tu lu xi'a, quebe gáchequeze na. ¹⁵Gate guzálajdxu tu xi', quebe gudúsedxu na. Guzúadxu na sibe naga gusení na chee xeledé'e xúgute benne' zaj zre'e lu xu'u. ¹⁶Cá'anqueze le gun le'e. Le güe lataj gusení xi' da nácale lau bènneache ca' chee xeledé'ene' ca da xrlátaje da dxunle. Nadxa xelúe lán'ane' Xrale Dios zue' xabáa.

Da bchalaj Jesús ca naca chee da nadxixruj bea Dios

¹⁷Gunná Jesús:

—Quebe dxal-la' guéquele le'e za'a neda' chee cua' ca naca da bdxixruj be'e Moisés, ne ca naca dizra' da buluchalaj benne' ca' buluchálaje' waláz chee Dios. Quebe za'a chee cua' na. Za'a chee gulé'eda' cáteze zéaje na. ¹⁸Da li dxapa' le'e. Dxácate zaj zua xabáa, ne xezr la xu nigá, quebe dúaqueze tu dizra', ne tu da da' lu da nadxixruj bea na nigá ca zrindxa zra gaca xúgute ca da dxal-la' gaca na. ¹⁹Chee le na', che tu benne' guzúe' chalá'ala bítetezla da nigá da bdxixruj bea Dios, láqueze naca na tu da dauze, ne che guzéajni'ine' bènneache chee xelúnqueze' ca', benne' nigá xegá'ane' cá'aze naga dxenná bea Dios xabáa. Bénnea' guzúe' dizra' da nadxixruj bea nigá, ne gulé'ene' bènneache chee xelúnqueze' ca', benne' nigá wegá'anaqueze' ba lán'ana naga dxenná bea Dios xabáa. ²⁰Dxapa' le'e, che quebe gunle da nácadxa xrlátaje ca da dxelún benne' ca' dxuluxuzájle'e da nadxixruj bea Dios, ne ca da dxelún benne' xudau' fariseo ca', cabata' xexú'ule le'e naga dxenná bea Dios xabáa.

Da bchalaj Jesús ca naca chee xel-la' dxezrá'a

(Lc. 12.57-59)

²¹Na' gunná Jesús:

—Le'e ba bénele ca gulenná xrtíale gula ca: “Quebe gútele benne',” na' “Núteteze benne' gutie' benne' waxíaje' chee cuía xi'e.” ²²Neda' dxapa' le'e, núteteze benne' dxezré'e le sa' ljwezre' waxíaje' chee cuía xi'e. Na' bénnea' dxenné' schanni' chee le sa' ljwezre' waxíaje' lau benne' chee xu'u lawe' blau, na' xuludé' le' chee cuía xi'e. Bénnea' dxenné' chee le sa' ljwezre' tu dizra' sban, benne' nigá nácaqueze chee' chéaje' lu lataj ba xa'.

²³Che gu'u lu xudau' tu da gunézruju' lau Dios, ne na' cheajsá lazru' chee tu da nunu' chee le sa' ljwezru', ²⁴bca'ana da na' gunézruju' na', teca xexíaju' xegá'anu' chawe' nen le sa' ljwezru'. Nadxa waca xexíaju' lu xudau' chee bi gunézruju' lau Dios.

²⁵Che zua nu benne' dxebagu' chee', na' che'e lue' lau benne' guchi'e chiu', bexaca chawe' nen le' la neza na', chee quebe gudé'e lue' lau bénnea' dxuchi'e da dxaca. Che quebe gunu' caní, nadxa benne' dxuchi'e da dxaca na' gudé'e lue' lu na' benne' dxusézxujé' bénne' ca' lizre xia, na' xelegú'e lue' lizre xia na'. ²⁶Da li dxapa' lue'. Quebe xedxúaju' na' che quebe quízruju' xúgute da dxebagu' chee benne' na'.

Da bchalaj Jesús ca naca chee benne' dxíchaje' xrba chee xel-la' nuchaga na'

²⁷Na' gunná Jesús:

—Le'e bache bénquezle ca gulenné' nédxute: “Quebe gunu' dul-la da dxichaj na xrba chee xel-la' nuchaga na'.” ²⁸Neda' dxapa' le'e, núteteze benne' ne'e tu nu'ula, ne sa lazre' le', báchequeze bene' dul-la nen nu'ula na' lu xichaj lázrdawe'.

²⁹Che xiaj lau' da zua xabēla dxuzúa na lue' lu dul-la, guleaj na, ne gudxú'una na zítu'la. Nácadxa chawe' nite late' da naca na chee bel-la' dxen chiu' quézcala chu'u lataj ba xa' dutē bel-la' dxen chiu'. ³⁰Che na'u da zua xabēla chiu' dxuzúa na lue' lu dul-la, guchugu na, ne gudxú'una na zitu'. Nácadxa chawe' nite late' da naca na chee bel-la' dxen chiu', quézcala chu'u lataj ba xa' dutē bel-la' dxen chiu'.

Jesús dxusédené' ca naca chee benne' dxexelé'e nen zru'ule'
(Mt. 19.9; Mr. 10.11-12; Lc. 16.18)

³¹Na' gunná Jesús:

—Cá'anqueze gulenné' nédxute: “Núteteze benne' dxexelé'e nen zru'ule', dxal-la' gunézruje' nu'ula na' tu xiche da dxul'é

na belexelé'ē.” ³²Neda' dxapa' le'e, che tu benne' dxexelé'ē nen zru'ule', na' nu'ula nigá quebe guzúalēne' benne' xula, benne' chee nu'ula nigá dxuzúe' le' lu dul-la chee da dxichaj na xrba chee xel-la' nuchaga na' che tu benne' biu xula guchaga ne'ē nen nu'ula na' bsan benne' chee' le'. Cá'anqueze le' dxune' dul-la nen nu'ula na'.

Jesús dxusédenē' ca naca chee benne' dxucá'ana liē' xrtizre'

³³Na' gunná Jesús:

—Cá'anqueze ba bénele ca gulenná benne' gula ca', gulenné': “Quebe gucá'anu' cá'aze ca da nachebe lazru' nen dizra' bca'ana liu' lau Xránadxu Dios.” ³⁴Neda' dxapa' le'e: Quebe dxal-la' guzétjale xabáa chee guca'ana lile dizra' chee, lawe' da naca na naga dxe' Dios, ³⁵ne quebe guzétjale xezr la xu nigá lawe' da naca na naga nuzúa Dios ni'ē, ne quebe guzétjale Jerusalén lawe' da naca na xezre chee Benne' Blau naque' Wenná Bea. ³⁶Quebe guzétjale xíchajle chee guca'ana lile dizra' chee lawe' da quebe séquele gunle da chiche, ne da gasaj netú xicha xíchajle. ³⁷Le nnaze: “Awe',” u le nnaze: “Cabí,” lawe' da gate tu benne' dxudadxē' chee' chee da nigá, naca na chee da xriwe'.

Dxul'ée Jesús ca naca chee nu benne' dxexebéaj lazre'

(Lc. 6.29-30)

³⁸Na' gunná Jesús:

—Le'e ba bénele ca da gulenné' nédxute: “Che tu benne' cuéaje' xiaj lau', cá'anqueze gunu' chee', ne che cuéaje' lazru', cá'anqueze gunu' chee'.” ³⁹Neda' dxapa' le'e, quebe tíl-lalēle nu benne', san che tu benne' gu'ē chalá'a xragu', be' lataj gu'ē xechalá'a xragu'. ⁴⁰Che tu benne' gaca xúzre'lēne' lue', ne dxaca lazre' cue' zrau', be' lataj xúate' xicha chiu'. ⁴¹Che dxulusebáguē' lue' gu'u xua chee' tu cuéndau', bia na chupa cuenla. ⁴²Che núteteze benne' bi dxenabe' chiu', bnézruje' na, ne quebe guzagu' ca gunézruju' chee nu benne' bi dxenabe' chite.

Jesús dxusédenē' ca dxal-la' zri'idxu benne' ca' dxeledábague'
dxu'u

(Lc. 6.27-28, 32-36)

⁴³Na' gunná Jesús:

—Cá'anqueze ba bénele ca da gulenné' nédxute: “Bzri'i le sa' ljwezru', ne gucuide benne' dxedábage' lue'.” ⁴⁴Neda' dxapa' le'e, le zri'i benne' ca' dxeledábage' le'e. Le naba gaca chawe' chee benne' dxelenné' chee. Le gun da chawe' chee benne' dxelecuídené' le'e. Le naba lau Dios gaca chawe' chee benne' dxelenné' schanni' chee ne dxeluné' chee da calela. ⁴⁵Che gunle caní gácale bi cheéqueze Xrale zue' xabáa, lawe' da dxun Le' dxusaní' gubizra naga zaj zra' benne' wen da calela ne naga zaj zra' benne' xrlátaje ca', ne dxusel-la' nisa xiuj lu xezr la xu chee benne' chawe' ca', ne lu xezr la xu chee benne' ca' dxeluné' da calela. ⁴⁶Che nazrí'ile tuze benne' zaj nazrí'ine' le'e, ¿ájazra na' dxezá lázrele quizruj Dios le'e? Cá'anqueze dxelún benne' wechizruj ca', zaj nazrí'ine' le sa' ljwezre'. ⁴⁷Che le'e dxugápale diuzre tuze le sa' ljwézrele, ¿bizra da xrlátaje dxunle? Cá'anqueze dxelún benne' quebe zaj núnbe'e Dios. ⁴⁸Le gaca benne' xrlátaje cáteze naca Xrale zue' xabáa, naque' xrlátaje.

Dxul'é Jesús ca naca da xrlátaje da dxelún bénneache

6 ¹Caní gunná Jesús:
—Le guxúe xanne' cuínale chee quebe gunle da naca chee xel-la' benne' xudau' chee lau bénneache chee xelélé'ene' na. Che ca'an dxunle, na' Xrale Dios zue' xabáa québequeze bi gunné' le'e. ²Chee le na', gate lue' dxácalenu' benne' dxelexázejene', quebe guzennu' xúgute bénneache ca da dxunu', ca dxelún benne' ca' dxeluné' xrlátaje cúzreze la neza, ne lu xu'u naga dxulucá'ana szren benne' judío ca' Dios. Dxeluné' da caní chee xelenné bénneache xrlátaje chee'. Da li dxapa' le'e, ba déqueze lazruj chee'. ³Gate lue' gunézruju' late' chee benne' dxelexázejene', ben na luéze chee quebe neze le sa' ljwezru'. ⁴Ben da caní bagácheze, na' Xrau' Dios, Bénnea' dxelélé'ene' ca da dxunu' bagácheze, Le' gunné' lazruj chiu'.

Jesús dxusédené' ca dxal-la' gundxu xel-la' dxuláwizra Dios (Lc. 11.2-4)

⁵Na' gunná Jesús:

—Gate le'e gunle xel-la' dxuláwizra Dios, quebe gunle ca dxelún benne' ca' dxeluné' xrlátaje cúzreze. Dxeledánene' dxeluné' xel-la' dxuláwizra Dios zaj zezé' lu xu'u naga dxulucá'ana szren benne' judío ca' Dios, ne la neza, chee

xelélé'e bēnneache da dxelunē'. Da li dxapa' le'e, ba déqueze lazruj cheē'. ⁶Gate lue' dxuláwizru' Dios, guxú'u lu xu'u chiu'. Bsezxuj dxa xu'u chiu', na' bláwizra Dios guchálajlenu' Xrau' Dios zúalēnē' lue' naga zu' tuzu'. Nadxa Xrau' Dios, Bēnnea' dxelé'ene' ca da dxunu' bagácheze, Le' xuzri'e chiu'.

⁷'Gate dxuláwizru' Dios dxuchálajlenu' Le', quebe tuz ca da nneu' zánetē lasa ca dxelún benne' ca' quebe zaj núnbe'ē Dios. Dxeléqueñē' wen Dios cheē' lawe' da dxelennéle'e. ⁸Quebe gunle ca dxelún benne' ca', lawe' da Xrale Dios ba nézquezne' ca da dxechínnele le'e nédxula ca za nábale na. ⁹Cheē le na', le guláwizra Dios nnaale caní:

Xrantu' Dios, zu' xabáa,
gaca lá'azxaqueze Lau'.

¹⁰Gudá nna be'u lu xezr la xu nigá.

Gaca lu xezr la xu nigá ca dxaca lazru' Lue',
cáteze dxaca xabáa.

¹¹Benna netu' da gáguntu' na'a.

¹²Bnite lau cheentu' ca naca da calela da bentu',
ca netu' ba bnite launtu' cheē benne' belunē' cheentu'
da calela.

¹³Quebe gu'u lataj nu gun zréaje netu',
2 san bselá netu' lu na' da xriwe'.

Naca chiu' gápaquezu' xel-la' dxenná bea,
ne xel-la' waca,
ne da xabáa chadía chacanna. ¡Ca'an gaca na!

¹⁴'Che le'e gunite laule cheē benne' belunē' cheēle da calela, na' Xrale Dios zue' xabáa gunite lawe' cheēle le'e. ¹⁵Che le'e quebe gunite laule cheē benne' ca', na' Xrale Dios quebe gunite láuqueze' cheēle le'e ca naca dul-la da nabáale.

Jesús dxusédene' ca dxal-la' gundxu gubasa

¹⁶Na' gunná Jesús:

—Gate le'e dxunle gubasa, quebe guzúale baxache' laule ca dxelún benne' dxelunē' xrlátaje cúzreze. Benne' caní dxelunē' ca' cheē xelélé'e bēnneache le' dxelunē' gubasa. Da li dxapa' le'e, ba déqueze lazruj cheē benne' ca'. ¹⁷Lue', gate dxunu' gubasa, bza xíchaju' chawe', ne gudibe lau', ¹⁸cheē quebe xeléquebe'e bēnneache dxunu' gubasa. Tuze Xrau' Dios na', Bēnnea' zúalēnē' lue' naga zu' tuzu', Le' dxennátequeze', na' gunnē' da naca na chiu'.

Jesús dxusédenē' chee da gunní'a chee xabáa

(Lc. 12.33-34)

19Na' gunná Jesús:

—Quebe gutúpale da gunní'a lu xezr la xu nigá, naga guteba' na, ne da ca' dxelebía xi na, na' xelú'u gubán ne xelebane' na. **20**Le'e, le gun da xrlátaje, da gaca na ca guzrá cháwele da gunní'a xabáa, naga quebe guteba' na, ne da ca' quebe bi xeleque na, na' québequeze xelú'u gubán chee xelequé'e na.

21Naga nuzrale da gunní'a chee, na' zúaqueze lázrdaule.

Jesús dxusédenē' chee tu xi' da xú'udxu

(Lc. 11.34-36)

22Na' gunná Jesús:

—Xiaj laule zaj naca na ca tu xi' chee bel-la' dxen chee. Che xiaj laule zaj naca na chawe', dute ca naca bel-la' dxen chee naxaní'. **23**Che xiaj laule quebe zaj naca na chawe', dute ca naca bel-la' dxen chee nachul-la na. Cá'anqueze che xi' da xu'ule xexaca na tu da chul-la, chúl-lalē'dxa súaquezle.

Jesús dxusédenē' chee Dios, ne chee da gunní'a

(Lc. 16.13)

24Na' gunná Jesús:

—Netú benne' quebe séquene' guzúa cuine' lu na' chupa xranē', lawe' da wazré'e tu xranē' ne wazrí'ine' xetú'e, u wéquene' ba lá'ana tu xranē' na' xetú'e guzú'e chalá'ala. Quebe séquele guzúa cuinle lu na' Dios, ne lu na' da gunní'a.

Jesús dxusédenē' ca dxun Dios, dxuxúe' xúgutē bi chee' ca'

(Lc. 12.22-31)

25Na' gunná Jesús:

—Chee le na' dxapa' le'e, quebe cue'le gunne xue ga sa' da gágule da xí'ajle chee gaca banle, ne ga sa' zra lánale da gácule. Zácadxa xel-la' nabán chee ca da dxágule, ne zácadxa bel-la' dxen chee ca zra lánale. **26**Le nna'xque bxínnedu ca' dxeledaba' lu be'. Quebe dxelázaba'. Quebe dxelelápaba'. Quebe ga dxuluxuzrá cháweba' na. Xrale Dios zue' xabáa dxunézruje' da dxeláguba'. Zácadxale le'e ca bxínnedu ca'. **27**¿Nuzra benne' ládujla le'e gaca gusetunna cuine' xate' lawe' da dxe'e gunne xue?

²⁸¿Bizr chee na' dxe'le le'e gunne xue chee zra lánale? Le nna'xque ca dxelegula xiaj ca' zaj ze le'e xixre'. Quebe dxelún na zrin, ne quebe dxelache na du. ²⁹Dxapa' le'e, Salomón benne' wenná bea na' quebe gucue' ca da xrtan chee xiaj caní, na' le' gúta'le'e chee' da gunnía'. ³⁰Che Dios dxudxene' xrtánle'e xiaj caní da ca' zaj zua na na'a le'e xixre', na' wxre xelezxe na lu xi', quegá gundxe' da chawe' chee le'e, benne' québete ca dxeajlí lazre'. ³¹Chee le na', quebe cué'tecale gunne xue, nnae: “¿Ga sa' da gágudxu? ¿Ga sa' da xí'ajdxu? ¿Ga sa' da gácudxu?” ³²Chee da caní zaj dxe' gunne xue benne' quebe zaj núnbe'e Dios, san le'e, zua tu Xrale xabáa ba nézquezne' ca naca xúgute da dxechínnele. ³³Zria laudxa cuele gunne xue chee nna bea Dios lu xichaj lázrdaule, ne chee gunle da xrlátaje da xezaca ba lazre' Dios, na' sile xúgute da ca' dxechínnele. ³⁴Quebe cuele gunne xue na'a da naca na chee wxre, lawe' da wxre ca'an gáta'queze da cuele gunne xue. Tu zra tu zra déqueze da guchaga laudxu.

Jesús dxusédenē' chee benne' dxuchi'e da dxun le sa' ljwezre'
(Lc. 6.37-38, 41-42)

7 ¹Na' gunná Jesús:
—Quebe guchí'ale da dxelún le sa' ljwézrele chee quebe guchi'a Dios caní chee le'e. ²Le' guchi'e chee le'e cáteze dxunle le'e chee le sa' ljwézrele, ne cáteze dxunle le'e chee le sa' ljwézrele, ca'an gun Dios nen le'e. ³¿Bizr chee na' dxená'u bébedau' da xu'u xiaj lau le sa' ljwezru', ne quebe dxená'u da zrente da xu'u na xiaj láuquezu' lue'? ⁴¿Ájazra gunu' xu'u le sa' ljwezru': “Benna lataj xebéaja' bébedau' da xu'u xiaj lau’”, che da zrendxa xu'u xiaj láuquezu' lue'? ⁵Lue', benne' dxun xrlátaje cúzreze. Bebéaj nedxu da zrente da xu'u xiaj láuquezu', na' gaca le'enu' cháwedau' xebéaju' bébedau' da xu'u xiaj lau le sa' ljwezru'.

⁶Quebe gunézrujle da naca lá'azxa chee benne' dxelunē' ca dxelún becu' snia, checa xelexéchaje', ne xuluzúzruē' le'e. Quebe guzúale da zaca chee lau benne' dxelunē' ca dxelún cuche, dxuluchuchuj dxululéajba' da dxugágule-ba'.

Dxuchalaj Jesús ca dxal-la' nábadxu, ne xexíajdxu, ne nnēdxu dxu'a dxa xu'u
(Lc. 11.9-13; 6.31)

⁷Na' gunná Jesús:

—Le naba, na' Dios gunne' na chee. Le xilaj na, na' xezrélele na. Le nne dxu'a dxa xu'u, na' sáluje' chee. ⁸Le gun caní lawe' da benne' bi dxenabe', dxezi'e na. Benne' bi dxexílaje', dxeajxraque' na, na' benne' dxenné' dxu'a dxa xu'u, zua nu benne' sáluje' chee'.

⁹Netule le'e quebe gunézrujle zrí'inele tu xiaj che lebe' dxenábabe' le'e tu xeta. ¹⁰Quebe gunézrujle zrí'inele tu bela' snia che lebe' dxenábabe' le'e tu bela. ¹¹Che le'e, benne' wen da calela, nézele gunézrujle zrí'inele da naca na chawe', da cháwedxa gunna Xrale Dios zua xabáa, gunne' da chawe' chee benne' bi dxenábene' Le'.

¹²'Le gun chee le sa' ljuézrele ca dxaca lázrele le'e xelún lebe' chee. Da nigá naca da nadxixruj bea na Moisés, ne da dxenná na lu xiche naga naxúaj da gulenná benne' ca' buluchálaje' waláz chee Dios.

Jesús dxusédené' chee dxa xu'u lechide'

(Lc. 13.24)

¹³Na' gunná Jesús:

—Le chu'u lu dxa xu'u lechide'. Dxa xu'u laga, ne neza xu zaj naca naga zjaca benne' xelebía xi'e, na' benne' zante zjaque' na'. ¹⁴Dxa xu'u lechide', ne neza lase zaj naca naga zjaca benne' xelezi'e xel-la' nabán da zeajlí canna, na' bábaze benne' dxelexezrelne' na.

Naca bea tu xaga ne chee da zixre dxebía na

(Lc. 6.43-44)

¹⁵Na' gunná Jesús:

—Le guxúe cuínale chee benne' wen lazre' ca', benne' dxelenné' zaj naque' benne' dxuluchálaje' waláz chee Dios. Benne' caní zá'aque' naga zrale le'e, zaj nun cuine' ca tu benne' dxexruj lazre' ca naca tu zríla'dau', san lu xichaj lázrdawe' zaj naque' snia ca tu becu' xi'a. ¹⁶Le'e xúnbeale le' ne chee da dxeluné'. Da zixre da dxebía lba uva quebe xuchíbedxu na lu xaga xeche', na' da zixre da dxebía xaga higo quebe xuchíbedxu na lu xeche' ga'. ¹⁷Ca'an naca, xúgute xaga chawe' dxelebía na da zixre chawe', na' xaga da quebe naca na chawe', quebe dxebía na da zixre chawe'. ¹⁸Xaga chawe' ca' quebe dxelebía na da zrinnaj, na' xaga zrinnaj na' quebe dxebía na da chawe'. ¹⁹Xúgute xaga zrinnaj welechugue na, na' xelexze

na lu xi'. ²⁰Ca'an naca, le'e xúnbeale benne' ca' ne chee da ca' dxelune'.

Quegá xúgute benne' xelu'e naga dxenná bea Dios xabáa
(Lc. 13.25-27)

²¹Na' gunná Jesús:

—Quebe xelu'e naga dxenná bea Dios xabáa xugute benne' ca' dxel'é neda': “Xrana', Xrana'.” Welú'u tuze benne' ca' dxelune' ca da dxaca lazre' Dios zue' xabáa. ²²Ca zrin zra na', benne' zante xel'é neda': “Xránantu', Xránantu', netu' bchálajntu' ne chee Lau' Lue', ne bchínentu' Lau' bebéajntu' be' xriwe' ca', ne nen Lau' Lue' bēnle'entu' xel-la' waca ca' chee xabáa.” ²³Nadxa neda' xápaqueza' benne' ca': “Quebe núnbe'a le'e. Le cuasa cuita' neda', le'e, ba benle da calela.”

Jesús dxusédené' chee chupa lane xu'u
(Lc. 6.47-49; Mr. 1.22)

²⁴Na' gunná Jesús:

—Bénnea' dxenne' chia', ne dxune' ca da dxennía', naque' ca tu benne' naxéajni'iqueze', benne' bene' tu lizre' lu xiaj xre. ²⁵Guca xiuj, na' bdxuaj guba'u, ne guxasa be' bduu' chee xuluzría xi na xu'u na', san quebe guzré'e na lawe' da xu'u lane na lu xiaj xre. ²⁶Bénnea' quebe dxuzé nague' chia', ne quebe dxune' ca da dxennía', naque' ca tu benne' xala, benne' bene' tu lizre' lu xu dxeze. ²⁷Guca xiuj, na' bdxuaj guba'u ne guxasa be' bduu' chee xuluzría xi na xu'u na', na' chadite guzré'e na, ne guzría xite na.

²⁸Ca bexuzre bchalaj Jesús, na' belexebanne benne' ca' ca naca da bsédené', ²⁹lawe' da dxusédené' benne' ca' ca tu benne' nape' xel-la' dxenná bea, ne quegá ca dxelún benne' ca' dxuluxúzjle'e da nadxixruj bea Dios.

Dxexún Jesús tu benne' dxuzru lu xpele'
(Mr. 1.40-45; Lc. 5.12-16)

8 ¹Gate bexetaj Jesús lu xi'a na', benne' zante zjácálene' Le'.
²Na' bzrin tu benne' we' dxuzru lu xpele', ne bzu zribe' lau Jesús. Dxe'e Le':

—Xran, che dxaca lazru', waca xexunu' neda'.

³Nadxa Jesús guxrúa ne'e bénnea'. Dxe'e le':

—Dxaca lazra'. Na'a dxexuna' lue'.

Ca gunné' caní, benne' wē' na' bexácate' ca naca xízrawe' chee'. ⁴Na' Jesús guzre' le':

—Gunná' xque. Quebe nu xu'u ca'. Bexíajze na'a xeajxel'e cuinu' lau bxruze, ne xeajnezruj guna' ca da dxenná bea lu da bdxixruj be'e Moisés, chee xeledé'e benne' ca' ba bexacu' na'a.

Dxexún Jesús bi wēn zrin chee tu benne' dxenná be'e lu wedil-la
(Lc. 7.1-10)

⁵Ca bexú'u Jesús lu xezre Capernaum, na' bzrin lawe' tu benne' Roma, benne' dxenná be'ene' benne' ca' dxjaque' wedil-la, na' guta' xuene' Le', ⁶dxē'e Le':

—Xran, bi wēn zrin chia' dēbe' lizra'. Naxrú'ünebe' bine, ne dxezácale'ēbe'.

⁷Jesús dxē'e le':

—Wazá'a xexuna'-be'.

⁸Benne' dxenná be'e na' gunné':

—Xran, quebe naca chia' chu'u lizra'. Cun gunneze, na' xexaca bi wēn zrin chia'. ⁹Caní waca gunu' lawe' da zua benne' dxenná bé'ene' neda', ne cá'anqueze neda' dxenná be'eda' benne' ca' dxjaque' wedil-la. Gate dxapa' tube': “Guxíaj”, na' dxéajbe'. Na' gate dxapa' bi xula: “Gudá”, na' dxídabe'. Na' gate dxuchínedá' bi wēn zrin chia' chee bi da gunbe', na' dxunbe' na.

¹⁰Gate bene Jesús da nigá, bebánene', na' guzre' benne' ca' zjácālene' Le':

—Da li dxapa' le'e, ládujla benne' Israel quebe nu ne xezrelda', benne' dxéajle'e chia' ca dxun benne' nigá. ¹¹Neda' dxapa' le'e, zá'aca benne' zante chālá'a naga dxalaj gubizra, ne xechalá'ala naga dxebía gubizra, na' xelebé'e tu zren xelawē' nen Abraham, ne Isaac, ne Jacob naga dxenná bea Dios xabáa. ¹²Benne' ca' gucá'a zga'ale Dios chee xelu'e naga dxenná bea Le', guzale' benne' ca' lataj chul-la naga xelebezre', ne xeláguxa'atē lazxe'.

¹³Nadxa Jesús guzre' benne' dxenná be'e na':

—Bexíaj lizru'. Waca ca da ba guxéajle'u.

Ca lu zra ná'queze bexácate' bi wēn zrin chee'.

Dxexún Jesús xrna zru'ule Pedro

(Mr. 1.29-31; Lc. 4.38-39)

¹⁴Guxíaj Jesús lizre Pedro, na' blé'ene' xrna zru'ule' de' lu da'a, xu'e da la. ¹⁵Xeajté' ne'e, na' bedxúaj da la da xu'e. Nadxa

nu'ula na' guxase', ne guzú lawe' dxusení'ē da xelagu benne' ca'.

Dxexún Jesús benne' zante benne' we'

(Mr. 1.32-34; Lc. 4.40-41)

¹⁶Ca guzría gubizra, na' belezrín benne' zante lau Jesús, zaj naché'ē benne' zaj xu'ē be' xriwe' ca'. Nen dízra'ze da gunná Jesús, bebéaje' be' xriwe' ca', ne bexune' xúgute benne' we' ca'. ¹⁷Da nigá guca na ca da gunná Isaías, benne' bchálaje' waláz chee Dios, gunné': "Le' bequé'ē xízrawe' ca' da nápadxu, ne gubague' ca da dxezácadxu."

Dxelaca lazre' benne' chjácálenē' Jesús

(Lc. 9.57-62)

¹⁸Gate na' ble'e Jesús benne' zante zaj naxéchaje' Le', na' guzre' benne' ca' dxusédene' gulelague' xechalá'a nísadau' tu lu da dxedá lawe' nisa. ¹⁹Na' bzrin lau Jesús tu benne' dxuxuzájle' da bdxixruj be'e Dios, na' dxe'ē Le':

—Benne' Wesede, dxaca lazra' sálēna' Lue' gáteteze chéaju'.

²⁰Na' Jesús guzre' le':

—Beza' zaj zua bluaj cheeba', na' bxinne zaj zria xrú'uneba', san neda', Benne' Gulje' Bénneache, ne naga xrua xíchaja' quebe ga zua.

²¹Bzrin xetú benne' naque' benne' ba bsédequeze Jesús, na' guzre' Le':

—Xran, bēna neda' lataj xexá'a nedxu chee cheajxecacha' xra'.

²²Nadxa Jesús guzre' le':

—Gudálen neda'. Be' lataj benne' gate ca' xulucache ljwezre'.

Dxebeque zri Jesús be' bdunu', ne xeajxruza chee nísadau'

(Mr. 4.35-41; Lc. 8.22-25)

²³Nadxa guxú'u Jesús lu da dxedá lawe' nísadau', na' benne' ca' dxusédene' belune' Le' tu zren. ²⁴Na' guzú lau dxaca tu be' bdunu' lawe' nísadau', na' xeajxruza chee nísadau' guxú'u na lu da dxedá lawe' nísadau' na', dxácatē dxase Jesús. ²⁵Nadxa benne' ca' dxusédene' bulusebane' Le', na' dxelé'ē Le':

—Xránantu'. Bselá netu'. Ba dxázentu' lu nisa.

²⁶Jesús guzre' le':

—¿Bizr chee na' dxezrébele'ele? Nácale benne' látega dxelejílí lázre' Dios.

Nadxa guxasa Jesús. Gudil-le' be' bdunu', ne nísadau', na' la belebé zrite na. ²⁷Benne' ca' belexebánene', gulenné':

—¿Núzraqueze benne' nigá? Dxuluzúa be', ne nísadau' dizra' chee'.

Benne' Gadara zaj xu'e be' xriwe'

(Mr. 5.1-20; Lc. 8.26-39)

²⁸Gate bezrín Jesús xechalá'a nísadau' na' lu xezr la xu chee benne' Gadara, na' chupa benne' biu belexedxúaje' lu bluaj chee benne' gate, na' belezrine' lau Jesús. Dxúpatē benne' ca' zaj xu'e be' xriwe', ne zaj naque' benne' sníale'e, na' netú benne' quebe dxexázrene' xedé'e la neza na'. ²⁹Na' gulezú lawe' dxelebézrexe'e. Dxelenné':

—¿Bizr chee na' za'u naga zúantu', Jesús, Zri'ine Dios? ¿Za'u nigá chee gusaca zi'u netu', ne quebe ne zrin zra?

³⁰Tu chí na' zra tu cue' cuche dxeláguba'. ³¹Be' xriwe' ca' gulata' xue na Jesús, gulenná na:

—Che Lue' xebéaju' netu' nigá, benna lataj cheajchú'untu' lu cuche ca'.

³²Nadxa Jesús guzre' na:

—Le chjaca xca'.

Nadxa be' xriwe' ca' belexedxúaj na lu benne' ca', na' belexú'u na lu cuche ca'. Nadxa xúgute cuche ca' belalázruba' tu dxu'a xi'a zren, na' xejlecházeba' lu nísadau' naga gulázeba' nisa, na' guláteba'.

³³Benne' ca' buluxúe'-ba' belezrebe', na' besá'aca chégüe', ne belexezrine' lu xezre. Buluchálaje' ca guca xúgute da caní, ne ca guca chee benne' ca', belexedxúaj be' xriwe' zaj xu'e.

³⁴Nadxa xúgute benne' zaj zre'e lu xezre na' beledxúaje', ne belezrine' naga zua Jesús. Na' ca belelé'enge' Le', gulata' xuene' Le' xezé'e lu xezr la xu chee'.

Dxexún Jesús tu benne' zaj zua zri ni'a ne'e

(Mr. 2.1-12; Lc. 5.17-26)

9 ¹Nadxa Jesús guxú'e tu lu da dxedá lawe' nísadau', na' gulague' xechalá'a nísadau', na' bezrine' lázrequeze'.

²Na' bedajlegu'e tu benne' biu lau Le', zaj zua zri ni'a ne'e, zaj naxrúe' benne' na' tu lu ta'a blaga'. Gate ble'e Jesús ca dxeléajle'e chee', na' gunné', dxe'e benne' we':

—Ben dipa lazru', zrí'ina'dau'. Dul-la chiu' dxunite lawa'.

³Nadxa bal-la benne' dxuluxuzájle'e da nadxixruj bea Dios gulenné' lu xichaj lázrdawe': "Benne' nigá dxucá'ana dítaje' Dios nen xrtizre'!" ⁴Lawe' da neze Jesús ca gulenné' lu xichaj lázrdawe', na' dxe'e benne' ca', gunné':

—¿Bizr chee na' dxennale caní lu xichaj lázrdaule? ⁵¿Bízrala da quebe nácadxa stēbe guna'? ¿Nnia': "Dul-la chiu' ba bnite lawa'", u che nnia': "Bexasa, guzá?" ⁶Chee le na' gulé'eda' le'e neda', Benne' Gulje' Bénneache, napa' xel-la' dxenná bea lu xezr la xu nigá gunite lawa' dul-la.

Nadxa dxe'e benne' zaj zua zri ni'a ne'e, gunné':

—Bexasa. Becá'a ta'a chiu'. Bexíaj lizru'.

⁷Bénnea' zaj zua zri ni'a ne'e bexase', na' zexíajte' lizre'. ⁸Gate belelé'e bénneache da nigá, na' belezrebe', ne belúe lánane' Dios lawe' ba bnézruje' xel-la' waca caní chee bénneache.

Jesús dxuláwizre' Mateo

(Mr. 2.13-17; Lc. 5.27-32)

⁹Ca bezá Jesús na', na' blé'ene' tu benne' biu le' Mateo, dxe'e lataj naga dxuchízruje' waláz chee xezre Roma, na' dxe'e le', gunné':

⁶ —Ben neda' tuze.

Nadxa Mateo nigá guxase' zéajlene' Jesús.

¹⁰Gate na' dxe' Jesús dxawe' xeta lizre Mateo nigá, benne' zante wechizruj, ne benne' dul-la belezrine', ne gulebé'queze' dxelawe' cuíta Jesús, ne benne' ca' dxusédené'. ¹¹Benne' xudau' fariseo ca', gate belelé'ene' da nigá, dxelé'e benne' ca' dxusede Jesús, gulenné':

—¿Bizr chee na' Benne' dxusédené' le'e dxágulene' benne' wechizruj ca', ne benne' wen da zrinnaj ca'?

¹²Jesús benne' da nigá, na' dxe'e benne' ca', gunné':

—Quebe dxelechine benne' chawe' nu benne' dxexune'

bénneache. Benne' we' dxelechínene' le'. ¹³Le chjaca, le cheajsede ca da dxenná da naxúaj na lu xiche chee Dios, dxenné': "Neda' dxaca lazra' xexache lázrele le sa' ljwézrele, quegá gútele be xíxre'du ca' lu cugu chia'." Bla' neda', quegá chee guláwizra' benne' xrlátaje. Dxuláwizra' benne' dul-la chee xelexebí'i lazre'.

Jesús dxusédené' ca naca chee gubasa

(Mr. 2.18-22; Lc. 5.33-39)

¹⁴Nadxa belezrín lau Jesús benne' ca' dxeledálene' Juan, bénnea' dxuchúe' bénneache nisa, na' gulenábene' Le':

—¿Bizr chee na' quebe dxelún gubasa benne' dxusédenu' Lue', ca dxuntu' netu', ne ca dxelún benne' xudau' fariseo ca'? Tu dxúnzquezentu' gubasa.

¹⁵Na' Jesús dxē'e benne' ca', gunné':

—¿Ájala chee na' xelezúa ba xácheze benne' zaj zue' laní chee wechaga na' dxácatē zua benne' wechaga na' nen le'? Wazrín zra gate dua benne' wechaga na'. Nadxa xelúnqueze' gubasa.

¹⁶Quegá nu dxudá tu ladxe' cube le'e tu zra lánadxu gula, lawe' da gate cheajxedxé' da cube na', ne xrube xu na da gula na', na' dxézadxa da gula na'. ¹⁷Cá'anqueze quebe nu benne' que'e xrise uva wal-la cube lu bzude xide gula lawe' da che ca'an guné', gate cue' chí' xrise uva wal-la, na' dxeza bzude xide na', na' xelebía xi' xrise uva wal-la na', ne bzude xide na'. Chee le' na' dxal-la' ca'adxu xrise uva wal-la cube lu bzude xide cube. Che ca'an gundxu, xelegá'ana chawe' dxúpatē na.

Bchalaj Jesús da caní ca naca chee benne' ca' dxelezí' lu ne'e xrtizre'.

Dxexún Jesús bi nu'ula chee Jairo, ne nu'ula', xeajté'e zra lana Jesús

(Mr. 5.21-43; Lc. 8.40-56)

¹⁸Dxácatē na' dxuchalaj Jesús da nigá, na' bzrin tu benne' xíchajē chee benne' judío ca', na' bzu zribe' lau Jesús, dxenné':

—Bi nu'ula chia' za gútetebe'. Che Lue' xidu' ne guzē' na'u lebe', wexaca banbe'.

¹⁹Na' guxasa Jesús, guxíajlene' le' nen benne' ca' dxusédene'. ²⁰Nadxa bzrin tu nu'ula we' cúzrula Jesús, ba naca chazrinnu iza dxé'ene' tu we' dxaque dxen, na' xeajté'e zra lana Jesús. ²¹Dxenné' lu xichaj lázrdawe': “Che cheajtaza' zra lane', na' xexaca'.”

²²Jesús guxéchaje', guné'e nu'ula', na' dxē'e le':

—Ben dipa lazru', zrí'ina'dau'. Bache bexacu' lawe' da dxéajle'u chia'.

La bexácatē nu'ula na'.

²³Gate na' bzrin Jesús lizre benne' xíchajē chee benne' judío ca', na' blé'ene' zaj zra' benne' wil-la xulucache' bi nu'ula na', ne benne' zaj zre'e dxelune' zralaj. ²⁴Gunná Jesús, dxē'e benne' ca':

—Le xedxúaj nigá. Quegá nate bi nú'uladau' nigá. Dxásezebe'.

Na' buluzrizre' chee'. ²⁵Gudé bebéaje' benne' ca', na' guxú'u Jesús, ne béxrue' na' bi nu'ula na', na' guxásabe'. ²⁶Du ca naca xezre ca' bzriluj dizra' chee da ben Jesús.

Dxexún Jesús chupa benne' la chul-la

²⁷Ca bedxúaj Jesús na', na' chupa benne' xjaque' cuzru Le', dxelenné' zizraj:

—Bexache lazre' netu', Lue', Zri'ine David.

²⁸Ca guxú'u Jesús lu xu'u naga zúaqueze', na' benne' la chul-la caní gulebigue' lau Le', na' Jesús guzre' benne' ca':

—¿Dxéajlele wazéqueda' xexuna' le'e?

Na' gulé'e Le':

—Awe', Xran.

²⁹Nadxa Jesús gudane' xiaj lau benne' ca', dxenné':

—Gaca chee le ca dxéajlele.

³⁰Belexaca xiaj lawe'. Nadxa Jesús gunné xuené' benne' ca', gunné':

—Le guxúe xanne' chee quebe nu neze da nigá.

³¹Gate beledxúaje', na' buluchálaje' du ca naca xezre ca' ca da ben Jesús chee'.

Dxexún Jesús tu benne' quebe dxaca nnie'

³²Ca bezá' Jesús nen benne' ca', na' belezrín bal-la benne' zaj naché'e tu benne' biu quebe dxaca nnie', benne' xu'e be' xriwe'. ³³Cáteze bebéaj Jesús be' xriwe' nigá, na' benne' quebe dxaca nnie' bezú lawe' dxuchálaje'. Na' benne' ca' belexebánele'e, dxelenné':

—Cabata' ne lé'edxu gaca caní ládujla benne' Israel ca'.

³⁴Benne' xudau' fariseo ca' gulenné':

—Benne' nigá dxebéaje' be' xriwe', dxuchínene' xel-la' waca chee da xriwe', da na' dxenná be'e na be' xriwe' ca'.

Dxexache lazre' Jesús bénneache ca'

³⁵Gudé Jesús tu tu xezre zren, ne tu tu xézredau', dxusédene' benne' ca' lu xu'u ca' naga dxulucá'ana szrene' Dios tu tu lataj ca'. Gulu'e lban chee dizra' chawe' ca nna bea Dios, ne bexunte' bénneache zaj nape' tu tu cue' xízrawe' ca da dxelezaque'. ³⁶Gate ble'e Jesús bénneache ca', na' bexache lazre' le' lawe' da zaj zre'e xácheze', ne dxelecuán lazre'. Zaj naque' ca zrila' ca' quebe zua benne' guxúe'-ba'. ³⁷Nadxa guzre' benne' ca' dxusédene':

—Da li, da zrentę de da lápadxu, na' bábaze benne' węn zrin zaj zřę'e. ³⁸Chee le na' le naba lau Xrana lina nigá, sel-le' benne' węn zrin xelexepe' lina chee'.

Dxecá'a Jesús chazrinnu benne' xelaque' gubáz chee'

(Mr. 3.13-19; Lc. 6.12-16)

10 ¹Nadxa Jesús bláwizre' chazrinnu benne' ca' dxusédene', na' bnézruje' le' xel-la' dxenná bea chee xelexebéaje' be' xriwe' ca', ne chee xelexexune' bėnneache zaj xu'e tu tu cue' xızrawe' ca da dxelezaque'.

²Caní zaj le chazrinnu benne' gubáz ca' chee Jesús: Benne' nedxu le' Simón, ne léqueze' Pedro.

Xetúe' naque' benne' biche Pedro, le' Andrés.

Xechupe' zaj le' Jacobo, ne Juan, benne' zaj naque' zri'ine Zebedeo.

³Xezícala benne' ca' zaj le' Felipe, ne Bartolomé, ne Tomás.

Xetue' le' Mateo, benne' wechizruj chee xęzre.

Xetue' le' Jacobo, zri'ine Alfeo.

Xetue' le' Lebeo, benne' léqueze' Tadeo.

⁴Xetúe' le' Simón, benne' dxe'e gunne xue chee xęzr la xu Israel.

Xetúe' le' Judas Iscariote, bėnnea' gudée' Jesús lu na' benne' dxeledábage' Le'.

Dxesel-la Jesús benne' gubáz chee' ca' cheajlezenne' bėnneache xrtizre'e

(Mr. 6.7-13; Lc. 9.1-6)

⁵Nadxa gusel-la Jesús benne' chazrinnu caní. Guzre' le':

—Quebe cheajle naga zaj zra' benne' quebe zaj naque' judío, ne quebe chu'ule xęzre ca' zaj nababa Samaria. ⁶Le chjaca naga zaj zra' benne' Israel zaj naque' ca zřila' zaj naníteba'. ⁷Le chjaca cu'ule lban, xe le bėnneache ba bžrin gáguze zra nna bea Dios lu xęzr la xu nigá. ⁸Le xexún benne' zaj xu'e we' guzru', ne benne' bila xızrawe' dxel'éne'. Le gusebán benne' gate. Le xebéaj be' xriwe' da zaj xu'u bėnneache. Cá'aze guzile xel-la' dxenná bea nigá, na' cá'aze le guchine na, quebe bi sile.

⁹Quebe gúale dumí oro, ne dumí plata, ne dumí lase.

¹⁰Quebe gúale xixruj xeta da gágule la neza. Quebe gúale xetú cue' zra lánale, ne zřelale, ne xaga da gúxrule. Benne' węn zrin wazrúequeze' da gawe'.

¹¹'Gate na' zrinle le'e tu xezre zren u tu xézredau', le quilaj na' tu benne' du lazre', na' le xegá'ana lizre' ca zrindxa zra xeza'ale na'. ¹²Gate na' chu'u le lu xu'u na', le xē bēnnea' naca lizre' na': "Xela dxebeza zri lazre' suale na le'e." ¹³Che benne' ca' zaj naca chee' xelez'í'e xel-la' ba lá'ana caní, le gucá'ana cá'aze na. Che quebe zaj naca chee' xelez'í'e da nigá, na' quebe gata' chee'. ¹⁴Che quebe lataj dxelunē' le'e, ne quebe dxelennē' chee'le, le xedxúaj lu xu'u na' u lu xezre na', na' le xebibe bxrtedu na' zria ní'ale. ¹⁵Da li dxapa' le'e, ca zrin zra guchi'a Dios, Dios gundxe' da ba xa' chee' benne' xezre na' quez ca da gunē' chee' benne' Sodoma, ne benne' Gomorra, xezre ca' guzría xi'e.

Xelebé nawē' bi ca' chee' Jesús

¹⁶Na' gunná Jesús:

—Le na' xque nigá. Neda' dxesel-la' le'e, gácale ca zrla' zaj zra'ba' ládujla becu' xi'a ca'. Chee' le na', le gaca sina ca zaj naca bēla', san le gaca dxexruj lazre' ca zaj naca bgúgudu ca'. ¹⁷Le guxúe cuínale. Zaj zra' benne' xuludéē' le'e lu na' benne' xu'u lawe', ne xuluzálaje' le'e lu xu'u naga dxulucá'ana szrenē' Dios. ¹⁸Cá'anqueze welechē'e le'e lau benne' xu'u lawe' ca', ne lau benne' dxelenná bea lawe' da nácale chia' neda'. Ca'an gaca guchálajle ca naca chia' neda' lau benne' ca', ne lau benne' quebe zaj naque' judío. ¹⁹Gate na' xuludéē' le'e lu na' benne' dxuchi'a da dxaca, quebe gunne xue cue'le ca da nnale u ájala guchálajle, lawe' da gate zrin zra guchálajle, Dios gunne' ca da guchálajle. ²⁰Quegá le'eze guchálajle, lawe' da Be' Lá'azxa chee' Dios guchálajle' lu dxú'ale.

²¹Xuludé bēnneache benne' bíchequeze' lu na' benne' xelútiē' le'. Cá'anqueze xra xrna xuludéē' zr'í'ine', na' zr'í'ine' ca' xeledábagabe' xra xrnáquezebe' chee' xelátie'. ²²Xúgute bēnneache xelezr'é'e le'e lawe' da nácale chia' neda', san bēnnea' guxru chache' dizra' chee' Dios ca zrin zra cheajse' chee', la bēnnea'. ²³Gate xelebé nawē' le'e tu xezre, le xuzrunnuj xetú xezre. Da li neda', Benne' Gulje' Bēnneache, dxapa' le'e, xida' nédxula ca quebe ne tache tale xúgute xezre chee' benne' Israel.

²⁴Netú benne' quebe naque' szrendxa ca benne' dxusédene' le'. Cá'anqueze netú benne' wen zrin quebe naque' szrendxa ca xrane'. ²⁵Tu benne' dxuséde dxal-la' gun zi' lazre' gague' ca naca

benne' dxusédene' le', na' benne' wən zrin dxal-la' gun zi' lazre' gaque' ca naca xrane'. Che benne' naque' xrane xu'u dxelé'e le' Beelzebú, da xriwe', chezradxa xelenné' chee bi chee' ca'.

¿Núzraqueze dxal-la' zrédexu?

(Lc. 12.2-9)

²⁶Na' gunná Jesús:

—Chee le na', quebe zrédexu benneache. Xúgute da bagácheze gaca béaqueze na, na' xúgute da dxelaca ga nagache gulé'e láuqueze na. ²⁷Da nigá dxapa' le'e lu da chul-la, le guchalaj na te zra. Da dxapa' le'e bagácheze, le nne zizraj chee xelén xúgute benne'. ²⁸Quebe zrédexu benne' xelúti'e bəl-la' dxen chee. Quebe xelezéque' xelúti'e benne'du xu'ule. Le zrebe Dios. Le' dxezéque' guzría xi'e bəl-la' dxen chee, ne benne'du xu'ule lu lataj ba xa'.

²⁹'Dxelúti'e chupa bxinnedu ca' nen tu dumídan'. Netuba' quebe gáteba' chee quebe ne güe lataj Xrale. ³⁰Cá'anqueze xicha xíchajle, xúgute na zaj nababa na. ³¹Chee le na', quebe zrédexu. Zácadxale le'e quézcala be zan bxinnedu ca'.

Dxal-la' xechédexu nácdxu chee Jesucristo

(Lc. 12.8-9)

³²Na' gunná Jesús:

—Xúgute benne' ca' dxelexechebe' zaj naque' chia' neda' lau benneache, cá'anqueze neda' wechébequeza' zaj naque' chia' neda' lau Xra' zue' xabáa. ³³Benne' ca' quebe dxelexechebe' zaj naque' chia' lau benneache, néda'queza' québequeze xecheba' zaj naque' chia' lau Xra' zue' xabáa.

Da naca Jesús naca na tu da dxun na chupa la'a benneache

(Lc. 12.51-53; 14.26-27)

³⁴Na' gunná Jesús:

—Quebe guéquele bla'a neda' chee guzúa' xel-la' dxebeza zri lazre' ládujla benneache. Bla'a neda', quegá chee guzúa' xel-la' dxebeza zri lazre', san chee guzúa' wedil-la. ³⁵Bla'a neda' chee guna' tábaga' tu benne' xre', ne chee guna' tábaga' tu bi nu'ula xrabe', ne chee guna' tábaga' tu zru'a lizre' tau zrí'ine'. ³⁶Ca'an gaca, tu tu benne' tíl-lale xrtía ljwezre' le'.

³⁷'Che tu benne' nazrí'idxene' xra xrne'e quezca neda', quebe naca chee' gaque' chia', na' che nazrí'idxene' bi chee'

ca' quezca neda', quebe naca chee' gaque' chia'. ³⁸Che tu benne' quebe gun cuine' ca tu benne' zéajte'e le'e xaga béguaj, ne gune' neda' tuze, quebe naca chee' gaque' chia'. ³⁹Benne' dxaca lazre' gapa chi'e xel-la' nabán chee' gunitie' na. Bénnea' zúatequeze gudée' xel-la' nabán chee' ne chia' neda', guselé' xel-la' nabán chee'.

Da gunna Dios dxi'u

(Mr. 9.41)

⁴⁰Na' gunná Jesús:

—Che tu benne' gape' le'e ba lá'ana, néda'queze gape' ba lá'ana, na' bénnea' dxape' neda' ba lá'ana, dxápaqueze' ba lá'ana Dios, Bénnea' gusel-le' neda'. ⁴¹Che tu benne' gape' ba lá'ana tu benne' dxuchalaje' waláz chee Dios lawe' da ze'e waláz chee Dios, benne' nigá wazí'queze' tuze ca da si' bénnea' dxuchálaje' waláz chee Dios. Na' che tu benne' gape' ba lá'ana tu benne' xrlátaje lawe' da naque' benne' xrlátaje, benne' nigá wazí'queze' tuze ca da si' benne' xrlátaje na'. ⁴²Núteteze benne' gunézruje' tu zriga' nisa zaga da xi'aj tu bidu caní lawe' da naque' chia' neda', da líqueze wazi'e da gunezruj Dios le'.

Dxeleznín benne' ca' gusel-la Juan lau Jesús

(Lc. 7.18-35)

11 ¹Gate bexuzre Jesús bchálajlene' bénneache, na' bchálajlene' chazrinnu benne' ca' dxusédene'. Bezé'e na' chee cheajsédene', ne cheajchálaje' Iban xúgute xezre ca' lu xezr la xu na'.

²Juan, bénnea' bchue' bénneache nisa, xu'e lizre xia, na' benne' ca naca da dxun Cristo. Nadxa gusel-le' chupa benne' ca' dxeledálene' le' lau Jesús. ³Benne' chupe' caní buluchebe' Jesús:

—¿Nacu' Lue' Cristo, Bénnea' dxal-la' xide', u che dxal-la' cuézantu' xelá' xetú benne'?

⁴Na' bechebe Jesús:

—Le chjaca cheajézrele Juan da caní dxelé'ele, ne da dxenle. ⁵Le xe'e ca dxaca, dxelexelé'e benne' gulaque' la chulla. Dxelexedá benne' gulezúa zri ni'a ne'e. Belexexaca benne' gulezaque' we' guzru', ne belexexaca ban benne' ca' gulatie'. Benne' xache' ca' dxelenne' dizra' chawe' chee Dios. ⁶Ba neza zrente naca na chee bénnea' quebe xucuán lazre' sálene' neda'.

⁷Ca besí'aca benne' chupa ca', na' guzú lau Jesús dxuchálajle' benne' zaj zre'e na' ca naca chee Juan. Dxenné': —¿Bizra xeajna'le le'e le'e xixre' na'? ¿Xeajna'le tu xia da dxuxrize be'? ⁸Che cabí, ¿bizra xeajna'le na'? ¿Xeajna'le tu benne' nacue' zra lane' da zaca? Nézquezle benne' ca' zaj nácu'e' ladxe' zaca, lizre benne' dxelenná be'e zaj zra' benne' caní. ⁹¿Bízraqueze xeajna'le? ¿Xeajna'le tu benne' dxuchálaje' waláz chee Dios? Awe'. Ca'an guca. Bénnea' ble'ele na' nácadxe' blau ca tu benne' dxuchálaje' waláz chee Dios. ¹⁰Lu xiche chee Dios naxúaj na ca naca chee Juan na'. Dxenná na: Neda' dxesel-la' benne' gubáz chia' nédxula ca Lue', chee gucueze' neza naga teu'. ¹¹Da li dxapa' le'e, ládujla xúgute bénneache quebe nu chilá' benne' nácadxe' blau ca naca Juan, bénnea' bchue' bénneache nisa. Naga dxenná bea Dios, bénnea' nácadxe' benne' dxexruj lazre' nácadxe' blau ca naca Juan na'. ¹²'Ca lu zra bla' Juan, bénnea' bchue' bénneache nisa, bzrinte na'a zra, zaj zra' benne' dxelune' zi' lazre' xelu'e naga dxenná bea Dios xabáa, na' benne' dxelune' zi' lazre' dxelezrué'ene' na. ¹³Ca da bzuaj Moisés lu xiche chee da nadxixruj bea na, ne ca gulenná xúgute benne' buluchálaje' waláz chee Dios, dxuchalaj na ca naca chee xel-la' dxenná bea chee Dios, bzrinte ca bla' Juan na'. ¹⁴Che le'e dxaca lázrele chéajlele da nigá, Juan na' naque' Elías, bénnea' bchálaje' waláz chee Dios gate nate, na' dxal-la' xel'é'e chee guchálaje' waláz chee Dios. ¹⁵Che zua nágale, le xen da nigá. ¹⁶'¿Ájazra zaj naca benne' zaj zre'e na'a zra? Zaj naque' ca bidu ca' dxelebé'ebe' dxelítajbe' lawe' xi'a, ne dxelennebe' zizraj, dxelé' ljuwézrebe' ca': ¹⁷“Bcuézrentu' bchiuj san quebe bxá'ale le'e. Bil-la xáchentu' san quebe gudxzézrele.” ¹⁸Caní zaj naque' lawe' da bla' Juan, quebe dxawe', ne quebe dxí'aje' da zaca, na' le'e dxennale xu'e be' xriwe'. ¹⁹Nadxa bla' neda', Benne' Gulje' Bénneache, dxawa', ne dxí'aja', na' dxennale naca' neda' benne' wagu xrata, ne benne' dxi'aj, ne ljuwezre benne' dul-la, ne benne' wechizruj chee Roma. Naca bea nu benne' nape' xel-la' sina chee Dios ne chee da dxun bénnea'.

Ca gaca chee bénneache quebe dxuluzúe' xrtizra' Dios

(Lc. 10.13-15)

²⁰Nadxa guzú lau Jesús dxedil-le' bénneache chee xezre ca' naga bene' xel-la' waca ca' chee xabáa, lawe' da quebe belexebí'i lazre' benne' zaj zre'e na'. Na' gunné':

21—Baxache' nácale le'e zrale xezre Corazín. Baxache' nácale le'e zrale xezre Betsaida. Caní nácale lawe' da checa' la ba guca lu xezre Tiro, ne lu xezre Sidón ca naca xel-la' waca ca' chee xabáa ca da gulaca ládujla le'e, da zrente ba zeaj gulácue' zra lane' tuzruj, ne gulegú'e de xíchaje' da zaj naca bea na belexeb'íi lazre'. 22Neda' dxapa' le'e, lu zra guchi'a Dios, gundxe' da ba xa' chee quez ca da ba xa' gune' chee benne' Tiro, ne benne' Sidón. 23Le'e zrale xezre Capernaum, ¿dxéquele Dios wechise' le'e xabáa? Dios gudée' le'e lataj ba xa'. Caní gaca na lawe' da checa' la ba guca lu xezre Sodoma ca naca xel-la' waca ca' chee xabáa ca da gulaca ládujla le'e, nagá'anatequeze xezre na' lu zra na'a zra. 24Neda' dxapa' le'e, lu zra guchi'a Dios, gundxe' da ba xa' chee quez ca gune' da ba xa' chee benne' Sodoma ca'.

Dxenná Jesús: “Le da naga zua' xezí' lázrele”

(Lc. 10.21-22)

25Ca lu zra na' gunná Jesús:

—Dxue lánana' Lue', Xrae, nacu' Xrana xabáa, ne Xrana xezr la xu nigá. Dxue lánana' Lue' lawe' da bcácheu' da caní lau benne' sina ca', ne lau benne' dxeléajni'ine', san blé'enu' na bidu caní. 26Ca'an naca, Xrae, lawe' da naca na ca dxaca lazru' Lue'.

27'Xra' ba bdee' lu na'a xúgute da caní. Quegá nu benne' núnbe'e neda', Zri'ine Dios, san Xra' Dios núnbe'e neda'. Quegá nu benne' núnbe'e Xra', san neda', Zri'ine Dios, núnbe'a Le', ne zaj núnbea benne' ca' Le', benne' ca' dxaca lazra' gulé'eda' le' ca naca Xra'. 28Le da naga zua', xúgutele le'e dxexxréquele lu zrin dxunle chee xudau', ne ca naca xua da núale, na' neda' guna' xezí' lázrele. 29Le gunna lataj xrúa' le'e ca nu benne' xrue' bezre xugu' cheeba', ne le gusede chia' lawe' da naca' dxexruj lazre', ne dxe'ene lazre', na' wazrué'ele xezí' lázrele lu bénne'du xu'uule. 30Da na' naca na ca xugu' chee bezre da xrúa' le'e québete ca naca na stebe chee gúale na, na' xua da xrúa' le'e naca na zraze.

Bi ca' dxusede Jesús dxelequ'é'e dau zrua' xtila gate naca zra dxulupá'ana judío

(Mr. 2.23-28; Lc. 6.1-5)

12 1Ca lu zra na' xu'u Jesús neza zéaje' ládujla naga de xel-la' zrua' xtila, ne naca zra dxulupá'ana benne'

judío. Dxeledún benne' ca' dxusede Jesús, na' gulezú lawe' dxelálaje' dau naga zria zrua' xtila, ne dxelawe' na. ²Gate belelé'e benne' xudau' fariseo ca' da caní, na' gulé'e Jesús:

—Guná' xque ca dxelún benne' ca' dxusédenú', dxelune' zrin da quebe naca chee' xelune' lu zra dxupá'anadxu.

³Jesús guzre' benne' ca':

—¿Quebe ne gulábale le'e ca ben David gate na' le', ne benne' ljwezre' ca' guledune'? ⁴Guxú'e lu xu'u chee' Dios, ne gulawe' xeta xtila lá'azxa, da quebe zaj naca chee' xelawe', le', ne benne' ljwezre' ca', san tuze bxruze ca' zaj naca chee' xelawe' na. ⁵¿Quebe ne gulábale da naxúaj na lu da bdxixruj be'e Moisés ca dxelún bxruze ca' lu xudau', dxelune' zrin chee' xudau' lu zra dxupá'anadxu, ne quebe zaj nabague' zria? ⁶Neda' dxapa' le'e, de tu da naca blaudxa ca xudau' nigá. ⁷¿Quebe ne chéajni'ile ca zéaje da naxúaj na lu xiche chee' Dios? Dxenná na: Neda' dxaca lazra' xexache lázrele le sa' ljwézrele, ne quegá gútele be xíxre'du ca' lu cugu chia'. La ba guxéajni'ile da nigá, quebe ne guzríá xile bénneache quebe zaj nabague' dul-la. ⁸Chee' le' na', neda', Benne' Gulje' Bénneache, napa' xel-la' dxenná bea dxuna' zrin chia' lu zra dxupá'anadxu.

Dxexún Jesús tu benne' zua zri ne'e

(Mr. 3.1-6; Lc. 6.6-11)

⁹Nadxa Jesús bezé'e na', na' guxú'e tu lu xu'u naga dxelúe lá'ane' Dios. ¹⁰Zua tu benne' zua zri ne'e ga na'. Benne' judío ca' gulaca lazre' xelezrelne' ájala xelune' chee' gaca xelagu zrie' chee' Jesús. Chee' le' na' gulenábene' Le':

—¿Dxunna Dios lataj xexundxu benne' we' lu zra dxupá'anadxu?

¹¹Jesús guzre' benne' ca':

—Nútezeze benne' zue' ládujla le'e, che zua tu zrila' chee', ne che bíxreba' tu xedxu situj lu zra dxupá'anadxu, ¿quebe chéaje' cheajxeléaje'-ba' xca'? ¹²Da zrendxa zaca tu benne' quez ca tu zrila'. Ca'an naca dxunna Dios lataj gundxu tu da xrlátaje lu zra dxupá'anadxu.

¹³Nadxa Jesús guzre' benne' we' na':

—Bli na'u.

Ca blí ne'e, na' bexaca na ca ne'e xetú. ¹⁴Nadxa beledxúaj benne' xudau' fariseo ca', ne gulezú lawe' dxelálaje' ájala xelune' xelútié' Jesús.

**Da gunná tu benne' bchálaje' waláz chee
Dios ca dxal-la' gaca chee Jesús**

¹⁵Gate gúquebe'e Jesús da nigá, na' bezé'e na', na' benne' zante zjácálene' Le'. Bexún Jesús xúgute benne' we' zaj zre'e ládujla benne' ca'. ¹⁶Jesús gunné xúene' benne' ca' quebe nu xululé'ene' nu naca Le'. ¹⁷Caní guca ca da gunná Isaías, benne' bchálaje' waláz chee Dios, gunné':

¹⁸Benne' nigá naque' wen zrin chia', benne' ba gucá'a.
Benne' nigá nazrí'ida', ne dxezaca ba lázre'ena' Le'.
Guzúaqueza' xichaj lázrdawe' Be' Lá'azxa chia'.
Guzenne' bénneache xúgute xezr la xu ca dxuchi'a da dxaca.

¹⁹Quebe tíl-lalequeze' bénneache, ne quebe cuézrexe'e.
Netú benne' quebe xenne' chi'e la neza.

²⁰Quebe quichje' tu xia da ba nachaj,
ne quebe xusul-le' xi' da ba dxaca wexul-la na,
ca zrindxa zra xuzúe' xel-la' dxenná bea chawe' chee'.

²¹Bénneache xúgute xezr la xu xuluxrén lázrequeze' Le'.

**Dxelenné' napa Jesús xel-la' dxenná bea chee da xriwe'
(Mr. 3.19-30; Lc. 11.14-23; 12.10)**

²²Nadxa guleché'e lau Jesús tu benne' la chul-la, benne' quebe dxaca nnie', lawe' da xu'e be' xriwe'. Jesús bexune' benne' nigá, na' bel'é'ene', ne benné'. ²³Xúgute benne' ca' belexebánene', gulenné':

—¿Naca benne' nigá Zri'ine David zra?

²⁴Gate belén benne' xudau' fariseo da nigá, na' gulenné':

—Benne' nigá dxebéaje' be' xriwe', dxuchínene' xel-la' dxenná bea chee Beelzebú, xrane be' xriwe' ca'.

²⁵Dxeque be'e Jesús ca da dxelenné', dxelé'e ljwezre', na' guzre' le':

—Lu xu'u lawe' chee gáteteze xezre, che xelaca chupa la'a benne' xu'u lawe' ca', ne bal-le' xeledíl-lalene' xezicadxé', na' wexul-la wenite xel-la' dxenná bea chee benne' ca'. Cá'anqueze che tu xezre benne', u tu cue' xrtía ljwezre xelaque' chupa la'a, ne xeledíl-lalene' le sa' ljwezre', wenítequeze xezre na', u xrtía ljwezre ca'. ²⁶Cá'anqueze, che Satanás, da xriwe', dxebéaje na ljwezre da xriwe', leze na dxexún na chupa la'a cuina na. ¿Ajazra gácaqueze nna bea na? ²⁷Le'e dxennale chia' dxebéaja' be' xriwe' ca',

dxuchíneda' xel-la' dxenná bea chee Beelzebú da xriwe'. Che naca na ca', ¿Nuzra dxúnnaqueze xel-la' dxenná bea chee benne' ca' zaj naca le'e tuze chee xelebéaje' be' xriwe' ca'? Chee le na' léqueze' dxululé'etene' nanéguele le'e. ²⁸Che neda' dxebéaja' be' xriwe' ca' dxuchíneda' xel-la' waca chee Be' Lá'azxa chee Dios, da nigá dxunna bea na ba bla' xel-la' dxenná bea chee Dios ládujla le'e.

²⁹¿Ájazra gun tu benne' chu'e lizre tu benne' wal-la chee que'e da de chee' che nédxula quebe guchéaje' ni'a na' bénnea'? Che gune' caní, na' wazéquene' que'e da de chee bénnea'.

³⁰'Nu benne' quebe dxácalene' neda', dxedábague' neda', na' benne' quebe dxexezígalene' neda', dxexúsie' na.

³¹'Chee le na' dxapa' le'e, gunité lau Dios chee bénneache xúgute dul-la zaj nabague', ne xúgute da calela da dxelenné', san che xelenné' schanni' chee Be' Lá'azxa, cabata' gunité lau Dios chee'. ³²Núteteze benne', che bi nnie' schanni' chia' neda', Benne' Gulje' Bénneache, Dios gunité lawe' chee', san che tu benne' nnie' schanni' chee Be' Lá'azxa, québequeze gunité lau Dios chee' lu xezr la xu nigá ne cá'anqueze lu xezr la xu da za za'.

Da dxun tu benne' dxule'e na ca naque'

(Lc. 6.43-45)

³³Na' gunná Jesús:

—Che naca chawe' tu xaga, dxebía na da zixre chawe', na' che naca tu xaga bize, dxebía na da zixre bize. Ca'an naca, tu xaga naca bea na ne chee da zixre da dxebía na. ³⁴Le'e, be snia ca'. ¿Ájazra gunle le'e nnele da xrlátaje che le'e nácaqueze benne' wen da calela xca'? Ca da dxedxuaj dxú'adxu naca na ca da zua na lu xichaj lázrdaudxu. ³⁵Benne' xrlátaje dxenné' da naca xrlátaje lawe' da zua da xrlátaje lu xichaj lázrdawe', na' benne' wen da calela dxenné' da calela lawe' da zua da calela lu xichaj lázrdawe'. ³⁶Neda' dxapa' le'e, lu zra guchi'a Dios, xúgute bénneache xuludé' ca da gulenné', tu tu dizra' xala da gulenné'. ³⁷Ca naca dizra' da ba gunnú', Dios guchi'e chiu', na' Le' nnáqueze' che xedxúaju' xrlátaje, u che webagu' zria.

Bénneache wen da calela ca' dxelenábene' Jesús gune' tu xel-la' waca chee xabáa

(Mr. 8.12; Lc. 11.29-32)

³⁸Nadxa bal-la benne' xudau' fariseo, ne benne' dxuluxuzájle'e da nadxixruj bea Dios gulé'e Jesús:

—Benne' Wesede, dxaca lázrentu' le'entu' chiu' gunu' tu xel-la' waca da za xabáa.

³⁹Na' guzre Jesús benne' ca':

—Bénneache wen da calela, benne' zaj naque' chupa lazre', dxelenábene' neda' guna' tu xel-la' waca da za xabáa. Quebe xelexé'equezne' tu xel-la' waca, san tuze ca da dxunna bea na ca da guca chee Jonás, benne' bchálaje' waláz chee Dios. ⁴⁰Ca guca chee Jonás, guxú'e lu le'e bela zren chunna zra chunna xela, cá'anqueze gaca chia' neda', Benne' Gulje' Bénneache, waxú'uqueza' lu xedxu ba chunna zra chunna xela. ⁴¹Benne' gulezré'e xezre Nínive welexásaqueze' lu zra guchi'a Dios gate guchi'e chee bénneache zaj zre'e na'a, na' benne' Nínive ca' xululé'ene' zaj nabaga zria benne' caní lawe' da belexebí'i lazre' benne' Nínive gate na' bchalaj Jonás dizra' chee Dios lau benne' ca', na' blaudxa ca Jonás na' naca Benne' zue' nigá. ⁴²Cá'anqueze nu'ula na' gunná be'e chalá'a naga dxedá gubizra beu' zaga ca' wexásaqueze' lu zra guchi'a Dios gate guchi'e chee bénneache zaj zre'e na'a, na' nu'ula na' gulé'ene' zaj nabaga zria benne' caní lawe' da bezé'e naga naca zítu'te chee xezr la xu nigá chee xenne' dizra' sina da bchalaj Salomón, na' blaudxa ca Salomón na' naca Benne' zue' nigá.

Ca naca chee be' xriwe' da bexú'u na tu benne'

(Lc. 11.24-26)

⁴³Na' gunná Jesús:

—Gate tu be' xriwe' dxedxuaj na tu benne', na' dxedá na lataj naga nabizre, dxexilaj na naga xezí' lazre' na, na' che quebe xezrele na, na' dxenná na lu xichaj lázrdau na: ⁴⁴“Webi'a xexá'a lizra' naga bedxúaja'.” Ca xezrín na, le'e na benne' na', naque' ca tu xu'u da naxíajlbę lu'ule na, ne nalúa na, ne nagá'ana chawe na. ⁴⁵Nadxa cheaj na cheajxezrí na xegazre be' xriwe' da zaj naca na xríwędxa ca le na, na' xúgute na dxelú'u na lu bénnea', na' naca chee benne' na' da caléladxa ca guca chee' nedxu. Cá'anqueze gaca chee bénneache wen da calela caní.

Benne' zaj naque' ca xrna Jesús, ne ca benne' biche' ca'

(Mr. 3.31-35; Lc. 8.19-21)

⁴⁶Jesús ne zue' dxuchálajlene' benne' caní gate belezrín xrne'e ne benne' biche' ca' ga na'. Gulezré'e chalé'ajla, ne

dxelaca lazre' xuluchálajlene' Jesús. ⁴⁷Nadxa tu benne' guzre' Jesús:

—Xrna'u, ne bi bichu' ca' zaj zre'e chalé'ajla. Dxelaca lazre' xuluchálajlene' Lue'.

⁴⁸Jesús guzre' benne' nigá:

—¿Núnbeale nuzra na' xrna'a, ne bi bícha'dau' ca'?

⁴⁹Nadxa ble'e Jesús benne' ca' dxusédene', dxenné':

—Benne' caní zaj naque' xrna'a, ne bi bícha'dau' ca'. ⁵⁰Caní naca na lawe' da núteteze benne' dxune' ca da dxaca lazre' Xra' zue' xabáa, benne' nigá naque' benne' bicha', ne benne' zana', ne xrna'a.

Da bsede Jesús ca da ben benne' dxaza

(Mr. 4.1-9; Lc. 8.4-8)

13 ¹Lu zra na' bdxuaj Jesús xu'u, na' xeaxdxé'e dxu'a nísadau'. ²Na' lawe' da belezraga benne' zante naga zua Jesús, guxú'e tu lu da dxedá lawe' nísadau', ne gudxé'e na'. Xúgute benne' ca' belexegá'ane' dxu'a nísadau' na'. ³Nadxa bsede Jesús benne' ca' da zante da bchálaje', dxenné':

—Tu benne' dxaza guzé'e zíaje' guza. ⁴Dxácate dxaze', bal-la bínnedu ca' xejlechaze na dxu'a neza. Na' beelé' bxínnedu ca', guláguba' bínnedu ca'. ⁵Bal-la bínnedu ca' xejlechaze na lu xiaj naga quebe dxé'teca xu. Bínnedu caní chadí gulezría na lawe' da quebe dxé'teca xu. ⁶Gate bla' gubizra, na' gulecuade na. Lawe' da quebe dxé'teca xu, na' gulebizre na. ⁷Bal-la bínnedu ca' xejlechaze na naga bezríale'e lba xeche', na' lba xeche' ca' belegula na, ne blule na da du ca' naze'. ⁸Bal-la bínnedu ca' xejlechaze na lu xu bebe, na' belúnna'e na. Bal-la xágadu ca' belunna na tu gaxúa tu tu na, na' xebal-la na belunna na ga xun tu tu na, na' xebal-la na belunna na chi dxua tu tu na. ⁹Che zua nágale, le xene.

Dxenná Jesús bizr chee na' dxuchálaje' da dxululé'e na

(Mr. 4.10-12; Lc. 8.9-10)

¹⁰Nadxa benne' ca' dxusede Jesús gulebigue' naga zue' Le', ne buluchebe' Le':

—¿Bizr chee na' dxuchálajlenu' benne' ca' da dxululé'e na?

¹¹Bechebe Jesús, dxenné':

—Dios dxunne' lataj nézele le'e da nagache ca dxenná bea Le' xabáa, san benne' caní quebe dxu'e lataj. ¹²Benne'

nape' late', Dios gunézrujdxē' le', na' gápale'e, san benne' quebe bi nape', Dios wequé'e ca da du nape'. ¹³Chee le na' dxuchálajlēna' benne' caní da dxululé'e na, lawe' da cate' dxelenné'e quebe dxelelé'ene'. Cate' dxelenne' quebe dxeléajni'ine'. ¹⁴Ca naca da dxaca chee benne' caní dxaca na ca gunná Isaías, bēnea' bchálaje' waláz chee Dios, gunné':

Da li wenle. Cate' dxenle quebe dxéajni'ile.

Da li wanná'le. Cate' dxenna'le quebe dxelé'ele.

¹⁵Caní naca na lawe' da zaj naca lázrdau zide' benne' caní.

Quebe dxelaca lazre' xelenne'.

Dxulugácue' xiaj lawe' chee quebe xelelé'ene'.

Quebe dxelenne', na' quebe dxeléajni'ine'.

Quebe dxelexílaje' neda' chee xexuna' le'.

¹⁶Ba neza zrentē naca na chee le'e lawe' da dxelé'ele nen xiaj laule, ne dxenle nen nágale. ¹⁷Da li dxapa' le'e, benne' zante, benne' ca' buluchálaje' waláz chee Dios, ne benne' xrlátaje ca' gulaca lazre' xelelé'ene' da caní dxelé'ele le'e. Quebe belelé'ene' na. Gulaca lazre' xelenne' da caní dxénnele le'e. Quebe belenne' na.

Jesús dxuzéajni'ine' benne' ca' ca naca chee benne' dxaza

(Mr. 4.13-20; Lc. 8.11-15)

¹⁸Na' gunná Jesús:

—Le xenne ca zéaje da naca chee benne' dxaza nigá.

¹⁹Benne' dxelenne' ca naca chee Bēnea' dxenná be'e xabáa, ne quebe dxeléajni'ine' zaj naque' ca binnedu ca' xeajlechaze na dxu'a neza. Za da xriwe' ne dxugúa na ca naca dizra' da ba gulezí'e lu xichaj lázrdawe'. ²⁰Ca naca chee binnedu ca' xeajlechaze na lu xiaj, da caní dxululé'e na ca naca chee benne' ca' dxelezi'e dizra' na' du lazre'. ²¹Ca na' guca chee binnedu ca', quebe guca xuludé lue na, ne quebe guzí bea na, ca'an dxaca chee benne' caní, gate na' bi da dxelezaque', u che nu zeajnáu zi' xuzre' le' lawe' da zaj nazi'e dizra' nigá, na' dxelexebigüe'. ²²Binnedu ca' xeajlechaze na ládujla xeche' dxululé'e na ca naca chee benne' dxelenne' dizra' nigá, san dxelebé'le'e gunne xue da naca chee xezr la xu nigá, na' ca naca xel-la' gunní'a dxezí xē na benne' ca'. Xúgute da caní dxuluzaga na dizra' nigá, na' quebe dxun na da dxal-la' gun dizra' nigá lu xichaj lázrdawe'. ²³Ca naca chee binnedu ca' da xeajlechaze na lu xu bebe, da caní dxululé'e na ca naca chee

benne' ca' dxelenne' dizra' nigá, ne dxeléajni'ine' na, na' zaj naque' ca' binnedu ca' belúnnale'e na. Bal-la benne' zaj naque' ca' binnedu ca' belunna na tu gaxúa tu tu na, na' xebal-le' zaj naque' ca' binnedu ca' belunna na ga xun tu tu na, na' xebal-le' zaj naque' ca' binnedu ca' belunna na chi dxua tu tu na.

Da bchalaj Jesús ca naca chee xixre' zrinnaj da dxenná'queze na ca dxenná' xel-la' zrua' xtila

²⁴Nadxa bchalaj Jesús xetú da dxulé'e na, dxenné':

—Ca dxaca ga ni dxenná bea Dios naca na ca da guca gate tu benne' guze' binne cháwe'dau' lu xezr la xu chee'. ²⁵Gate dxelase xúgute', na' bzin tu benne' dxezré'e le', ne xeajaze' binne xixre' zrinnaj láwela zrua' xtila, na' bezé'e. ²⁶Gate na' bgula xel-la' zrua' xtila, ne bla' dau chee na, cá'anqueze bla' xixre' zrinnaj ca'. ²⁷Nadxa benne' wen zrin ca' xeajleguezre' xrane na, dxelé'e le': “Xran, guzu' binne cháwe'dau' lu xezr la xu chiu'. ¿Gazra guzá xixre' zrinnaj caní?” ²⁸Gunná xránabe': “Tu benne' dxezré'e neda' bene' da nigá.” Nadxa benne' wen zrin ca' buluchebe' le': “¿Dxaca lazru' chéajntu' cheajlépentu' xixre' zrinnaj ca'?” ²⁹Le' guzre' wen zrin ca': “Quebe gaca na. Gate na' lázrule xixre' zrinnaj ca', waláZRUTELE xel-la' zrua' xtila. ³⁰Xelegúladxa na cháwe'lla tu zren ca xecá'adxadxu zrua' xtila. Nadxa nna be'eda' benne' wen zrin ca' xelequ'é nedxu xixre' zrinnaj ca', na' xuluchéaje' xelune' tu xrúnujdu weaj chee guzédxedxu na. Nadxa xelelape' zrua' xtila na', ne xezrá chawe' na lizra'.”

Da bchalaj Jesús ca naca chee binne mostaza

(Mr. 4.30-32; Lc. 13.18-19)

³¹Nadxa bchalaj Jesús xetú da dxulé'e na, dxenné':

—Da dxaca chee benne' dxelezí' lu ne'e nna be'e Dios le' naca na ca da guca gate tu benne' guze' binne mostaza lu xezr la xu chee'. ³²Da li binne mostaza nigá naca na da bízrujdxu lawe' xúgute' binne ca'. Gate ba nagula na naca na tu xaga zrendxa lawe' xúgute' xixre' cuan. Dxaca na ca tu xaga zren naga dxelezeque' cheajlezría bxinnedu ca' xrú'uneba' lu zruze na.

Da bchalaj Jesús ca naca chee cua zichaj chee xeta xtila

(Lc. 13.20-21)

³³Nadxa bchalaj Jesús xetú da dxulé'e na, dxenné':

—Da dxaca chee benne' dxelezi' lu ne'e nna be'e Dios le' naca na ca da guca gate tu nu'ula bchixre cua zichaj chee xeta xtila lawe' chunna xaga cua zrua' xtila, na' dutē na guxasa na bliche.

Ca bchine Jesús da dxulé'e na caní

(Mr. 4.33-34)

³⁴Xúgute da caní bchálajle Jesús benne' ca', dxuchálaje' da dxululé'e na, na' quebe bchálajlene' benne' ca' che quebe bchálaje' da dxululé'e na. ³⁵Caní guca ca da gunná benne' bchálaje' waláz chee Dios, gunné':

Guchálaja' ca naca da dxulé'e na da guchálaja'.

Gul'éda' ca naca da nagache gate guzrete xezr la xu.

Jesús dxuzéajni'ine' ca naca chee da dxulé'e na chee xixre' zrinnaj da dxenná'queze na ca dxenná' xel-la' zrua' xtila

³⁶Nadxa Jesús bze' benne' ca' dizra', na' guxú'e lu xu'u.

Benne' ca' dxusede Jesús gulebigue' lau Le', na' gul'é'e Le':

—Bzéajni'i netu' da dxulé'e na ca naca chee xixre' zrinnaj da dxenná'queze na ca dxenná' xel-la' zrua' xtila.

³⁷Nadxa Jesús guzre' benne' ca':

—Bénnea' dxaze' binne cháwe'dau' nigá naque' Benne' Gulje' Bénneache. ³⁸Naga dxaze' binne nigá naca na lu xichaj lázrdau bénneache. Binne cháwe'du ca' zaj naca benne' ca' dxenná be'e Dios, na' xixre' zrinnaj ca' zaj naca na benne' ca' zaj naque' chee da xriwe'. ³⁹Bénnea' dxezré'e xrane xezr la xu na', ne xeajaze' xixre' zrinnaj naque' da xriwe' ná'queze. Zra xeelape' naca na zra bzebe chee xezr la xu nigá, na' benne' ca' xeelape' zrua' xtila na' zaj naque' gubáz chee xabáa chee Dios. ⁴⁰Ca belexequé'e xixre' zrinnaj ca', ne buluzré'e na lu xi' chee xelexze na, ca'an gácaqueze lu zra bzebe na'. ⁴¹Neda', Benne' Gulje' Bénneache, sel-la' gubáz chee xabáa chia' ca' chee xulucuae' naga nna be'a xúgute benne' ca' dxuluxrínajte' benne' xula, ne benne' ca' dxelune' da calela. ⁴²Nadxa gubáz chee xabáa ca' xuluzré'e benne' ca' dxelune' da calela lu xi' gabila naga xebezeze', ne xeláguxa'ate lazxe'. ⁴³Nadxa benne' ca' dxelune' da xrlátaje ca da dxenná be'e Dios xelácaqueze' ca gubizra naga dxenná bea Dios, Xra benne' ca'. Che le'e zua nágale, le xene.

Da dxulé'e na ca naca chee tu xel-la' gunní'a da nagache

⁴⁴Na' gunná Jesús:

—Naga dxenná bea Dios naca na ca tu xel-la' gunní'a da nagache na tu lu xezr la xu. Tu benne' bezrélene' xel-la' gunní'a nigá, na' bucaché' na. Ne zúale'e xel-la' dxebé zexíaje' xeajxétié' xúgute da nape', na' bezi'e xezr la xu na'.

Da dxulé'e na ca naca tu bga da zácale'e na

⁴⁵Na' gunná Jesús:

—Naga dxenná bea Dios naca na ca tu da dxexilaj tu benne' wete, dxexílaje' bga ca' da zaj zaca na. ⁴⁶Gate dxezrélene' tu da zácale'e, na' zexíaje' zeajxétié' xúgute da nape', na' si'e bga na'.

Da dxulé'e na ca naca tu xixruj bela

⁴⁷Na' gunná Jesús:

—Ca naca chee benne' ca' xelexú'e naga dxenná bea Dios, naca na ca tu xixruj bela, da dxuluzale' lu nísadau', na' dxelezené' zane' cue' bela. ⁴⁸Gate dxezrá xixruj na', na' benne' ca' dxelezené' bela dxelexequé'e na dxu'a nísadau', na' dxelebé'e dxelexebé'e' bela ca'. Bela chawe' ca' dxuluxuzré'e-ba' lu xcuite, na' bela xala ca' dxeledxú'une'-ba'. ⁴⁹Ca'an gaca lu zra bzebe na'. Xeledxúaj gubáz chee xabáa ca', xelexebéaje' benne' ca' dxelune' da caléla ládujla benne' xrlátaje ca'. ⁵⁰Xuluzré'e benne' ca' dxelune' da caléla lu xi' gabila, naga xebebre', ne xeláguxa'ate lazxe'.

Da zaca ca da zaj naca na da cube, ne da zaj naca na da gula

⁵¹Nadxa bchebe Jesús benne' ca', dxenné':

—¿Dxéajni'ile le'e xúgute da caní?

Benne' ca' gulenné':

—Awe', Xran.

⁵²Nadxa guzre' benne' ca':

—Gate tu benne' dxusédene' da nadxixruj bea Dios, ne nazédene' ca dxenná bea Dios, naque' ca tu benne' xrane xu'u nézene' cuéaje' da zaj naca na da cube, ne da zaj naca na da gula ládujla da nuzrá chawe'.

Jesús dxexezrine' Nazaret

(Mr. 6.1-6; Lc. 4.16-30)

⁵³Gate bexuzre bchalaj Jesús da dxulé'e na caní, na' bezé'e na'. ⁵⁴Bezrine' naga naca lazrie'. Na' guzú lawe' dxusédene' benne' ca' zaj zré'e lu xudau' chee xezre na', na' belexebanne benne' ca', gulenné':

—¿Gazra bsede benne' nigá xel-la' sina nigá? ¿Ájazra dxuné' xel-la' waca caní? ⁵⁵Benne' nigá naque' zri'ine gubizre xaga, na' naca xrne'e María. Naque' bi biche Jacobo, ne José, ne Simón, ne Judas. ⁵⁶Bi zane' zaj zue' nigá nen dxi'u. ¿Ájazra na' dxaca dxuné' da caní?

⁵⁷Chee le na' buluzúe' Jesús chalá'ala. Jesús guzre' benne' ca':

—Xúgute benne' xula dxelape' ba lál'ana tu benne' dxuchálaje' waláz chee Dios. Benne' lazrie', ne xrtia ljwezre' quebe dxelúne' ca'.

⁵⁸Jesús quebe benteque' na' xel-la' waca ca' lawe' da quebe guléajle'e chee'.

Ca gute Juan, bènea' bchue' bèneache nisa

(Mr. 6.14-29; Lc. 9.7-9)

14 ¹Lu zra na' Herodes, benne' dxenná be'e xezre ca' zaj nababa na Galilea, benne' ca naca da dxun Jesús. ²Na' guzre' bi wen zrin chee' ca':

—Benne' nigá naque' Juan, bènea' bchue' bèneache nisa. Ba bebane' ládujla benne' gate. Chee le na' nape' xel-la' waca zren nigá.

³Caní gunné' lawe' da gudela Herodes nigá Juan na', ne bchéaje' le' du xia, ne gulu'e le' lizre xia. Bene' caní ne chee Herodías, zru'ula Felipe, biche Herodes na'. ⁴Caní bene' lawe' da guzre Juan le':

—Quebe naca chiu' súalenu' nu'ula nigá.

⁵Herodes guca lazre' gutie' le', san dxezrebe' da xelún bèneache ca' lawe' da dxeléquene' naca Juan benne' dxuchálaje' waláz chee Dios. ⁶Gate bzrin zra dxezría iza Herodes, na' belune' laní chee', na' bxa'a bi nu'ula chee Herodías na', na' bezaca ba lazre' Herodes na' da dxunbe'.

⁷Chee le na' Herodes guchebe lazre' lau benne' ca' gunézruje' ca da naba bi nú'uladu na'. ⁸Lawe' da ba guzre xrnabe' lebe', na' gunabe':

—Benna nigá xichaj Juan, bènea' bchue' bèneache nisa. Gulú'u na tu lu xé'ena.

⁹Nadxa guzúa stēbe Herodes, bènea' dxenná be'e, san lawe' da ba guchebe lazre', na' benne' zaj zre'e dxágulene' le' belenne' ca', chee le na' guzre' tu benne' wen zrin chee' gunézruje' na lebe'. ¹⁰Gunná bé'ene' nu benne' guchugue'

xichaj Juan naga xu'e lizre xia. ¹¹Nadxa xeajlexrí'e xíchaje' tu lu xé'ena, ne bulunézruje' na bi nú'uladu na', na' lebe' bnézrujbe' na xrnabe'.

¹²Nadxa belezrín benne' ca' bsede Juan, na' belexú'e le', ne xeajlecaché' le'. Nadxa xjaque' xeajleguezre' Jesús.

Dxugagu Jesús chi xun gaxúa benne' biu

(Mr. 6.30-44; Lc. 9.10-17; Jn. 6.1-14)

¹³Gate ben Jesús da na', na' bezé'e na', bexu'e tu lu da dxedá lawe' nísadau', na' bzrine' tu naga quebe nu zra' benne'. Gate belén bénneache, na' gusiá'que' ni'e, na' belezrine' naga zua Jesús. ¹⁴Gate bedxúaj Jesús lu da dxedá lawe' nísadau', na' blé'ene' benne' zante, ne bexache lazre' le', na' bexune' benne' ca' quebe chawe' zaj zué'. ¹⁵Gate ba za xrinne, benne' ca' dxusede Jesús gulebigue' lau Le', dxelenné':

—Lataj nigá quebe bi de, ne ba dxedé zra. Bze benne' caní dizra' chee chjaque' xézredu ca', ne xelexí'e da xelawe'.

¹⁶Jesús guzre' le':

—Quebe dxun na ba xen chjaque'. Le gunezruj le'e da xelawe'.

¹⁷Benne' ca' gulé'e Le':

—Gáxxuze xeta xtila de cheedxu nigá, ne chúpaze bela.

¹⁸Jesús guzre' benne' ca':

—Le gunna na nigá.

¹⁹Nadxa gunná bé'ene' gulebé' benne' zan ca' lawe' zrie. Guqu'é'e xeta xtila, ne bela ca', na' gunné'e xabaala, ne guzre' Dios: "Xcalenu'." Nadxa bzúzruje' xeta xtila, ne bnézruje' na benne' ca' dxusédene', na' benne' ca' gulísie' na lówela benne' zan ca'. ²⁰Xúgute' gulawe', ne gulélajene'. Ca gudé na' bulusuzré'e chazrinnu ga' da bízrujdu ca' zaj nagá'ana. ²¹Benne' gulawe' na zaj naque' chi xun gaxúa benne' biu, ne quebe nu blaba nu'ula, ne bidu ca'.

Jesús dxedé' lawe' nisa

(Mr. 6.45-52; Jn. 6.16-21)

²²Nadxa gunná be'e Jesús benne' ca' dxusédene' xelu'e lu da dxedá lawe' nísadau' chee xelague' nísadau' nédxudxa ca Le' chee xelexezrine' xéchala'a nísadau' na', dxácate Le' dxuzé benne' zan ca' dizra'. ²³Ca gudé bze' dizra' benne' zan ca', na' guluéne' tu lu xi'a xeajchálajlene' Dios naga zué' tuzé'.

Gate guxrinne zua Jesús tuze' na'. ²⁴Dxácatē na' ba zeaj da na' dxedá lawe' nísadau' gachaj láwe'tē nísadau' na'. Nadxa guxasa xeajxruza chee nísadau' na', da dxutá na da dxedá lawe' nísadau' na', lawe' da dxácale'e be', ne quebe dxue na lataj sa na. ²⁵Gate gudé dxela gubiga Jesús naga zaj zre'e, zéaje' lawe' nisa. ²⁶Gate belelé'e benne' ca' dxedá Jesús lawe' nisa, na' belezrebe', na' lu xel-la' dxelezrebe gulebézrexe'e, gulenné':

—Da dxedá dxela na'.

²⁷Jesús guzre' benne' ca':

—Le gun dipa lázrele. Neda' nigá. Quebe zrébele.

²⁸Na' gunná Pedro, dxē'e Jesús:

—Xran, che Lue' na', gunná be'e xida' lawe' nisa naga zu' na'te.

²⁹Jesús guzre' le':

—Gudá xca'.

Nadxa Pedro bdxúaje' lu da dxedá lawe' nísadau', ne guzú lawe' dxezé'e lawe' nisa chee zrine' naga zua Jesús. ³⁰Gate dxeque be'ene' ca dxun be' na', na' bzrebe', ne guzú lau dxazie' lu nísadau' na'. Ca'an guca gudxezre xe'e, gunné':

—Xran, becá'a neda'.

³¹Nadxa becá'a Jesús ne'e, ne guzre' le':

—Látega dxeajlí lazru' neda'. ¿Bizr chee na' ben chupa lazru'?

³²Gate belexegüene' lu da dxedá lawe' nísadau', na' bebé' zri be' na'. ³³Nadxa benne' ca' zaj zre'e lu da dxedá lawe' nísadau' na' buluzú zribe' lau Jesús, dxelé'e Le':

—Da li nacu' Zri'ine Dios.

Jesús dxexunē' benne' wē' ca', benne' zaj zre'e lu xezre Genesaret
(Mr. 6.53-56)

³⁴Guledé' xecha la'a nísadau', na' belezrine' lu xezr la xu chee benne' Genesaret ca'. ³⁵Gate benne' ca' zaj zre'e xezre na' belexexúnbe'e Jesús, na' buludé' dizra' xezícala xézredu ca', na' guleché'e xúgute benne' wē' naga zua Jesús. ³⁶Gulata' xuene' Jesús gu'e lataj xulutá benne' ca' zra lane' naze. Xúgute benne' buluté' zra lane' belexexaque'.

Da dxuxrinnaj na bénneache

(Mr. 7.1-23)

15 ¹Nadxa benne' fariseo ca', ne benne' dxuluxuzájle'e da bdxixruj be'e Moisés, benne' ca' beledxuaje' lu xezre Jerusalén, gulebigue' lau Jesús, na' buluchebe' Le', dxelenné':

²—¿Bizr chee na' benne' ca' dxusédenu' quebe dxuluzúe' dizra' ca naca da gulún xra xrtaudxu? Quebe dxelíbequeze ne'e ca naca da zéajlentu' gate dxelawe'.

³Jesús bchebe' benne' ca', gunné':

—¿Bizr chee na' le'e quebe dxuzuale dizra' da dxenná be'e Dios? Dxunle ca naca da zéajlele. ⁴Dios gunné': "Gudapa ba lál'ana xra xrna'u." Cá'anqueze gunné': "Benne' nne' schanni' chee xra xrne'e, le gute bénnea'." ⁵Le'e dxennale waca xe tu benne' xra xrne'e: "Quebe séqueda' bi gunna' le'e lawe' da ba guchebe lazra' gunézruja' Dios xúgute da de chia'." ⁶Dxennale che tu benne' dxune' caní québedxa dxun na ba xen gácalene' xra xrne'e. Caní dxunle le'e, dxuzuale chala'ala da bdxixruj be'e Dios, chee gunle ca naca da zéajlele. ⁷Le'e, láweze dxunle da xrlátaje. Da li naca da gunná Isaías, bénnea' bchálaje' waláz chee Dios, ca naca chee le'e, gunné':

⁸Benne' caní dxelape' neda' ba lál'ana nen dxú'aze'.

Quebe dxelape' neda' ba lál'ana dute lázrdawe'.

⁹Dácheze naca dxelúe lál'ane' neda'.

Da gulenná be'ene' bénneache naca na da ca' dxulusédene'.

¹⁰Nadxa Jesús gunné' benne' ca', dxenné':

—Le xene, ne le chéajni'i. ¹¹Da dxu'u na dxu'a bénneache quegá le na guxrinnaj na bénneache. Da dxedxuaj na dxu'a bénneache naca na da dxuxrinnaj na bénneache.

¹²Nadxa benne' ca' dxusede Jesús gulebigue' lau Le'. Dxelé'e Le':

—¿Nézenu' gulaca tula benne' xudau' fariseo ca' gate belenne' da gunnáu'?

¹³Jesús guzre' benne' ca':

—Bíteteze xágadau' da quebe guza Xra' zue' xabáa, welépeda'. ¹⁴Le gusán benne' ca'. La chul-la zaj naque', ne dxulusi'e neza le sa' ljwezre' la chul-la ca'. Che tu la chul-la che'e le sa' ljwezre' la chul-la, dxúpate' xelebixre' tu lu xedxu.

¹⁵Nadxa Pedro guzre' Jesús:

—Bzéajni'i netu' ca naca chee da dxulé'e nigá.

¹⁶Gunná Jesús:

—¿Cá'anqueze le'e quebe dxéajni'ile? ¹⁷¿Quebe nézele xúgute da dxu'u na dxú'adxu zeaj na le'edxu, na' te na' xedxuaj na? ¹⁸Da dxedxuaj na dxú'adxu naca na da za' lu xichaj lázrdaudxu. Da nigá naca na da dxuxrinnaj na bénneache. ¹⁹Lu xichaj lázrdau bénneache dxeledxuaj da dxezá lazre' da calela,

ca naca xel-la' wete benne', ne ca naca xel-la' zualē zru'ula benne' xula, ne ca naca da sban da dxelún bēneache, ne ca naca xel-la' gubán, ne xel-la' wen lazre', ne xel-la' wetupa dizra' bizruj. ²⁰Da caní dxuluxrinnaj na bēneache. Che tu benne' quebe dxexibe ne'e ca da zéajle gate dxawe' xeta, da nigá quebe dxuxrinnaj na le'.

Tu nu'ula zitu' dxéajle'e chee Jesús

(Mr. 7.24-30)

²¹Nadxa bedxuaj Jesús na', zexíaje' chala'a naga zaj nababa xezre Tiro, ne xezre Sidón. ²²Tu nu'ula Canaán zue' na' ze'e dxebezre xe'e cúzrela Jesús, dxenné':

—Xran, Zri'ine David, bexache lazre' neda'. Xu'ube' be' xriwe' zri'ina' nu'ula, ne cáтитега dxezácabe'.

²³Quebe bi bechebe Jesús. Nadxa belezrín benne' ca' dxusédene', ne gulata' xuene' Le', gulé'e Le':

—Bsel-la nu'ula nigá lawe' da ze'e dxebezre xe'e cúzrudxu.

²⁴Nadxa gunná Jesús:

—Dios gusel-le' neda' gácaleza' benne' Israel ca' zaj naque' ca zríla'du ca' zaj naníteba'.

²⁵Gubiga nu'ula na' naga zua Jesús, ne bzu zribe' lau Le', ne dxe'e Le':

—Xran, gúcale neda'.

²⁶Jesús guzre' le':

—Quebe naca xrlátaje cá'adxu da dxelagu zrí'inedxu, chee gunézrujdxu na bécudu ca'.

²⁷Nadxa nu'ula na' guzre' Jesús:

—Awe', Xran, san bécudu ca' dxeláguquezeba' da bízrujdu ca' dxelexruj zran naga dxelagu xránaba'.

²⁸Nadxa Jesús guzre' le':

—Nú'uladu, da zrente naca xel-la' dxeajlí lazre' chiu'. Gaca ca dxaca lazru'.

Lu zra ná'queze bexaca zrí'ine' nú'uladu na'.

Jesús dxexuné' benne' zanté benne' we'

²⁹Jesús guz'é'e na', gudé'e dxu'a nísadau' chee Galilea. Guluéné' tu lu xi'a, ne gudx'é'e na'. ³⁰Benne' zan belezrine' naga zua Jesús, zaj naché'e benne' zrinnaj ca', ne benne' la chul-la ca', ne benne' quebe dxaca xelenné', ne benne' zan zaj nadxugu ni'a na', ne zánedxa benne' we'. Buluzré'e benne' ca'

lau Jesús, na' Le' bexuné' le'. ³¹Ca'an guca belexebane benne' ca' gate belelé'ene' dxelenné' benne' ca' quebe guca xelenné' nédxula, ne belexexaca benne' ca' gulaque' benne' ni'a na' dxugu, ne dxeledá benne' ca' gulaque' benne' zrinnaj, ne dxelelé'e benne' ca' gulaque' benne' la chul-la. Gulezú lawe' dxelúe lá'ane' Dios chee benne' Israel ca'.

Jesús dxugawe' tapa cue' tu gaxúa benne' biu

(Mr. 8.1-10)

³²Nadxa Jesús gunné' benne' ca' dxusedene'. Dxe'e le':

—Dxexache lazra' chee benne' caní lawe' da ba zej chunna zra zralene' neda' nigá, ne quebe bi de da xelawe'. Quebe dxaca lazra' xesel-la' le' chee cheajxaque' lizre' quebe ne xelawe' chee quebe xelate ni'a ne'e la neza.

³³Nadxa benne' ca' dxusede Jesús gulé'e Le':

—¿Ajazra guntu' zrélentu' da xelagu cátiṭe benne' zan caní? Lataj nigá quebe nu chilá' benne' zua lizre' nigá.

³⁴Jesús bchebe' benne' ca', dxenné':

—¿Bal-la xeta xtila nápa'e?

Benne' ca' belexechebe':

—Gazre na, ne xetú chupa béladau'.

³⁵Nadxa Jesús gunná bé'ene' benne' zan ca' xelebé'e lu

xu. ³⁶Guqué'e da gazre xeta xtila, ne béladu ca', na' guzre' Dios: “Xcalenu'.” Nadxa bzúzruje' na, ne bnézruje' na benne' ca' dxusedene', na' benne' ca' gulísie' na chee benne' zan ca'.

³⁷Xúgute' gulawe', ne belélajtene'. Gudé na' bulusuzrate' gazre ga' da bízrujdu ca' zaj nagá'ana. ³⁸Benne' gulagu zaj naque' tapa cue' chi gaxúa benne' biu, ne quebe nu blaba nu'ula, ne bidu ca'. ³⁹Gudé na' Jesús bze' benne' zan ca' dizra', na' bexu'e lu da dxedá lawe' nísadau' zexíaje' naga nababa xezre Magdala.

Dxelenabe' Jesús guné' tu xel-la' waca chee xabáa

(Mr. 8.11-13; Lc. 12.54-56)

16 ¹Benne' xudau' fariseo ca', ne benne' xudau' saduceo ca' xjaque' naga zua Jesús chee xuluxunéguene' Le'. Chee le' na' gulenabe' Jesús guné' tu xel-la' waca zrente da za xabáa. ²Jesús bechebe' benne' ca':

—Xelate' zua gubizra dxennale le'e: “Gun chawe' wxre lawe' da da' beuj xrna zran xabáa.” ³Che zílala dxennale: “Quebe chawe' gun na'a zra lawe' da dá'le'e beuj xrna zran xabáa.” Le'e

dxulé'e cuínale da quebe nácale. Dxácaqueze dxennale ca naca da gun zran xabáa. Quebe dxaca xuzájla'ale ca sa'yeaj da dxaca na'a zra. ⁴Benne' wen da calela caní, benne' zaj nabéaj xíchaje' Dios, dxelenabe' guna' tu xel-la' waca zrente. Quebe xeledé'ene' xetú xel-la' waca. Weledé'ene' tuze da gaca na ca da guca chee Jonás.

Nadxa bulucá'ana Jesús benne' ca', zjá'aque'.

Da dxelún benne' xudau' ca' da naca na ca cua zichaj chee xeta xtila

(Mr. 8.14-21)

⁵Gate benne' ca' dxusede Jesús guladé' xechalá'a nísadau', na' gulal-la lazre' xelu'e chizre'. ⁶Jesús guzre' le':

—Le nna'xque. Le guxúe cuínale ca naca chee cua zichaj chee xeta xtila chee benne' fariseo ca', ne chee benne' saduceo ca'.

⁷Benne' ca' dxusede Jesús gulezú lawe' dxelé ljwezre':

—Caní dxenné' lawe' da quebe núadxu xeta xtila.

⁸Jesús dxeque be'ene', na' guzre' le':

—¿Bizr chee na' dxennale naca na lawe' da quebe núale xeta xtila? Láteze dxéajlele chia'. ⁹¿Quebe ne chéajni'ile, ne quebe dxeajsá lázrele chee da gazxu' xeta xtila da bgawa' gazxu' cue' chi gaxúa benne' biu, ne bal-la ga' becá'ale?

¹⁰¿Quebe dxeajsá lázrele chee da gazre xeta xtila da bgawa' tapa cue' chi gaxúa benne' biu ca', ne bal-la ga' becá'ale?

¹¹¿Ajazra na' quebe dxeque be'ele quegá bchálaja' chee xeta xtila gate gunnía' le guxúe cuínale ca naca chee cua zichaj chee xeta xtila chee benne' fariseo ca', ne chee benne' saduceo ca'?

¹²Nadxa guleque bé'ene' quegá guzre Jesús le' xuluxúe cuine' chee da naca cua zichaj chee xeta xtila, san ca naca da dxulusede benne' fariseo ca', ne benne' saduceo ca'.

Pedro dxenné' Jesús naque' Cristo

(Mr. 8.27-30; Lc. 9.18-21)

¹³Gate bzrin Jesús naga nababa xezre Cesarea da ben Filipino, na' bchebe' benne' ca' dxusedene':

—¿Nuzra na' dxelenná bènneache naca' neda', Benne' Gulje' Bénneache?

¹⁴Na' benne' ca' gulenné':

—Bal-la benne' dxelenné' nacu' Juan, bènea' bchue' bèneache nisa. Xebal-le' dxelenné' nacu' Elías, na' xebal-le' dxelennáqueze' nacu' Jeremías, u xetú benne' bchálaje' waláz chee Dios.

¹⁵Nadxa guzre Jesús benne' ca':

—¿Gazra le'e? ¿Nuzra na' dxennale naca'?

¹⁶Gunná Simón Pedro:

—Lue' nacu' Cristo, Zri'ine Dios ban.

¹⁷Bechebe Jesús:

—Ba neza zren naca na chiu' Simón, zri'ine Jonás. Netú benne' quebe ne gulé'ene' lue' da nigá, san Xra' zua xabáa, Le' blé'ene' lue'. ¹⁸Neda' dxapa' lue', nacu' Pedro, da zéaje na tu xiaj, na' lawe' xiaj xre nigá guzúa' benne' xeleajlí lazre' neda', na' xel-la' dxenná bea chee da xriwe' quebe seque na gucu'uj na benne' ca'. ¹⁹Neda' gunna' lue' da naca na zren xia chee xel-la' dxenná bea chee xabáa, na' da guchéaju' lue' lu xezr la xu nigá gaca na da ba nadxéajqueze na xabáa, na' da xesezru' lue' lu xezr la xu nigá gaca na da ba naxézrequeze na xabáa.

²⁰Nadxa Jesús gunná bé'ene' benne' ca' dxusédené' chee quebe nu xel'é naca Le' Cristo.

Jesús dxuchálaje' ca gaca gate gatie'

(Mr. 8.31—9.1; Lc. 9.22-27)

²¹Lu zra ná'queze guzú lau Jesús dxuzéajni'ine' benne' ca' dxusédené' dxal-la' xexíaje' xezre Jerusalén, na' benne' gula ca', ne benne' xíchaje ca' chee bxruze ca', ne benne' dxuluxuzájlé' da nadxixruj bea Dios wulusaca zi'e Le'. Na' guzre' benne' ca' dxusédené' welute benne' Jerusalén ca' Le'. Nadxa gate gaca chunna zra xebane'.

²²Nadxa Pedro gulé'aje' Jesús chalá'ala, ne guzú lawe' dxedil-le' Le', dxenné':

—Dios quebe gu'e lataj, Xran. Cabata' gaca chiu' da caní.

²³Jesús bexéchaje', na' guzre' Pedro:

—Gucuasa cuita' neda', lue', da xriwe', lawe' da nacu' tu da dxusunegue na neda'. Quebe dxulaba lazru' ca dxun Dios. Ca dxun bèneache dxulaba lazru'.

²⁴Nadxa Jesús guzre' benne' ca' dxusédené':

—Che nu benne' dxaca lazre' gaque' neda' tuze, dxal-la' guzú' chalá'ala da naca chee', ne guzúa cuine' chee gatie', na' nadxa gaca xídalene' neda'. ²⁵Bènea' dxaca lazre' gapa chi'e xel-

la' nabán chee' gunitie' na. Bénnea' gunitie' xel-la' nabán chee' lawe' da dxune' zrin chia', benne' nigá zrué'ene' xel-la' nabán du lazre'. ²⁶¿Bízraqueze ba neza naca na chee tu benne' che gata' chee' xúgute xel-la' gunní'a da de lu xezr la xu nigá, na' cuía xi'e lau Dios? Quebe bi gaca quizruj tu benne' chee la benne'du xu'e lau Dios. ²⁷Neda', Benne' Gulje' Bénneache wida' xecha lasa nen xel-la' szren chee Xra', ne nen gubáz chee xabáa ca'. Nadxa xuzría chee tu tu benne' ca naca da zaj nun tu tue'. ²⁸Da li dxapa' le'e, bal-la benne' zaj zre'e nigá quebe xelatie' cadxa xeledé'ene' neda', Benne' Gulje' Bénneache, xida' xedajnná be'a.

Dios dxuché'e ca dxenná' lau Jesús

(Mr. 9.2-13; Lc. 9.28-36)

17 ¹Ca gudé guca xrupa zra, na' Jesús guché'e Pedro, ne Jacobo, ne Juan, bi biche Jacobo, na' bi cá'aze xjácálené' Le' tu lau xi'a sibe. ²Na' Dios bche'e ca dxenná' lau Jesús lówela benne' ca'. Lawe' guca tite na ca gubizra, na' zra lané' guca na da chiche ca xel-la' naxaní'. ³Na' benne' caní belelé'ene' Moisés, ne Elías, benne' gulezrá' gate nate, dxuluchálajlene' Jesús. ⁴Nadxa Pedro guzre' Jesús:

—Xran, cháwe'le'e zúadxu nigá. Che dxaca lazru', guntu' chunna xu'u lágadau', tu chiu', ne tu chee Moisés, ne tu chee Elías.

⁵Dxácate dxenné Pedro, bla' tu beuj da dxaca tite na, da gucu na benne' ca', na' lu beuj na' belenne' chí'i Dios, dxenné':

—Benne' nigá naque' Zri'ina' nazrí'ite' lazra', ne chee Le' dxezaca ba lazra'. Chee Le' le xene.

⁶Gate belenne' da nigá, na' gulate' sudxú'ala lu xu.

Dxelezrébele'e. ⁷Nadxa Jesús gubigue' naga zaj zre'e, na' bte' benne' ca', ne guzre' le':

—Le chasa. Quebe zrébele.

⁸Gate na' belenné'e, québedxa nu belelé'ene'. Tuze Jesús zue'.

⁹Nadxa gate dxelexexétaje' lu xi'a na', Jesús gunná bé'ene' benne' ca', dxenné':

—Quebe nu guchálajlele ca da ble'ele ca zrindxa zra neda', Benne' Gulje' Bénneache, xebana' ládujla benne' gate.

¹⁰Nadxa benne' ca' dxusede Jesús buluchebe' Le':

—¿Bizr chee na' dxelenná benne' ca' dxuluxuzájle'e da nadxiruj bea Dios dxun na ba xen xelá' Elías nédxudxa ca xelá' Cristo?

¹¹Jesús guzre' benne' ca':

—Da li xelá' Elías nédxudxa, ne gucá'ana chawe' ca naca da dxal-la' gaca. ¹²Neda' dxapa' le'e, ba bla' Elías, na' benne' ca' quebe belexúnbe'e le'. Bulusaque' le' cáteze da gulaca lazre'.

Cá'anqueze xulusaque' neda', Benne' Gulje' Bénneache.

¹³Nadxa benne' ca' dxusede Jesús guléque be'ene' dxuchalaj Jesús ca naca chee Juan, bénnea' bchue' bénneache nisa.

Jesús dxexune' tu bi biu dxe'ebe' chuna'

(Mr. 9.14-29; Lc. 9.37-43)

¹⁴Gate belezrine' naga zaj zra' benne' zante, na' tu benne' gubigue' naga zua Jesús, ne bzu zribe' lau Le', dxenné':

¹⁵—Xran, bexache lazre' zri'ina', dxe'ebe' chuna', ne da zrente da dxezácabe'. Zánete' lasa ba xeajcházebe' lu xi', ne lu nisa. ¹⁶Ba bedajgu'a-be' lau benne' caní dxusédenu', na' quebe guca xelexune'-be'.

¹⁷Jesús bechebe':

—Le'e, benne' wen chupa lazre', ne benne' lázrdau zide'. ¿Bátate zúalena' le'e? ¿Bátate naca' zren lazre' nen le'e? Le cheajxrí' bi cuide' na' nigá.

¹⁸Nadxa Jesús gudil-le' be' xriwe' na', na' bebéaje' na lu bel-la' dxen chee bi cuide' na', na' zra ná'queze bexácatebe'.

¹⁹Gudé na' benne' ca' dxusede Jesús gulenné' Le' chalá'ala, na' buluchebe' Le':

—¿Bizr chee na' quebe guca netu' xebéajntu' be' xriwe' na'?

²⁰Jesús guzre' benne' ca':

—Lawe' da naca láteze ca dxéajlele chia'. Da li dxapa' le'e, che la nápaie xel-la' dxeajlí lazre', lácala naca na láteze ca naca tu bínnedau' chee mostaza, waca xeje xi'a nigá: “Gucuasa nigá chéaju' xetú lataj”, na' xi'a na' wacuasa na. Quebe bi de da quebe gaca gunle che nápaie xel-la' dxeajlí lazre'. ²¹Ca naca be' xriwe' caní, dxun na ba xen guchálajlele Dios, ne gunle gubasa chee séquele xebéajle be' xriwe' caní.

Jesús dxuchálaje' xecha lasa ca gaca gate gatie'

(Mr. 9.30-32; Lc. 9.43-45)

²²Dxácate' na' dxeledé' naga nababa Galilea, Jesús guzre' benne' ca':

—Neda', Benne' Gulje' Bénneache wadéa' lu na' bénneache.

²³Xelútie' neda', na' gate gaca chunna zra, xebana'.

Gate belenne' dizra' nigá, na' bewil'ine lázrele'ene'.

Da dxuluchízruje' bèneache chee xudau'

²⁴Gate Jesús ne benne' ca' dxusédene' belezrine' lu xezre Capernaum, na' benne' dxuluchízruje' chee xudau' belezrine' lau Pedro, na' buluchebe' le':

—¿Quebe dxizruj benne' dxusédene' le'e chee xudau'?

²⁵Pedro bechebe':

—Awe'. Dxízruje' na.

Nadxa, gate na' guxú'u Pedro lu xu'u, guzre Jesús le':

—¿Aja dxéquenu', Simón? ¿Nuzra na' dxuluchizruj lazruj chee xezr la xu benne' ca' dxelenná bea lu xezr la xu nigá? ¿Dxuluchízruje' benne' waláxr chee', u benne' zitu' ca'?

²⁶Bechebe Pedro:

—Benne' zitu' dxuluchízruje'.

Jesús guzre' le':

—Na' benne' waláxr chee' quebe xelízruje'. ²⁷Na'a, chee quebe nu guchá'adxu, guxíaj lu nísadau' na', ne guchize da na' dxeláleu' bela lu nisa na', na' bebéaj bela nedxu quelu'-ba'. Dxú'aba' na' xezrelnu' tu dumí da quízruju' chiu' lue', ne chia' neda'. Bia na, ne xeajtizruj na lau benne' ca'.

Nu benne' nácadxa blau xabáa

(Mr. 9.33-37; Lc. 9.46-48)

18 ¹Tu lasa gulebiga benne' ca' dxuséde Jesús naga zue', na' buluchebe' le':

—¿Nuzra benne' nácadxé' blau naga dxenná bea Dios?

²Nadxa Jesús gunné' tu bidau', na' bze'-be' lau benne' ca' dxusédene'. ³Dxenné':

—Da li dxapa' le'e, che quebe xexácale ca bidu nigá, québequeze chu'ule naga dxenná bea Dios xabáa. ⁴Ca'an naca, benne' nácadxé' blau naga dxenná bea Dios xabáa, naca benne' gaque' dxexruj lazre', ne xexaque' ca bidu nigá. ⁵Benne' gape' ba lál'ana tu bidau' caní lu La' neda', néda'queza' gape' ba lál'ana.

Ca naca da dxun na gundxu dul-la

(Mr. 9.42-48; Lc. 17.1-2)

⁶Na' gunná Jesús:

—Núteteze benne' gune' gun tu bidu caní dul-la, bi dxeajlí lázrebe' neda', cháwela guchéajladxu lbe'e tu xiaj zi'i da

dxutu, na' cheajchú'unadxu le' situj lu nísadau'. ⁷Edxugúa bēneache lawe' da déle'e da dxun na xelún bēneache dul-la. Tu gátazqueze da caní, na' edxugúa bēneache dxelune' xelún bēneache dul-la. ⁸Chee le na', che na'u u ni'u dxun na gunu' dul-la, guchugu na, ne gudxú'una na zitu'. Cháwedxa xexú'u lu xel-la' nabán li lazre' nadxugu ni'u u na'u, quézcala xelegú'e lue' lataj ba xa', zua dxúpatē na'u, ne dxúpatē ni'u. ⁹Che xiaj lau' dxun na gunu' dul-la, guleaj na, ne gudxú'una na zitu'. Wenla chu'u lu xel-la' nabán li lazre' nen tuze xiaj lau', quézcala xelegú'e lue' lu xi' gabila, zua dxúpatē xiaj lau'.

Da dxulé'e na ca naca chee zrila' naníteba'

(Lc. 15.3-7)

¹⁰Na' gunná Jesús:

—Gutu guzú' chalá'ala netú bidu caní. Neda' dxapa' le'e, zaj zra' gubáz chee xabáa chee bidu caní lau Xra' xabáa. ¹¹Neda', Benne' Gulje' Bēneache, bla'a bedajselá' benne' zaj nanitie'.

¹²¿Ájazra dxéquele le'e? Che tu benne' nape' tu gaxúa zrila', na' nite tuba', ¿quebe gucá'ane' be tápalalaj chēnu na' le'e xixre', na' cheajdilje' zrila' na' naníteba'? ¹³Gate ba bezrelne'-ba', wabéle'edxene' chee be tu na' quézcala chee be tápalalaj chēnu ca' quebe guleníteba'. ¹⁴Cá'anqueze Xrale le'e, zue' xabáa, quebe dxaca lazre' nite netú bidu caní.

Ca dxal-la' gunite laudxu chee le sa' ljwézredxu

(Lc. 17.3)

¹⁵Na' gunná Jesús:

—Che bi bichu' dxunbe' chiu' da calela, bchálajle tuze lebe', chee xúnbeabe' da calela da benbe'. Che xenbe' da dxu'u-be', na' ba bexacu' tuze bi bichu'. ¹⁶Che quebe xenbe' da dxu'u-be', guché' tu chupa benne' chee gaca chupa u chunna benne' xelexechebe' ca naca da dxu'u-be'. ¹⁷Che quebe xenbe' chee benne' ca', guzre ca naca benne' dxelezraga lu xudau'. Che quebe xenbe' chee benne' ca', le guzúa-be' ca tu benne' quebe dxéajle'e chee Dios, u ca tu benne' dxuchízruje' waláz chee benne' zitu' ca'.

¹⁸'Da li dxapa' le'e, da guchéajle lu xezr la xu nigá, naca na da ba nadxéajqueze na xabáa, ne da xesézrele lu xezr la xu nigá naca na da ba nazézrequeze na xabáa.

¹⁹'Cá'anqueze dxapa' le'e, che chúpale le'e gácale tuze ca da návale Dios, na' Xra' zua xabáa gunne' na. ²⁰Naga zaj

zra' chúpabe', u chúnna'be' zaj nazrágabe' lu La' neda', na' zúaqueza' neda' laduj lebe'.

²¹Nadxa Pedro bchebe' Jesús:

—Xran, che bi bícha'dau' gunbe' chia' da calela, ¿bal-la lasa dxun na ba xen gunite lawa' cheebe'? ¿Gazre lasa?

²²Bechebe Jesús:

—Dxapa' lue', quegá gazre lasa, san ga xun chi da gazre lasa.

**Benne' wen zrin quebe guca lazre' gunite
lawe' chee le sa' ljwezre'**

²³Na' gunná Jesús:

—Da gaca naga dxenná bea Dios xabáa naca na ca da guca gate tu benne' dxenná bea guca lazre' gucá'ana chawe' da dxelal-la benne' wen zrin chee'. ²⁴Gate guzú lawe' dxucá'ana chawe' na, na' guleché'e lau le' tu benne' dxebague' chee' zane' cue' chi gaxúa dumí. ²⁵Lawe' da quebe de chee benne' wen zrin na' da quízruje' xrané', na' gunná be'e xrané' ta'u benne' wen zrin na', ne zru'ule', ne zrí'ine' ca', ne ca nácaqueze da nape', chee gazruj da na' dxebague'. ²⁶Nadxa bzu zribe benne' wen zrin na' lau xrané', na' guta' xuene' le', dxenné': “Xran, ben zren lazre' neda', na' quízrujqueza' ca naca na.” ²⁷Na' xrané' bexache lazre' le', ne bnite lawe' da na' dxebague' chee', ne bsané' le'. ²⁸Gate benne' wen zrin na' bedxúaje', na' bezrague' xetú benne' wen zrin ljwezre', benne' dxebague' chee' látadau'. Na' gudele' lba bénnea', ne guzú lawe' dxuséxuje' chi'i bénnea', dxé'e le': “Gudizruj neda' da dxal-lu' chia'.” ²⁹Nadxa benne' wen zrin ljwezre' na' bzu zribe' lau le', ne guta' xuene' le', dxenné': “Ben zren lazre' neda', na' quízrujqueza' ca naca na.” ³⁰Bénnea' quebe guca lazre', na' guxíaje' xejlu'e wen zrin ljwezre' na' lizre xia dxácate quízruje' da na' dxebague'. ³¹Gate benne' wen zrin ca' xezícala guleque bé'ene' da nigá, na' belewí'ine lázrele'ene', na' xjaque' xejleguezre' xrané' xúgute da ba guca. ³²Nadxa xrané' na' gunná bé'ene' xejlenné' benne' wen zrin na', na' guzre' le': “Bi wen zrin calela. Neda' bnite lawa' chiu' ca naca da na' dxebagu' chia' lawe' da guta' xúenu' neda'. ³³Cá'anqueze lue' dxal-la' xexache lazru' le sa' ljwezru' na' ca bena' neda' bexache lazra' lue'.” ³⁴Xrané' na' bzrá'ale'e bénnea', na' bdee' le' xel-la' zi' dxácate na' quízruje' ca naca da na' dxal-le' chee'.

³⁵Nadxa gunná Jesús:

—Cá'anqueze gun Xra' zua xabáa chee le'e che quebe gunité laule duté lázrdaule chee le sa' ljwézrele.

Da bchalaj Jesús ca naca chee benne' dxulusán ljwezre'

(Mr. 10.1-12; Lc. 16.18)

19 ¹Ca gudé bchalaj Jesús da caní, na' bezé'e xezre ca' zaj nababa Galilea, na' bezrine' chalá'ala naga nababa Judea, da zua chalá'ala xegu Jordán naga dxalaj gubizra.

²Benne' zan zjácalene' Le', na' bexune' benne' zante, benne' we'.

³Nadxa bal-la benne' xudau' fariseo gulebigue' naga zua Jesús chee xelebéaje' Le' dizra' chee gaca xelagu zrie' Jesús, na' buluchebe' Le':

—¿Waca nu benne' gusané' zru'ule' ne chee bíteteze da gune'?

⁴Bechebe Jesús:

—¿Quebe ne gulábale le'e lu xiche lá'azxa da na' dxenná na: “Benne' bene' benne' ca' nédxudaute bene' le' benne' biu, ne nu'ula”? ⁵Cá'anqueze gunné': “Chee le na' benne' biu gusané' xra xrne'e chee gaque' tuze nen zru'ule', na' dxupe' xelaque' ca tuze benne'.” ⁶Caní naca na, québedxa zaj naque' chupe', san tuze benne' zaj naque'. Chee le na' quebe dxal-la' xelá'a bèneache da na' ba nuchaga Dios.

⁷Nadxa buluchebe' Jesús:

—¿Bizr chee na' gunná be'e Moisés nu benne' gunézruje' zru'ule' tu xiche da dxulé'e na belexelé'e, na' gusané' le'?

⁸Jesús guzre' benne' ca':

—Caní bene' lawe' da gulaca lazrdau zizraj xra xrtaule. Moisés benne' lataj gusanle zrú'ulale, san nédxudaute quebe guca na ca'. ⁹Neda' dxapa' le'e, che tu benne' gusané' zru'ule', ne quebe dxedálene' benne' biu xula, na' che xezúalene' nu'ula xula, benne' nigá gune' dul-la súalene' nu'ula quebe naque' zru'ule', na' che nu benne' biu xequé'e tu nu'ula nusán benne' chee', cá'anqueze gun dul-la bènea' súalene' nu'ula quebe naque' zru'ule'.

¹⁰Nadxa benne' ca' dxusede Jesús gulé'e Le':

—Che ca' dxaca chee benne' zúalene' nu'ula, quebe dxal-la' súalentu' nu'ula.

¹¹Jesús guzre' benne' ca':

—Quegá xúgute benne' gaca xelezí'ē dizra' nigá, san tuze benne' ca' ba nun Dios chee' xelezí'ē na. ¹²Zaj zra' benne' quebe dxelezúalene' nu'ula lawe' da quebe zaj naca xánnie' benne' biu. Na' zaj zra' benne' québedxa zaj naca xánnie' benne' biu lawe' da zaj nun bēneache naca caní. Na' zaj zra' benne' dxelexegá'ane' cá'aze, quebe nu dxelezúalene' chee gaca xelune' zrin chee Dios, Bēneea' dxenná be'ē xabáa. Benne' gaca si'ē dizra' nigá dxal-la' si'ē na.

Jesús dxenabe' gaca chawe' chee' bidu ca'

(Mr. 10.13-16; Lc. 18.15-17)

¹³Nadxa belezrín benne' lau Jesús zaj naché'ē bal-la bidau' chee guzé ne'ē bidu ca', ne nabe' Dios gaca chawe' cheebe', san benne' ca' dxusede Jesús gulezú lawe' dxeledil-le' benne' ca' zaj naché'ē bidu ca'. ¹⁴Jesús guzre' le':

—Le güe bidu ca' lataj xeleda'be' naga zua'. Quebe guzrúnnale-be', lawe' da benne' zaj naque' ca bidu caní xelu'e naga dxenná bea Dios xabáa.

¹⁵Nadxa bze Jesús ne'ē lawe' bidu ca', na' gudé na' bezé'ē lataj na'.

Tu benne' cuide' nape' xel-la' gunní'a

(Mr. 10.17-31; Lc. 18.18-30)

¹⁶Tu benne' cuide' guxíaje' naga zua Jesús, na' bchebe' Le':

—Benne' Wesede chawe'. ¿Bi da xrlátaje dxal-la' guna' chee gapa' xel-la' nabán zeajlí canna?

¹⁷Jesús guzre' le':

—¿Bizr chee na' dxu'u neda', benne' wesede chawe'? Quebe nu chilá' benne' naque' chawe', san tuze Dios. Che dxaca lazru' zrué'enu' xel-la' nabán li lazre', bzua dizra' ca bdxixruj be'e Dios.

¹⁸Benne' cuide' na' gunné':

—¿Bila na'?

Jesús guzre' le':

—Quebe gutiu' benne'. Quebe súalenu' zru'ula benne' xula. Quebe cuanu'. Quebe nneu' da wen lazre' chee benne'. ¹⁹Gudapa ba lál'ana xra xrna'u. Bzri'i le sa' ljwezru' ca nazrí'i cuinu'.

²⁰Benne' cuide' na' gunné':

—Xúgute da caní dxuna' nácatea' bídau'te. ¿Bízradxa quebe ne guna'?

²¹Na' guzre Jesús le':

—Che dxaca lazru' gacu' benne' li lazre', bexíaj, xeajete ca naca da napu', ne bnezruj na benne' xache' ca'. Nadxa gapu' xel-la' gunnía' xabáa. Na' gudátega nen neda'.

²²Gate benne' cuide' na' benne' da nigá, bezé'e dxexíaje lazre' lawe' da nápal'e xel-la' gunnía'.

²³Nadxa gunná Jesús, dxé'e benne' ca' dxusédene':

—Da li dxapa' le'e, stébele'e naca chu'u tu benne' gunnía' naga dxenná bea Dios xabáa. ²⁴Da xula dxapa' le'e, chadidxa gaca te tu bea', be dxebía bénneache lu negue' tu xeche' zriche, quézcala chu'u tu benne' gunnía' naga dxenná bea Dios.

²⁵Gate belenne' benne' ca' dxusede Jesús da nigá, na' belexebánele'ene', na' buluchebe ljwezre':

—¿Nuzra la xca'?

²⁶Jesús guné'e benne' ca', ne guzre' le':

—Da nigá quebe gaca xelún bénneache, san Dios waca guné' ca naca.

²⁷Nadxa gunná Pedro:

—Xran, netu' ba bcá'anantu' ca naca da nápantu', ne zeajlentu' Lue'. ¿Bizra gápantu' xca'?

²⁸Bechebe Jesús:

—Da li dxapa' le'e, ca lu zra na' gate na' xúgute xelxaca na cube, gate neda', Benne' Gulje' Bénneache, cue'a lataj chawe' chia' naga nna be'a, le'e na' ba gudálele neda' cué'quezle lu chazrinnu lataj naga nna beale, chee guchí'ale chee chazrinnu cue' benne' Israel, benne' judío ca'. ²⁹Xúgute benne' ca' ba bulucá'ane' lizre', u benne' biche', u nu'ula zane', u xre', u xrne'e, u zru'ule', u zrí'ine', u xezr la xu chee', chee xelune' zrin chia', xelezí'queze' tu gaxúala na, ne xelezí'queze' xel-la' nabán zeajlí canna. ³⁰Benne' zante zaj naca blau na'a xelaque' benne' bzebe, na' benne' zante zaj naca benne' bzebe na'a xelaque' benne' blau.

Da dxulé'e na ca naca chee benne' wen zrin ca'

20 ¹Na' gunná Jesús:

—Da gaca naga dxenná bea Dios xabáa naca na ca da guca gate tu xrane zánete cue' xezr la xu guzé'e lizre' che zílala, zéaje' zeajtílaje' benne' wen zrin ca' chee cheajlechibe' uva chee'. ²Bca'ana cháwelené' benne' wen zrin ca' quízruje' tu dumí lazruj chee tu zra, na' gusel-le' benne' ca' zeajleguene'

zrin lu xęzr la xu cheę'. ³Ca gudé na' guzé'ę lizre' ca dxedá na, na' blé'ene' benne' zaj zre'ę lawe' xi'a zaj nalátajze'. ⁴Na' guzre' benne' ca': "Cá'anqueze le'e, le chjaca węn zrin lu xęzr la xu chia', na' gunna' le'e da naca chawe'." Na' benne' ca' xjaque'. ⁵Xrane na' guzé'ę da xula wa gubizra, ne cá'anqueze dxexedá' chunna, ne tuze ca bene'. ⁶Xetú du dxedá' gazxu' guxíaje' lawe' xi'a, na' blé'ene' zaj zra' na' benne' zaj nalátajzqueze', ne guzre' le': "¿Bizr cheę na' zrale le'e nigá bedú zra quebe bi zrin dxunle?"

⁷Gulenné': "Quebe nu ne xę netu' guntu' zrin cheę'."

'Na' guzre' benne' ca': "Cá'anqueze le'e, le cheajęn zrin lu lina chia', na' gunna' le'e da naca chawe'." ⁸Gate gul-la' chizrela, xrane na' guzre' benne' xu'u lu ne'ę zrin na': "Gunné benne' węn zrin ca', ne gudízruje', su lau' quízruju' benne' ca' belelá' bzébedxa, na' bzébetę quízruju' benne' ca' belelá' nédxute'." ⁹Nadxa belezrín benne' ca' belú'ę lu zrin na' gate dxexedadxa gazxu', na' tu tu benne' ca' belezi'ę lazruj cheę' du naxá' lazruj tu zra węn zrin. ¹⁰Gudé na' gate belezrín benne' ca' gulu'ę nédxute' lu zrin na', guléquene' xezezi'ę da zrendxa, san cá'anqueze gulezi' tu tu benne' ca' lazruj tu zra węn zrin weaj.

¹¹'Gate gulezi'ę na, na' gulezú lawe' dxelawe' zria lau xrane zrin na', ¹²dxelenné': "Benne' caní belelá' bzébedxa, tu chí'idau'ze ga belune' zrin, na' gudízrujquezu' benne' caní ca gudízruju' netu', na' netu' bedú zra bęntu' zrin, ne ca naca da la cheę zra nigá bchaga launtu'."

¹³Bechebę xrane na', dxę'ę tu benne' ca': "Ljwézra'dau', quebe bi dxuna' chiu' da quebe naca na chawe'. ¿Quebe bca'ana cháwelęna' lue' quízruja' lue' lazruj tu zra węn zrin?"

¹⁴Guzí' lazruj chiu', ne bexíaj. Neda' dxaca lazra' gunézruja' cheę benne' ca' belú'ę bzébedxa ca da gudízrujqueza' lue'.

¹⁵¿Quebe gaca guna' ca da dxaca lazra' nen dumí chia'? ¿Dxacu' xa lazre' lawe' da naca' neda' benne' xrlátaje?"

¹⁶Na' gunná Jesús:

—Ca'an naca, benne' ca' zaj naca benne' bzebe xelaque' benne' blau, na' benne' blau ca' xelaque' benne' bzebe lawe' da ba gunnía' benne' zan, san bábaze benne' ca' xelaque' blau.

Xecha lasa dxuchalaj Jesús ca gaca gate gatie'

(Mr. 10.32-34; Lc. 18.31-34)

¹⁷Gate xu'u Jesús neza, zexíaje' Jerusalén, guléaje' cheeze benne' chazrinnu ca' dxusédene', ne guzre' le':

18—Dxelé'ele le'e ba zexíajdxu Jerusalén naga neda', Benne' Gulje' Bénneache, xuludé benne' ca' neda' lau benne' xíchaję ca' cheę bxruze ca', ne lau benne' ca' dxuluxuzájle'e da bdxixruj be'e Dios, na' xelechugue' chia' gatia'. 19Xuludé' neda' lu na' benne' zitu' ca' cheę xelún le' chia', na' xelu'e neda', ne xuludé'e neda' xaga béguaj, san zra guxunne zra xebana'.

Da gunaba xrna Jacobo ne Juan

(Mr. 10.35-45)

20Nadxa gubiga xrna Jacobo, ne Juan lau Jesús, bi ca' zaj naca be' zri'ine Zebedeo, naché'e bi ca', na' bzu zribe' lau Jesús, dxenabe' culuén. 21Jesús bchebe' nu'ula na':

—¿Bi na' dxenabu'?

Nu'ula na' guzre' Jesús:

—Gate zrin zra nna be'u, na' gudxixruj be'e cue' tu zri'ina' caní chalá'a xabęla chiu', ne xetube' xéglala.

22Jesús bechebe', guzre' bi ca':

—Quebe nézele le'e bi na' dxenábale. ¿Waca xí'ajle le'e ca da xí'aja' neda', da na' naca na ca xel-la' zi' da tea' neda', ne waca si'le da naca na ca xel-la' dxedxúa nisa ca da si'a neda' gate chu'a lu xel-la' gute?

Na' gulenabe':

—Wácantu'.

23Nadxa Jesús guzre' bi ca':

—Da li xí'ajle ca da xí'aja' neda', ne si'le da naca ca xel-la' dxedxúa nisa na' da si'a neda', san da cue'le chalá'a xabęla chia', ne chalá'a xéglala chia' quebe naca na chia' gunna' na le'e. Xra' gunézruje' na cheę bi ca' ca da ba nucueze'.

24Gate xechí benne' ca' dxusede Jesús belenne' ca', na' belezré'e dxupa bi cheę nu'ula na'. 25Jesús gunné' benne' ca', ne guzre' le':

—Ba nézele le'e ca dxelún benne' xíchaję cheę xęzr la xu ca', dxelenná bé'ene' benne' ca', na' benne' nácadxę' blau ládujla benne' ca' dxelenná be'e, dxuchínene' xel-la' dxenná bea cheę'. 26Le'e quebe dxal-la' gunle ca'. Benne' dxaca lazre' gaque' blau ládujla le'e dxal-la' gune' zrin cheę xezícadxale le'e, 27na' bénnea' dxaca lazre' gaque' xíchaję cheęle, dxal-la' gaque' wen zrin cheę xúgutele le'e. 28Dxal-la' gune' ca bęna' neda', Benne' Gulje' Bénneache, quebe bida' cheę nu gun zrin

chia' neda', san bla'a chee guna' zrin chee bënneache, ne chee guzúa' xel-la' nabán chia' ca da quízruja' chee guselá' benne' zante.

Jesús dxexuné' chupa benne' la chul-la

(Mr. 10.46-52; Lc. 18.35-43)

²⁹Gate dxelexedxúaje' xezre Jericó, na' benne' zante zjácálené' Jesús. ³⁰Naga dxeledéé' zaj dxe' chupa benne' la chul-la dxu'a neza, na' gate belenne' dxedé Jesús na' gulebezre xe'e, dxelenné':

—Xran, Zri'ine David, bexache lazre' netu'.

³¹Benne' zan ca' guledil-le' dxúpaté' na' chee xelezúé' zrize, san le' gulebezre xe'e zízrajdxá, dxelenné':

—Xran, Zri'ine David, bexache lazre' netu'.

³²Nadxa Jesús guleze', na' gunné' benne' la chul-la ca', na' bchebe' le':

—¿Bi dxaca lázrele guna' cheele?

³³Belexechebe benne' ca':

—Xran, dxaca lázrentu' xelé'entu'.

³⁴Jesús bexache lazre' benne' ca', ne bté' xiaj lawé'. Na' belexelé'ete benne' la chul-la ca', na' xjácálené' Jesús.

Ca da guca gate bexú'u Jesús Jerusalén

(Mr. 11.1-11; Lc. 19.28-40; Jn. 12.12-19)

21 ¹Gate belezrín Jesús, ne benne' ca' dxusédene' gagu naga zua xezre Jerusalén, ne ba belezrine' xezre Betfagé, da zua na gagu naga zua xi'a naga zaj da' xaga olivo, na' Jesús gusel-le' chupa benne' ca' dxusédene' chee tu da xelune'. ²Dxe'e le':

—Le chjaca xézredu na' da zua le nna' nigá. Na' lé'ele tu burro bzrise' da'ba' xaga, na' tu búrrodau' zúáleba' leba'. Le sezre-ba', ne le che'e dxúpateba' nigá. ³Che nu benne' bi xe'e le'e, le xe'e: “Xránadxu nachinne' leba', na' la xesél-la'tequeze'-ba'.”

⁴Da nigá guca na chee guxá ca da gunná benne' bchálaje' waláz chee Dios, gunné':

⁵Le xe' benne' zaj zra' xezre Sión:

“Le nna', Benne' nna bé'ene' le'e ze'e naga zúale.

Duté xel-la' dxexruj lazre' zrié' tu burro bzrise'.

Zrié' tu búrrodau', zri'ine tu be dxua xua.”

⁶Nadxa dxupa benne' ca' dxusede Jesús besiá'que', ne belune' ca da ba gunná be'e Jesús le'. ⁷Xeajlexrí'e burro bzrise', ne zrí'ineba', na' belezrúe' zra lane' cúzruba', na' guzría Jesús leba'. ⁸Benne' zan ca' gulechílaje' zra lane' la neza na', na' xebal-le' buluchibe' zina' da buluzale' la neza. ⁹Benne' zjaque' lówela, ne benne' zá'aque' bzebe gulezú lawe' dxelebezre xe'e, dxeleonné':

—¡Gaca ba lál'azxa Zri'ine wenná bea David! ¡Ba neza zrente naca na chee bènnea' ze'e waláz chee Xránadxu Dios! ¡Gaca ba lál'azxa Dios!

¹⁰Gate guxú'u Jesús xezre Jerusalén, ca naca bènneache zaj zre'e na' beledxé'ena zrague', na' buluchebe ljwezre':

—¿Nuzra benne' nigá?

¹¹Bal-la benne' ca' gulenné':

—Benne' nigá naque' Jesús, benne' dxuchálaje' waláz chee Dios, ze'e xezre Nazaret da nababa Galilea.

Jesús dxuchi'e lu xudau'

(Mr. 11.15-19; Lc. 19.45-48; Jn. 2.13-22)

¹²Ca gudé na' guxú'u Jesús dxale'aj xudau' chee Dios, na' bebéaje' xúgute benne' wete, ne benne' dxelá'awe' na'. Bdxixre' blag ca' chee benne' ca' dxuluché'e dumí, ne bdxixre' da ca' zaj dxe' benne' ca' dxelúti'e bgúgudu ca'. ¹³Nadxa guzre' benne' ca':

—Lu xiche lál'azxa naxúaj da dxenná Dios: “Lizra' nigá naca na xu'u naga xelenaba bènneache lawa' neda'”, san le'e ba nunle na ca tu lizre gubán.

¹⁴Lu dxale'aj xudau' na' gulebiga lau Jesús bal-la benne' la chul-la, ne benne' zrinnaj ca', na' Le' bexune' benne' ca'.

¹⁵Belezrá' benne' xíchaje' ca' chee bxruze ca', ne benne' ca' dxuluxuzájle'e da nadxixruj bea Dios, gate na' belenne' ca dxelebezre xa'a bidu ca' lu xudau', dxeleennabe': “¡Gaca ba lál'azxa zri'ine wenná bea David!” ¹⁶Gulé'e Jesús:

—¿Dxennu' ca dxeleenná benne' caní?

Bechebe Jesús:

—Dxenda' na. ¿Quebe ne gulábale le'e lu xiche lál'azxa naga naxúaj na chee da dxaca nigá? Dxenná na caní:

Ba be'nu' xelúl-la bidu ca', ne bidu dxe'ene ca'.

Da dxelúe lál'anabe' Dios naca na da li.

¹⁷Nadxa bca'ana Jesús benne' ca'. Bezé'e xezre na', na' bezrine' xezre Betania, naga bejg'ane' xela na'.

Jesús dxugu'e de' xaga higo

(Mr. 11.12-14, 20-26)

¹⁸Che zílala ca zexíaj Jesús xezre na', na' gudunē'. ¹⁹Zítu'la blé'ene' tu xaga higo dxu'a neza, na' gate bzrine' naga zua na, quebe bi da zixre chee na blé'ene'. Lágaze zria na. Nadxa Jesús guzre' xaga higo na':

—Cabata' cuíaquezu' da zixre.

Gubízrete xaga higo na'. ²⁰Ca belelé'e benne' ca' dxusēde Jesús da nigá, na' belexebánene', ne buluchēbe' Jesús:

—¿Ájazra na' chadite gubizre xaga higo nigá?

²¹Bechebe Jesús:

—Da li dxapa' le'e, che nápa le-la' dxeajlí lazre', ne quebe gun chupa lázrele, quegaze da nigá gaca gunle ca da bēna' neda' chee xaga higo nigá, san waca xe le xi'a nigá: Gucusa nigá, xeajsúa lu nísadau', na' gaca na. ²²Che dxeajlí lázrele, na' xezi'le bíteteze da nába le Dios.

Xel-la' dxenná bea da xu'u lu na' Jesús

(Mr. 11.27-33; Lc. 20.1-8)

²³Nadxa guxú'u Jesús lu chila xudau', na' dxácate na' dxusēdenē' benne' zaj zre'e na', gulebiga naga zua Jesús benne' xíchajē ca' chee bxruze ca', ne benne' gula chee judío ca', na' buluchēbe' Le':

—¿Bi xel-la' dxenná bea napu' dxunu' da caní? ¿Núzraqueze bēna lue' xel-la' dxenná bea nigá?

²⁴Bechebe Jesús:

—Cá'anqueze neda' guchēba' le'e tu. Che xechēbele da nigá, na' neda' xapa' le'e bi xel-la' dxenná bea napa' dxuna' da caní. ²⁵¿Nu benne' gusel-le' Juan dxuchúe' bēneache nisa? ¿Dios, che bēneacheze?

Gulezú lawe' dxuluchálajle ljwezre', dxeleñné':

—Che nnadxu Dios gusel-le' le', na' xe'e dxi'u: “¿Bizr chee na' quebe guxéajle chee'?” ²⁶Che nnadxu bēneache gusel-le' le', dxal-la' zrēbedxu bi xelún benne' zan ca' cheedxu dxi'u, lawe' da dxeleque xúgutē bēneache bchalaj Juan na' waláz chee Dios.

²⁷Chee le' na' gul'é Jesús:

—Quebe nézentu'.

Nadxa Jesús guzre' benne' ca':

—Cá'anqueze neda' quebe xapa' le'e bi xel-la' dxenná bea napa' dxuna' da caní.

Da dxulé'e na ca naca chee chupa bi biu chee tu benne'

²⁸Na' guzre Jesús benne' ca':

—¿Aja dxéquele le'e chee da nigá? Tu benne' zaj zra' chupa zrí'ine' bi biu, na' guzre' tube': “Zrí'ina', guxíaj xeajén zrin lu lina chee uva chia'.” ²⁹Zrí'ine' na' bechébebe': “Quebe dxaca lazra'.” Ca gudé na' bexíaje lázrebe', na' guxíajbe' xeajénquezbe' zrin. ³⁰Cá'anqueze xrabe' na' guxíaje' xeajné'e xetube', ne guzre'-be', na' bi nigá bechébebe': “Waca, xrae. Na'a cha'a.” Quebe guxíajbe'. ³¹¿Núlabe' bi chupa caní benne' ca da guca lazre' xrabe'?

Gulenná benne' ca':

—Bi nedxu.

Na' gunná Jesús, dxé'e benne' ca':

—Da li dxapa' le'e, benne' wechizruj ca', ne nu'ula dxeledále benne' biu zante xelexú'e naga dxenná bea Dios nédxudxa ca le'e ³²lawe' da bla' Juan, bedajlé'ene' le'e da naca xrlátaje, na' le'e quebe guxéajlele chee'. Benne' wechizruj ca', ne nu'ula ca' dxeledále benne' biu zante guléajle'e chee'. Le'e, gate ble'ele da nigá, quebe bexíaje lázrele chee chéajlele chee'.

Da dxulé'e na ca naca chee benne' wen zrin calēla ca'

(Mr. 12.1-12; Lc. 20.9-19)

³³Nadxa gunná Jesús:

—Le xene ca naca da nadxixruj bea nigá. Tu benne' xrane tu xezr la xu guze' lba uva ca', ne bene' le'aj chee na. Bene' tu xedxu naga xelesíe' uva ca', ne guchise' tu xu'u sibe chee gaca nu guxúe ca naca na. Na' bca'ane' na lu na' benne' wen zrin ca', ne guzé'e zéaje' zitu'. ³⁴Gate bzrin zra xuluchibe' uva ca', na' gusel-le' tu chupa bi wen zrin chee' zeajlexezri'be' da dxal-la' xezí' xrane na'. ³⁵Benne' wen zrin ca' gulequé'e bi wen zrin chee' ca'. Belúele'e tube', ne belutie' xetube', na' xetube' buluzríe'-be' xiaj. ³⁶Nadxa xrane na' gusel-ladxé' bi wen zrin chee' bi zandxa ca nedxu. Benne' wen zrin ca' tuz ca bulusaque' bi ca'. ³⁷Naga xeajché'tequeze na gusel-le' zrí'inequeze' lawe' da dxéquene': Welape' ba lá'ana zrí'ina'. ³⁸Gate belelé'ene' zrí'ine', na' benne' wen zrin ca' gulé ljwezre': “Bi nigá xezí' lu na'be' ca naca da caní. Du gute-be'

chee xegá'ana cheedxu da caní.” ³⁹Chee le na' gulele'-be', ne belexebéaje'-be' lu xezr la xu na', na' belutie'-be'.

⁴⁰Nadxa Jesús bchebe' benne' ca':

—Gate xida xrane xezr la xu na', ¿ájazra gunē' chee benne' wen zrin ca'?

⁴¹Gulé'e Le':

—Gutie' benne' ca' dxelunē' da calela ne quebe xexache lazre' le'. Nadxa gucá'analene' xezr la xu na' benne' wen zrin xula, benne' xuluxunézruje' da dxal-la' xezí' le' gate zrin zra chee na.

⁴²Nadxa Jesús guzre' benne' ca':

—¿Quebe ne gulábale le'e xiche lá'azxa? Caní dxenná na: Xiaj na' da buluzúa benne' wen xu'u ca' chalá'ala, le na' naca na xiaj blau na'a.

Da nigá naca na da ben Xránadxu, ne naca na tu da dxexebánedxu.

⁴³Chee le na' dxapa' le'e, Dios wequé'e da naca cheele le'e naga dxenná be'e, na' gunézruje' na benne' xelunē' da naca chee xel-la' dxenná bea chee Dios. ⁴⁴Che tu benne' cheajchazie' lawe' xiaj nigá waxúzruje', na' che xexruj na lawe' tu benne', na' guzuzruj na le'.

⁴⁵Gate benne' xíchaje ca' chee bxruze ca', ne benne' xudau' fariseo ca' belenne' da bchalaj Jesús, guleque bé'ene' chee lé'queze' bchalaj Jesús da caní. ⁴⁶Gate gulaca lazre' xelele' Le', belezrebe' benne' xezre ca' lawe' da dxeléajle benne' ca' naca Jesús benne' dxuchálaje' waláz chee Dios.

Da dxulé'e na ca naca chee laní wechaga na'

22 ¹Guzú lau Jesús dxuchálajlene' benne' ca' xecha lasa tu da dxulé'e na, dxé'e le':

²—Ca da gaca xabáa naga dxenná bea Dios naca na ca da guca gate tu benne' wenná bea bene' tu laní wechaga na' chee bi biu chee'. ³Gusel-le' benne' wen zrin chee' ca' cheajletupe' benne' ca'an gunné' lizre', san benne' ca' quebe gulaca lazre' xédajgaque'. ⁴Nadxa gusél-ladxé' benne' wen zrin chee' ca', benne' xula. Dxe'e le': “Le xe benne' ca' gunnía', ba nucueza' xel-la' wagu. Ba gunná be'eda' xelútie' bezre ca', ne be dxelanne, na' ca naca na bache de. Dخال-la' xelelé'e nigá naga zra' wechaga na'.” ⁵Benne' ca' gunné' quebe gulaca lazre' xédajgaque'. Tu benne' ca' guxíaje' lu xezr la xu chee', ne xetú

benne' guxiáje' wete. ⁶Xebal-la benne' ca' gulele' bi wen zrin ca' chee wenná bea na', na' bulucháchalene'-be', ne belútete'-be'. ⁷Nadxa wenná bea na' bzrá'ale'e, na' gusel-le' benne' chee ca', benne' zjaca wedil-la xejleguétie' benne' wete benne' ca', ne xejlezéze'te' lazre' benne' ca'. ⁸Nadxa guzre' bi wen zrin chee' ca': "Bal-la bi de ba de chee wechaga na', na' benne' ca' gunnía' quebe zaj naca chee' xeledé'e. ⁹Le chjaca neza zri'a ca', ne le nne xúgute benne' lé'ele, chee xeledé'e laní chee wechaga na'." ¹⁰Benne' wen zrin ca' xjaque' la neza ca', na' xejletupe' xúgute bènneache, benne' belelé'ene' zaj naque' benne' calela, ne benne' xrlátaje. Ca'an guca guzrate xu'u na' bènneache. ¹¹Nadxa wenná bea na' guxú'e xejné'e benne' ca' gunné', na' blé'ene' tu benne' dx'e na', quebe nazi'e zra lane' chee laní chee wechaga na'. ¹²Guzre' le': "Lue', benne', ¿ájazra guca guxú'u nigá, ne quebe nazi'u zra lanu' chee laní wechaga na'?" Bénnea' gudxe' zrize. ¹³Nadxa wenná bea na' guzre' bi zaj zúabe' ga na', "Le guchéaj ni'a ne'e, ne le guzale' chalé'ajla naga naca chul-la, naga cuezre', ne xáguxa'ate lazxe'." ¹⁴Benne' zante gunnía', na' bábaze' zaj naca chee' xelu'e nigá.

Ca naca chee dumí da dxuluchízruje'

(Mr. 12.13-17; Lc. 20.20-26)

¹⁵Nadxa benne' fariseo ca' besiá'que', ne belune' tuze dizra' xeledéaje' Jesús dizra' chee xeledéquene' xelawe' zría chee'. ¹⁶Nadxa gulesel-le' bal-la benne' ca' zaj naque' fariseo ca' tuze, ne bal-la benne' ca' zaj de'e Herodes, chee zeajleguezre' Jesús: —Benne' wesede, nézentu' dxenníu' da li, ne dxusédenu' da li da zaj naca chee Dios, ne quebe dxezrebu' bi xelenná bènneache, ne quebe dxenná'u ca da zaj napa bènneache. ¹⁷Gunná xque. ¿Aja dxéquenu' lue'? ¿Dxun na ba xen quízrujdxu da dxuluchizruj benne' ca' nase-la César, benne' zitu', che cabí?

¹⁸Jesús ba nézene' ca da dxelaca lazre' xelune' chee', na' guzre' benne' ca':

—Le'e, láweze dxunle da xrlátaje. ¿Bizr chee na' dxuzúale da guzrí xi na neda'? ¹⁹Le gulé'e neda' dumí na' da dxízrujle chee wechizruj.

Nadxa bulunézruje' Le' tu dumí chee xezre Roma. ²⁰Gate blé'ene' na, na' Jesús bchebe' benne' ca':

—¿Nuzra lau ni, ne le' da naxúaj na nigá?

²¹Belexechēbe':

—Chee César na'.

Na' guzre Jesús benne' ca':

—Le gunezruj chee César da naca chee César, ne le gunezruj chee Dios da naca chee'.

²²Gate belenne' da nigá, na' belexebánene', ne besiá'que' naga zua Jesús.

Da buluchēbe' Jesús chee benne' xelexebane' ládujla benne' gate
(Mr. 12.18-27; Lc. 20.27-40)

²³Zra ná'queze belezrín bal-la benne' saduceo ca' naga zua Jesús. Benne' saduceo ca' dxelenné' quebe xelexebán benne' gate. Gulé'e Jesús:

²⁴—Benne' wesēde, Moisés gunné' che tu benne' nuchaga ne'e gatie', ne quebe nu bidu chee' chilá, na' bi biche' dxalla' guchaga na'abe' nen nu'ula gute benne' biu chee' na' chee' sua tu bi chee' benne' ba gutie'. ²⁵Naga zúantu' gulezrá' gazre benne' gulácabe' zri'ine tuze benne'. Bi nedxu bchaga na'abe', na' gútebe'. Bi gudxupe' bchaga na'abe' nen nu'ula na' gute benne' biu chee' lawe' da quebe nu zri'ine bi nedxu na' gúlajbe'. ²⁶Cá'anqueze gúcaqueze na chee' bi gudxupe', na' gudé na' chee' bi guxunne', na' cá'anqueze guca chee' xúgute' bi gazre ca'. ²⁷Ca gudé na', na' gute nu'ula na'. ²⁸Gate xelexebán benne' gate, ¿nula bi gazre caní gácabe' benne' chee' nu'ula na' lawe' da tu tu bi gazre ca' bchaga na'abe' nen nu'ula na'?

²⁹Jesús bechebe':

—Le'e dxeque zréajele lawe' da quebe núnbeale da naxúaj na lu xiche lál'azxa, ne ca naca xel-la' waca chee' Dios. ³⁰Gate zrin zra xelexebán benne' gate, québedxa xuluchaga na' bēnneache, ne québedxa xelútie' bi nu'ula chee' xuluchaga na'abe'. Xelaque' ca zaj naca gubáz chee' xabáa chee' Dios. ³¹Ca naca na che dxal-la' xelexebán benne' gate, ¿quebe ne gulábale le'e ca gunná Dios? Gunné': ³²“Neda' naca' Dios chee' Abraham, ne Dios chee' Isaac, ne Dios chee' Jacob.” Dios quebe naque' Dios chee' benne' gate, san naque' Dios chee' benne' ban, benne' ca' ba gulatie' lu xezr la xu nigá.

³³Gate belenne' da nigá, na' belexebane benne' ca' ca naca da dxusede Jesús.

Da gunná be'e Dios da naca blau

(Mr. 12.28-34)

³⁴Gate benne' fariseo ca' guleque bé'ene' ba bzua zri Jesús benne' saduceo ca', na' belezrague'. ³⁵Tu benne' ca', benne' naque' benne' dxuxuzájle'e da nadxixruj bea na, guca lazre' guxúe' ájala nne Jesús. Bchebe' Le':

³⁶—Benne' wesede, ¿bizrla da gunná be'e Dios naca blau?

³⁷Bechébe Jesús:

—Dxal-la' zri'inu' Xranu' Dios dute xichaj lázrda'u, ne dute bé'ne'du xu'u, ne dute xel-la' dxéajni'i chiu'. ³⁸Da nigá naca da nadxixruj bea da blaudxa, ne da dxundxa na ba xen. ³⁹Da nadxixruj bea da gudxupe' nácaqueze na ca', da dxenná na: Bzri'i le sa' ljwezru' ca nazrí'i cuinu'. ⁴⁰Che tu benne' dxune' ca zaj naca chupa da nadxixruj bea caní, dxune' ca naca xúgute da nadxixruj bea da bzuj Moisés, ne ca naca xúgute da bulusede benne' ca' buluchálaje' waláz chee Dios.

¿Nuzra zri'ine naca Cristo?

(Mr. 12.35-37; Lc. 20.41-44)

⁴¹Dxácatē ne zaj nazraga benne' fariseo ca' na', ⁴²Jesús bchebe' le':

—¿Ájala dxéquele le'e chee Cristo? ¿Nuzra zri'ine naque'?

Benne' ca' gulé'e Le':

—Zri'ine David na'.

⁴³Nadxa guzre Jesús benne' ca':

—¿Ájazra na' David gate bchálaje' chee Cristo dxé'e Le':

Xran? Gate gunná David da nigá bchálaje' da ble'e Be' Lá'azxa le'. Caní naca da na' gunná David:

⁴⁴Xrana' Dios guzre' Xrana':

“Gudxé'e chalá'a xabela chia'

cadxa guzúa' zran ni'u benne' ca' quebe chawe' dxelelé'ene' Lue'.”

⁴⁵¿Ájazra naca na naca Cristo zri'ine David, che David ná'queze dxé'e Le': “Xrana”?

⁴⁶Quebe nu benne' guca xechébequeze' chee', na' ze lau zra na' netú québedxa nu bexazre bi guchébedxa Le'.

Jesús dxedil-le' benne' xudau' ca'

(Mr. 12.38-40; Lc. 11.37-54; 20.45-47)

23

¹Nadxa Jesús guzre' benne' ca' zaj zre'e na', ne benne' ca' dxusédené', ²dxenné':

—Benne' ca' dxuluxuzájle'e da nadxixruj bea Moisés, ne benne' xudau' fariseo ca' zaj nape' xel-la' dxenná bea xuluxuzájle'e da nadxixruj bea Moisés. ³Chee le na' le guzúa dizra' chee benne' caní, ne le gun xúgute da xelenné'. Quebe gunle ca da dxelún benne' ca', lawe' da dxelenné' da ca' dxal-la' gunle, na' quebe dxelúnqueze' na. ⁴Dxelune' xua zí'ile'e da quebe dxelezeque xelezúe bénneache, ne dxelenná bé'ene' bénneache chee xelu'e na. Benne' ca' ne quebe dxuluzúe' na netú zrube ne'e chee da dxuluzúe benne' xubla. ⁵Xúgute da dxelún benne' ca' naca na chee xelelé'e bénneache. Dxeledánnene' dxelu'e luzxgue', ne ne'e ladxe' laga naga naxúaj dizra' chee Dios, ne dxelácue' zra lane' da zeajzé luzre na tunna. ⁶Dxelaca lazre' xelebé'e naga ze láweze naga dxelawe', ne naga naca blau lu xu'u ca' naga dxeledube'. ⁷Dxelaca lazre' xelapa bénneache le' ba lál'ana la neza ca', ne xelé'e le': "Benne' wesede." ⁸Na'a le'e, quebe güele lataj nu xé le'e, "Benne' wesede", lawe' da xúgutele nácale bi bíchele tule xetule, ne tuze Benne' dxusédene' le'e, neda', Cristo. ⁹Quebe nu xe le'e: Xrae, lu xezr la xu nigá, lawe' da zua tuze Xrale, Dios na' zue' xabáa. ¹⁰Quebe güele lataj nu xé le'e: Xran, lawe' da zua tuze Xránale, neda', Cristo. ¹¹Bénnea' dxune' zrin chee xezícadxale le'e nácadxe' blau ládujla le'e. ¹²Bénnea' dxucá'ana szren cuine' wexéxrujla bénnea', na' bénnea' dxaque' dxexruj lazre' wegá'ane' szren.

¹³'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxsézxujle neza chee xabáa chee quebe nu chu'u na. Lé'eqeque quebe dxú'ule, ne quebe dxuele lataj benne' dxelaca lazre' xelu'e.

¹⁴'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxegúale lizre nu'ula ca' ba gulate benne' biu chee', na' chee xulé'ele xrlátaje cuínale, dxuwízrale Dios xcha lu xudau'. chee le na' da zrente da guzría xi na le'e.

¹⁵'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Le'e dxedale du ca naca xezr la xu nigá ne ca naca nísadau' chee si' tu benne' ca naca da zéajlele chee Dios, na' gate bache dxunle na, na' dxugápadxale bénnea' dul-la ca da nabágale le'e chee cuía xi'e lu lataj ba xa'.

¹⁶'Edxugua le'e. La chul-la nácale, ne dxaca lázrele cu'ule benne' neza. Dxennale che tu benne' dxuzétaje' xudau', quebe

dxun na le' ba xen, na' che dxuzétaje' oro chee xudau', da na' dxun na le' ba xen. ¹⁷Nácale benne' xala, ne la chul-la. ¿Nula da naca na blaudxa, oro, che xudau' na' da dxucá'ana na lá'azxa oro na'? ¹⁸Cá'anqueze dxennale le'e che nu dxuzetaj cugu lá'azxa, quebe dxun na le' ba xen, san che dxuzétaje' guna' da zria na lawe' cugu lá'azxa, da na' dxun na le' ba xen. ¹⁹Nácale benne' xala ne la chul-la. ¿Nula da naca na blaudxa, guna' na', u cugu lá'azxa na' da dxucá'ana na lá'azxa guna' na'? ²⁰Che nu benne' dxuzétaje' cugu lá'azxa, quegaze cugu lá'azxa dxuzétaje', san cá'anqueze dxuzétaje' ca naca da zria lawe na. ²¹Bénnea' dxuzétaje' xudau', quegaze xudau' na' dxuzétaje'. Cá'anqueze dxuzétaje' Dios zue' lataj na'. ²²Cá'anqueze benne' dxuzétaje' xabáa, dxuzétaje' lataj naga zria Dios, ne Diósqueze, Bénnea' zrie' lataj na' dxuzétaje'.

²³Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxunézrujle chee xudau' tu cue' chee da chi cue' chee xixruj weaj, ne chee bínnedu ca' chee anís, ne chee cumín. Quebe dxunle da zaj naca na blaudxa da zaj zua na lu da nadxixruj bea na, ca naca chee gácale xrlátaje, ne chee xexache lázrele le sa' l'jwézrele, ne chee chéajlele chee Dios. Da caní zaj naca na da dxun na ba xen gunle, ne quebe gusanle da ca' ba dxunle. ²⁴La chul-la nácale, ne dxaca lázrele cu'ule benne' neza. Dxecá'ale da naca ca tu bé'adau', be zrua lawe' da dxí'ajle, na' quebe dxeque be'ele dxí'ajle da naca ca tu camello, be dxelaga benneache.

²⁵Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca zaj naca zriga', ne xé'ena da dxíbele cúzreze na. Lu'ule na quebe dxíbele. Caní nácale lawe' da lu lárdaule nácale ca gubán, ne benne' dxucude. ²⁶Benne' fariseo la chul-la. Nedxu le quibe lu'ule zriga', ne xé'ena, na' cá'anqueze xegá'ana chawe' cúzrela.

²⁷Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca tu ba chiche da nalá na xrtante cúzrela, na' lu'ule na nazrate na zrita chee benne' gate', ne xúgutę da sguete. ²⁸Ca'an nácale le'e. Cúzrela nala'le ca benne' xlátaje, na' lu lárdaule nazrate na da wen lazre', ne da calela da dxunle.

²⁹Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxucá'anale

cháwedau' ba ca' naga zaj nagache benne' ca' buluchálaje' waláz chee Dios, ne dxuele lechítaje lu'a chee benne' xrlátaje ca'. ³⁰Dxennale: “Chela netu' ba zúantu' gate na' gulezrá' xra xrtauntu' ca', quebe gúcalentu' benne' ca' belutiē' benne' ca' buluchálaje' waláz chee Dios.” ³¹Gate dxennale ca', le'e dxexúnbeaquezle nácale zri'ine zre sua benne' ca' belutiē' benne' ca' buluchálaje' waláz chee Dios. ³²Dxusexúzrele dxunle ca da gulezú lau belún xra xrtáule ca'.

³³Be snia nácale, ne xrtia be snia. ¿Ájazra gunle chee gáchele lu da zi' da xa' chee lataj ba xa'? ³⁴Chee le na' neda' sel-la' chee benne' ca' xuluchálaje' waláz chee Dios, ne benne' sina ca', ne benne' ca' xulusédene' le'e. Lé'eequeze gútele, ne gudá'le xaga béguaj bal-la benne' ca', na' xebal-le' gunle le' zi' lu xudau' ca', na' gau zi' xúzrele le' tu xezre xetú xezre. ³⁵Ca'an gaca, le'e bágale zria chee xel-la' gute chee xúgute benne' xrlátaje ca' belute xra xrtáule ca', gate guzú lau na nu bete Abel, benne' xrlátaje, ne naga bzrinte bētele Zacarías ládujla naga zua lataj lá'azxa chee xudau' ne lataj naga dxuluzezxe' be xíxre'du ca', be dxelegú'e lu cugu chee Dios. ³⁶Da li dxapa' le'e, bēnneache zaj zre'e na'a xelebague' zria chee xúgute da caní.

Jesús dxebezre' chee xezre Jerusalén

(Lc. 13.34-35)

³⁷Nadxa gunná Jesús:

—Jerusalén, Jerusalén, le'e na' dxútele benne' ca' dxuluchálaje' waláz chee Dios, ne dxuzríale xiaj benne' gubáz ca' dxesel-la Dios naga zúale. Zane' lásate guca lazra' gutupa' zri'inele chia' ca dxun bedxuj, dxutúpaba' be dxé'enedau' zran xrláaba', san quebe guca lázrele. ³⁸Le nna'xque na'a, lízrele xelexegá'ana na dácheze, ³⁹lawe' da dxapa' le'e, québedxa lé'ele neda' cadxa zrin zra nnale: La'azxa naca bēnnea' ze'e waláz chee Xránadxu.

Jesús dxenné' wabía xi' xudau'

(Mr. 13.1-2; Lc. 21.5-6)

24 ¹Nadxa bedxúaj Jesús xudau', na' dxácate dxexedxúaje' na', gulebiga benne' ca' dxusédene' lau Jesús, ne gulezú lawe' dxuluchálajlene' Le' ca naca chee xudau' na'. ²Bechebe Jesús:

—¿Dxelé'ele xúgute da caní? Da li dxapa' le'e, netú xiaj caní quebe xegá'ana zeajzrí'a cuzru ljwezre na. Ca naca na cuía xi na.

Ca naca da xelunna bea na ba za zra bzebe

(Mr. 13.3-23; Lc. 21.7-24; 17.22-24)

³Nadxa xjaque' lu xi'a naga zaj ze xaga olivo, na' gate dxe' Jesús na', benne' ca' dxusédene' belezrine' lau Le', ne bagácheze buluchebe' Le':

—Gunná netu'. ¿Bata gaca da na'? ¿Bi gunna bea na gate zrin zra xela'u, ne gate cheajsé chee xezr la xu nigá?

⁴Nadxa Jesús guzre' benne' ca':

—Le guxúe cuínale chee quebe nu si xe le'e. ⁵Benne' zan xeelé'e. Xelún lazre' xelenné' zaj naque' Cristo, na' xelezi xe'e benne' zan. ⁶Wenle le'e dxaca wedil-la, ne waca wedil-la gáteteze na'. Quebe zrébele, lawe' da dxal-la' xelaca da caní. Da caní quebe zaj naca na chee zra bzebe. ⁷Tu cue' xezr la xu tíl-lalē na xetú cue' xezr la xu, ne tu xezre tíl-lalē na xetú xezre. Wata' gubina', ne welata' xízrawe' ca', ne wazrú' gáteteze na'. ⁸Xúgute da caní zaj naca na naga dxezú lau ca da xelezaca bēneache.

⁹Nadxa xuludé' le'e naga si sácale, na' bál-lale welútequeze'. Ca naca bēneache xelecuídene' le'e lawe' da dxunle da naca chia'. ¹⁰Lu zra na' benne' zan québedxa xeléajle'e chia', na' xelecuídene' le sa' ljwezre', ne xuludé' le sa' ljwezre' lu na' benne' guledábage' le'. ¹¹Welelá' benne' zan benne' wen lazre'. Xelenné' dxuluchálaje' waláz chee Dios, na' xelezi xe'e benne' zante. ¹²Lawe' da gáta'le'e da calela, benne' zan québedxa xelezrí'ine' le sa' ljwezre'. ¹³Bēnea' zua chache' ca zrinte zra bzebe, la bēnea'. ¹⁴Ca naca dizra' chawe' nigá ca nna bea Dios, zralaj na du gabí'i xezr la xu chee xelén ca naca benne' chee xúgute cue' xezr la xu, na' te na' cheajsé chee xezr la xu nigá.

¹⁵Benne' gulabe' da nigá dxal-la' chéajni'ine'. Daniel, benne' bchálaje' waláz chee Dios, bzuaje' ca naca chee tu da dxezrá'a Dios, da dxuxrinnaj na. Gate lé'ele da nigá zua na lataj lál'azxa chee xudau', ¹⁶nadxa benne' zaj zre'e xezre ca' zaj nababa Judea dxal-la' xuluzrúnnuje', ne chjaque' lu xi'a zren. ¹⁷Che tu benne' ze' chju'u chee', quebe dxal-la' xexétaje' bi cheajxeléaje' lu xu'u. Dخال-la' guzrúnnujte'. ¹⁸Benne' zue' le'e

xixre' quebe dxal-la' xezrine' lizre' cheajxezri'e xicha chee' da gácue'. ¹⁹Edxugúa nu'ula ca' zaj zre'e lu zra na' zaj zue' zi'i, ne nu'ula ca' zaj nu'e bidau', ne dxelázrebe'. ²⁰Le naba Dios quebe gun na ba xen guzrúnnujle beu' zaga, ne quegá lu zra dxupá'anale, ²¹lawe' da che ca' gaca na, na' da zréntedxa da xelezí saca bénneache ca da quebe ne xezezaque' ca guzú laute zua xezr la xu nigá, ne québedxa bi xezezaque' caní ca te chee da nigá. ²²Che Dios quebe guzáchie' zra ca', na' netú quebe nu la. Guzáchie' na chee gácalene' benne' ca' bache nabéaje' chee'.

²³Chee le na', quebe chéajlele che nu xe le'e: "Le nna'xque, nigá zua Cristo", u che nu xe le'e: "Le nna' xque, na'la zue'." ²⁴Caní dxapa' le'e lawe' da xeledá' benne' zan, benne' guzrí xe'e, na' xelenné' zaj naque' Cristo, u zaj naque' benne' dxuluchálaje' waláz chee Dios, na' da zrente xululé'ene', ne xelune' xel-la' waca zren ca' chee xelezí xe'e benne' ca' ba nabéaj Dios. Caní xelune' che xelezéquene'. ²⁵Ba bchálajlena' le'e caníqueze na'a quebe ne gaca na. ²⁶Chee le na', che nu xe le'e: "Le nna'xque, na' zue' le'e xixre'", quebe chéajle na', u che nu xe le'e: "Le nna'xque, lu xu'u nigá zue'", quebe chéajlele. ²⁷Ca dxun tu xesa guziu', dxepe na naga dxalaj gubizra, na' dxelé'edxu na naga dxebía gubizra, ca'an gaca gate xida' neda', Benne' Gulje' Bénneache. ²⁸Gáteteze de tu da nate, na' dxelexezraga laba ca'.

Ca da gaca gate ba zua xelá' Benne' Gulje' Bénneache
(Mr. 13.24-37; Lc. 21.25-33; 17.26-30, 34-36)

²⁹Na' gunná Jesús:

—Gate bache guca zra na' gate xelezaca zi' bénneache, nadxa gubizra chul-la na naga zua na, na' beu' quebe gusení na, na' belaj xelexruj na, na' xelexrízequeze ca naca da zaj naca na szren da dxeledá' lu be'. ³⁰Nadxa lé'ele zran xabáa da gulé'e na ba zua xelá'a neda', Benne' Gulje' Bénneache, na' ca naca bénneache zaj zre'e xezr la xu xelebézrequeze'. Nadxa xeledé'ene' neda', Benne' Gulje' Bénneache, zezá'a lu beuj zran xabáa, zúale neda' dute xel-la' dxenná bea, ne da xabáa. ³¹Nadxa sél-laqueza' gubáz chee xabáa chia' ca', na' xulucuézre' zizraj lúzuba' chee xuluxutupe' benne' ca' ba nabéaja' chia' dapa saca chee xezr la xu nigá, ne du ca naca xezr la xu nigá.

³²Le gusede ca naca da dxulé'e xaga higo. Gate dxelexedxé'ene zruze na, ne dxezría na laga' dxe'ene, ba nézele

ba za xaca beu' la. ³³Cá'anqueze gate lé'ele dxelaca xúgute da caní, dxal-la' nézele gágute ba zua cheajsé chee xezr la xu, ne ba zua gaca na. ³⁴Da li dxapa' le'e, xúgute da caní xelaca na nédxula gate quebe ne xelate bénneache zaj zre'e lu zra na'. ³⁵Xabáa ne xezr la xu weledé chee na. Dizra' chia' quebe te chee na.

³⁶'Gate za zra na', ne bila zra na', quebe nu neze, quegá gubáz chee xabáa zaj zre'e xabáa, ne neda', Zri'ine Dios. Tuze Xradxu Dios nézene' gate zrin zra na'.

³⁷'Ca guca lu zra ca' gate zua Noé, cá'anqueze gaca na gate xelá'a neda', Benne' Gulje' Bénneache. ³⁸Ca lu zra ca' gate quebe ne gun Dios nisa xiuj da guzría xi na bénneache, gulezrá' bénneache ca' dxel'éaj dxelawe', ne dxuluchaga ne'e, ne dxulunézruje' zr'ine' ca' chee xuluchaga na'be', cadxa bzrin zra guxú'u Noé lu da zren na' dxedá lawe' nísadau' da nazí le na arca. ³⁹Quebe guleque bé'ene' ca da dxal-la' gaca na, cadxa bzrin zra guca xiuj na', ne bēte na ca naca benne' ca'. Cá'anqueze gaca gate xelá'a neda', Benne' Gulje' Bénneache. ⁴⁰Ca lu zra ca' xelezrá' chupa benne' biu le'e xixre'. Tu'e' xeché'e, na' xetúe' xegá'ane'. ⁴¹Xelezrá' chupa nu'ula dxelútue'. Tu'e' xeché'e, na' xetúe' xegá'ane'.

⁴²'Le sua le'e ban lazre' lawe' da quebe nézele bi zra xelá'a neda', Xránale. ⁴³Da nigá dxal-la' nézele: Che tu xrane xu'u nézene' bi zra chizrela zrin gubán, waxíchaje' bchigala, ne quebe gu'e lataj xusalaj benne' gubán lizre' chee cuane'. ⁴⁴Chee le na', le sua le'e ban lazre' lawe' da xelá'a neda', Benne' Gulje' Bénneache, gate québela dxéquele ca'.

Benne' wēn zrin li lazre', ne benne' wēn zrin quebe naque' li lazre'

(Lc. 12.41-48)

⁴⁵Na' gunná Jesús:

—¿Nuzra na' benne' wēn zrin li lazre' ne dxéajni'ine', bēnea' xrane' dxucá'analēne' le' benne' zaj zre'e lizre' chee gunézruje' da xelawe' gate zrin zra chee na? ⁴⁶Ba neza naca na chee benne' wēn zrin na', gate xezrín xrane', lé'ene' le' dxune' ca naca da nabague'. ⁴⁷Da li dxapa' le'e, xrane' gucá'analēne' le' ca naca da nape'. ⁴⁸Che benne' wēn zrin na' gaque' benne' wēn da calela, ne guéquene' quebe xelá' zē xrane', ⁴⁹ne che su lawe' gusaca zi'e xezícala benne' wēn zrin ca', ne xi'aj

gágulene' benne' dxelezuzre', ⁵⁰nadxa xrane' xezrine' zra gate québela dxebeze'. Gaca na zra quebe nézene', ⁵¹na' gusaca zí'le'e le'. Chugue' chee' gaque' tuze benne' ca' dxelune' láweze da xrlátaje. Cuezre', ne xáguxa'ate lazze'.

Da dxulé'e na ca naca chee chi nu'ula cuide'

25 ¹Gunná Jesús:
 —Ca gaca chee benne' xelu'e naga dxenná bea Dios xabáa naca na ca da guca chee chi nu'ula cuide' caní. Gulequ'é xi' chee' ca', chee chjaque' laní chee wechaga na', dxelebeze' bátala xelá' benne' wechaga na'. ²Gazxu' nu'ula caní gulaque' gat lazre', na' xegazxu' nu'ula caní zaj naque' ban lazre'. ³Nu'ula ca' quebe zaj naque' ban lazre' belú'e xi' chee' ca', san quebe belú'e da za zxezxe na da xelegué'e lu xi' chee' ca'. ⁴Nu'ula ban lazre' ca' belú'e xi' chee' ca', ne da za zxezxe na da xelegué'e na. ⁵Lawe' da guzré benne' wechaga na', na' gulaca wase ca zaj naque', na' xúgute' gulasie'. ⁶Dxela ben tu chí'i benne' dxebezre xe'e, dxenné': “Ba za' wechaga na'. Le dxuaj si' lu na'le le'.” ⁷Xúgute' nu'ula cuide' caní gulasé', na' gulezú lawe' bulugale' xi' chee' ca'. ⁸Nadxa gazxu' nu'ula ca' quebe zaj naque' ban lazre' gulé'e gazxu' nu'ula ban lazre' ca': “Le gunna late' da za zxezxe na cheentu', lawe' da ba dxelexula xi' cheentu'.” ⁹Nu'ula ban lazre' ca' belexechebe': “Quebe gaca, lawe' da che gúnnantu' late' chee'e, quebe gaca na da dxechínentu' netu', ne da dxechínnele le'e. Le chjácala naga dxutie' na, ne le cheajxrí chee'e.” ¹⁰Dxácate zjaca nu'ula ca' quebe zaj naque' ban lazre', na' bezrín wechaga na'. Nu'ula ban lazre' ca' gulu'e nen le' lu laní chee wechaga na', na' bsezxuj dxa xu'u na'. ¹¹Gudé na' belexezrín xegazxu' nu'ula ca', na' gulenné': “Xran, Xran, gusalaj chú'untu'.” ¹²Le' bechebe': “Cabata'. Da líqueze quebe núnbe'a le'e.”

¹³Nadxa Jesús guzre' benne' ca':

—Le sua le'e ban lazre', lawe' da quebe nézele bi zra, u bi xel-la' xelá'a neda', Benne' Gulje' Bénneache.

Da dxulé'e na ca naca chee benne' gulezí'e dumí

¹⁴Na' gunná Jesús:

—Ca gaca chee benne' xelu'e naga dxenná bea Dios xabáa, naca na ca da guca gate tu benne' zue' chee se'e chéaje' zitu', na' gunné' bi wen zrin chee' ca', ne bcá'analene' bi wen zrin ca' dumí chee'.

15'Tu bi ca' bnézruje' gazxu' cue' dumí, na' xetube' bnézruje' chupa cue' dumí, na' xetube' bnézruje' tu cue' dumí. Bnézruje' chee tu tube' ca da xelezéquebe' xuluchínebe' na. Nadxa guz'é'e zéajé' zitu'. 16Bi wən zrin na' guzi'be' gazxu' cue' dumí bchínebe' dumí na', na' bezi'be' xegazxu' cue' dumí. 17Cá'anqueze bi wən zrin na' guzi'be' chupa cue' dumí, bezi'be' xechupa cue' dumí. 18Bi wən zrin na' guz'í'be' tu cue' dumí na' guxíajbe', ne bcáchebe' dumí chee xránabe' tu lu xedxu da benbe' lu xu.

19'Zane' iza ba guca gate bezrín xrane bi wən zrin ca', na' guzú lawe' dxezi'e da bdee' lu na' bi wən zrin ca'. 20Nedxu bzrin bi wən zrin na' guz'í'be' gazxu' cue' dumí, na' bnézrujbe' xránabe' xegazxu' cue' dumí, na' gúzrebe' le': "Xran, bənnu' neda' gazxu' cue' dumí. Nigá dē xegazxu' cue' da bezi'a nen dumí chiu'." 21Na' xránabe' guzre' lebe': "Da chawe' bənu'. Nacu' tu bi wən zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zréndxaqueze. Guxú'u naga zua' neda', ne gubéle'e." 22Gudé na' bzrin bi wən zrin na' guzi'be' chupa cue' dumí, na' gunabe': "Xran, bənnu' neda' chupa cue' dumí. Nigá dē xechupa cue' da bezi'a nen dumí chiu'." 23Na' xránabe' guzre' lebe': "Da chawe' bənu'. Nacu' tu bi wən zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zréndxaqueze. Guxú'u naga zua' neda', ne gubéle'e." 24Gate bzrin bi wən zrin na' guzi'be' tu cue' dumí, na' gúzrebe' xránabe': "Xran, nezda' nacu' benne' dxenné xue, ne dxezi'u da quebe guzu', ne dxexeca'u da quebe besiu'. 25Chee le na' bzreba', na' guxá'a xeajcáchia' dumí chiu' lu xu. Nigá dē da naca chiu'." 26Na' xránabe' guzre' lebe': "Nacu' bi wən zrin calela, ne zrawede. Ba nézqueznu' dxezi'a da quebe guza', ne dxexecá'a da quebe besia'. 27Chee le na' la xju'u dumí chia' na' lu na' benne' dxelízruje' chee dumí da dxuluchínene', na' gate za' neda', na' xezi'a da naca chia' nen da belez'í'e." 28Nadxa guzre' benne' ca' zaj zre'e na': "Le xecá'a dumí na' da núxrube', ne le gunezruj na bénnea' nape' chi cue' dumí. 29Benne' nape' wazidxe' da zrendxa, na' benne' quebe nape', ca late' da du na' nape' wecá'a na. 30Ca naca bi wən zrin nigá, bi wedegún, le xebéaj-be' chalé'ajla naga naca chul-la, naga cuézrebe', ne xáguxa'atē lázxabe'."

Ca gun Dios gate guchi'e chee bénneache zaj zre'e xezr la xu

31Na' gunná Jesús:

—Gate xelá'a neda', Benne' Gulje' Bénneache, ne Benne' Wenná Bea, nen ca naca gubáz chee xabáa chia', na' cué'queza' lataj naga nna be'a, da naca na da xabáa. ³²Na' bénneache chee xúgute cue' xezr la xu xelexezrague' lawa' neda', na' xebéaja' cha chee' ca dxun benne' dxuxúe' zrila'. xebéaje' chíbudu ca' ládujla zrila' ca'. ³³Guzrá'a benne' ca' zaj naca zrila' chia' chalá'a xabēla chia', na' benne' ca' zaj naca ca chíbudu ca' guzrá'a le' chalá'a xéglala chia'. ³⁴Nadxa xapa' benne' ca' zaj zra' chalá'a xabēla chia': “Le da le'e, nácale xrlátaje lau Xra'. Le chu'u naga dxenná bea Xra', lataj na' bcueze' chee gate na' bene' xezr la xu nigá. ³⁵Caní dxaca lawe' da guduna', na' bgágule neda'. Gubíleda', na' bēnnale da gu'a. Gudá' ca tu benne' xu'e neza, na' gulu'ule neda' lízrele. ³⁶Bxázejda' zra lana' gácua', na' bgácule neda'. Quebe chawe' guzúa', na' bedajná bale neda'. Guxu'a lizre xia, na' bedajná bale neda'.” ³⁷Nadxa benne' xrlátaje caní xelenné': “Xran, ¿bata blé'entu' Lue' dxedunu', na' bgáguntu' Lue'? ¿Bata blé'entu' Lue' dxebílenu', na' bēnantu' da gu'u? ³⁸¿Bata blé'entu' Lue' ca tu benne' xu'e neza, na' gulú'untu' Lue' lízrentu'? ¿Bata blé'entu' Lue' dxexázejenu' zra lanu', na' bgácuntu' Lue'? ³⁹¿Bata bēnentu' quebe chawe' zu', u xu'u lizre xia, na' bedajná bantú' Lue'?” ⁴⁰Neda' xechēba': Da li dxapa' le'e, ca da benle chee bēnnedu caní, benne' zaj naca dxexruj lazre', chee néda'queza' benle ca'.

⁴¹Nadxa neda', Benne' Wenná Bea, xapa' benne' ca' zaj zra' chalá'a xéglala chia': Le cuasa cuita' neda', le'e, nácale wen da calēla lau Xra'. Le chjaca lu xi' chee lataj ba xa' da nabeza na chee da xriwe', ne chee gubáz chee na ca'. ⁴²Caní dxaca lawe' da guduna', na' le'e quebe bēnnale da gawa'. Gubíleda', na' quebe bēnnale da xí'aja'. ⁴³Gudá' ca tu benne' xu'e neza, na' quebe gulu'ule neda' lízrele. Bxázejda' zra lana' gacua', na' quebe bgácule neda'. Quebe chawe' guzúa' ne guxu'a lizre xia, na' quebe bedajná bale neda'. ⁴⁴Nadxa benne' ca' xelé'queze' neda': “Xran, ¿bata blé'entu' Lue' dxedunu', u dxebílenu', u xu'u neza, u dxexázejenu' zra lanu', u quebe chawe' zu', u xu'u lizre xia, na' quebe gúcalentu' Lue'?” ⁴⁵Neda', benne' wenná bea, xechēba': Da li dxapa' le'e, lawe' da quebe bi benle chee bēnnedu caní, benne' zaj naca dxexruj lazre', quebe bi benle chee néda'queza'. ⁴⁶Benne' caní chjácaqueze' lataj ba xa', na' benne' xrlátaje ca' chjaque' lu xel-la' nabán da zeajlí canna.

Dxelíłaję' ájala xełełę' Jesús

(Mr. 14.1-2; Lc. 22.1-2; Jn. 11.45-53)

26 ¹Gate bexuzre bchalaj Jesús caní, na' guzre' benne' ca' dxusédenę':

²—Ca ba nézquezle, xechupa zraze na'a súadxu Laní Pascua, da naca na zra dxuluxucube benne' judío ca guca gate Dios bebéaję' bénneache cheę' lu xęzr la xu Egipto, na' neda', Benne' Gulję' Bénneache, xuludéę' neda' lu na' benne' xuludé'ę neda' xaga béguaj.

³Ca lu zra na' benne' xíchaję ca' cheę bxruze ca', ne benne' dxuluxuzájle'ę da bdxixruij Moisés, ne benne' gula sina ca' cheę judío ca', belezrague' chale'aj cheę xu'u zaca cheę Caifás, bxruze blau. ⁴Na' belíłaję' ájala xełełę' Jesús lu da wen lazre' cheę xelútię' Le'. ⁵Gulennę':

—Quebe gundxu na lu zra laní nigá, cheę quebe xeledábaga benne' ca' dxi'u.

Tu nu'ula dxegu'ę Jesús da dxelá zixre

(Mr. 14.3-9; Jn. 12.1-8)

⁶Zua Jesús xęzre Betania lizre Simón, bénnea' güé'ene' wę' guzru'. ⁷Bzrin tu nu'ula naga zua Jesús, nu'ę tu zruágadau' da naca na xiaj alabastro, ne nazrate na da dxelá zixre da zácale'ę na. Gate na' dxe' Jesús ga dxelawé', na' nu'ula nigá gulu'ę na xichaj Jesús. ⁸Gate belelé'ę benne' ca' dxuséde Jesús da nigá, na' belezré'ę, ne gulezú lawę' dxelennę':

—¿Bizr cheę na' guzría xi' da nigá? ⁹Da nigá waca la gudá'u na sí'adxu da zrente, cheę gácaleđxu benne' xache' ca'.

¹⁰Jesús benne' da nigá, na' guzre' benne' ca':

—¿Bizr cheę na' dxunle nu'ula nigá zęde? Da nigá bene' naca na tu da xrlátaję. ¹¹Benne' xache' ca' tu zrázqueze' ládújla le'e, na' neda' quegá tu súaleza' le'e. ¹²Ca naca da ben nu'ula nigá, gulu'ę da zixre na' bel-la' dxen chia', naca na da xucá'ana chawe na neda' cheę zra gachia' lu xędxu ba. ¹³Da li dxapa' le'e, gáteteze xuluchálaję' dizra' chawe' chia' nigá du gabí'i xęzr la xu, na' zrálajqueze ca da ben nu'ula nigá, cheę cheajlesá lazre' bénneache le'.

Judas dxechębe lazre' gudęę' Jesús

(Mr. 14.10-11; Lc. 22.3-6)

¹⁴Nadxa tu benne' chazrinnu ca' dxuséde Jesús, bénnea' le' Judas Iscariote, guxíaję' xeajchálajlene' benne' xíchaję ca' cheę bxruze ca'. ¹⁵Guzre' le':

—¿Ájate gúnnale neda' che ca' gudéa' Jesús lu na'le?

Nadxa benne' ca' gulízuje' le' chi dxua dumí plata. ¹⁶Ca lu zra na' guzú lau Judas dxexílaje' ájala gune' gudéa' Jesús lu na' benne' ca'.

Da dxágudxu chee xucúbedxu ca guca gate gute Xránadxu

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷Zra nedxu chee laní na' gate na' dxelawe' xeta xtila da quebe nachixre cua zichaj chee na, benne' ca' dxuséde Jesús belezrine' lau Le', na' buluchebe' Le':

—¿Gazra dxaca lazru' gucuézentu' da gágudxu chee laní pascua chee benne' judío?

¹⁸Jesús guzre' le':

—Le chjaca lu xezre na', naga zua lizre tu benne', na' le xe'e: "Bennea' dxusédené' dxi'u dxenné': Zra chia' gatia' ba zua gágute, na' lizru' lue' gawa' chee Laní Pascua tu zren nen benne' ca' dxusédeda."

¹⁹Benne' ca' dxuséde Jesús belune' ca da gunná bé'ene' le', na' bulucueze' da xelawe' chee Laní Pascua.

²⁰Gate gula chizrela, na' gudxé' Jesús ga gawe' tu zren nen benne' ca' dxusédené'. ²¹Dxácate na' dxelawe', guzre Jesús benne' ca':

—Da li dxapa' le'e, tule le'e naca bénnea' gudéa' neda' lu na' benne' ca' dxelune' da calela.

²²Nadxa benne' ca' belexewí'inele'e, na' gulezú lawe' tu tue' dxuluchebe' Jesús:

—Xran, ¿quebe naca neda'?

²³Na' bechebe Jesús:

—Bénnea' dxudé ne'e lu xé'ena tu zren nen neda', benne' na' gudéa' neda'. ²⁴Neda', Benne' Gulje' Bénneache, waxá'a naga dxal-la' gatia' ca naxúaj na lu xiche chee Dios, san edxugúa bénnea' gudéa' neda'. Cháwedxa naca la quebe gulaj bénnea'.

²⁵Nadxa gunná Judas, bénnea' gudéa' Jesús, dxenné':

—Benne' dxuséde, ¿quebe naca neda'?

Na' bechebe Jesús, gunné':

—Awe', lue' na'.

²⁶Dxácate dxelawe', Jesús guqu'é xeta xtila, na' guzre' Dios: "Xcalenu'." Gudé na' bzúzruje' na, na' bnézruje' na benne' ca' dxusédené', dxenné':

—Le gagu. Da nigá naca na bel-la' dxen chia'.

²⁷Gudé na' guqu'é tu zriga', na' guzre' Dios: “Xcalenu”, na' bnézruje' na benne' ca', dxenné':

—Le xi'aj xúgutele da xuzru lu zriga' nigá. ²⁸Da nigá naca na dxen chia' da guzúa chacha na xel-la' wezría cube da dxun Dios. Dxen nigá lalaj na ne chee benne' zante chee gunite lau Dios dul-la zaj nabaga benne' ca'. ²⁹Dxapa' le'e, québedxa xí'aja' ca naca xrise uva nigá ca zrindxa zra xí'aja' da cube tu zren nen le'e naga dxenná bea Xra'.

Jesús dxenné' nna Pedro quebe núnbe'e Le'

(Mr. 14.26-31; Lc. 22.31-34; Jn. 13.36-38)

³⁰Ca gudé belul-le' chee Dios, na' gusiá'que' zjaque' lu Xi'a Xaga Olivo Ca'. ³¹Nadxa Jesús guzre' benne' ca':

—Xúgutele le'e gusán lázrele neda' na'a zre', lawe' da naxúaj na lu xiche chee Dios, dxenné': “Gutia' benne' dxuxié' zrila', na' zrila' ca' xelase dínna'ba'.” ³²Gate te xebana' neda', cha'a neda' ga nababa Galilea nédxudxa ca le'e.

³³Nadxa bechebe Pedro:

—Lácala xúgute benne' caní xulusán lazre' Lue', quebe guna' neda' ca'.

³⁴Nadxa Jesús guzre' le':

—Da li dxapa' lue', lu zre' na'a zre' nédxudxa gate cuezre xjeaj, lue' wannáu' chunna lasa quebe núnbe'u neda'.

³⁵Pedro guzre' Jesús:

—Lácala gatia' neda' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute benne' ca' dxusede Jesús.

Jesús dxuchálajlene' Dios naga zaj zxe' xaga olivo ca' nazí le na Getsemaní

(Mr. 14.32-42; Lc. 22.39-46)

³⁶Nadxa bzrin Jesús nen benne' ca' dxusédene' tu lataj nazí le na Getsemaní, na' guzre' le':

—Le cue'e nigá dxácaté cha'a neda', guchálajlena' Dios.

³⁷Jesús guché'e Pedro, ne dxúpaté zri'ine Zebedeo, na' guzú lawe' bewí'inele'ene' ne guzúale'e stebe. ³⁸Nadxa guzre' benne' ca':

—Dxewí'ine lázrele'a dxunte na gute na neda'. Le xegá'ana le'e nigá, ne le sua ban lazre' tu zren nen neda'.

³⁹Nadxa Jesús guzé'ē zéaje' xelate' caníladxa, na' gute' sudxú'ala lu xu, ne bchálajlene' Dios, dxenné':

—Xrae, chela gaca, bde na chalá'ala quebe gaca chia' ca naca xel-la' gute caní da naca na ca tu da sla' da xí'aja'. Quebe gaca na ca dxaca lazra' neda'. Gaca na ca dxaca lazru' Lue'.

⁴⁰Nadxa bezrín Jesús naga zaj zra' benne' ca' dxusédenē', na' blé'ene' benne' ca' dxelásie', na' guzre' Pedro:

—¿Quebe gúcale le'e quíchale bchigala nen neda' tu chí'idau'ze? ⁴¹Le nnaze, ne le guchálajle Dios chee quebe gun zréaje da xriwe' le'e. Da li bénne'du xu'uule dxaca lázre'le'e na, san lu belá' dxen chee dxate ni'a na'le.

⁴²Da gudxupe' lasa guxíaj Jesús bchálajlene' Dios caní:

—Xrae, che quebe gaca te chalá'ala ca naca da dxal-la' saca', gaca na ca dxaca lazru' Lue'.

⁴³Ca gudé na' bezrine', ne belé'ene' benne' ca' dxusédenē', dxelásie' lawe' da ba dxelezrude' lawe' dxelaca wásele'ē.

⁴⁴Bca'ane' benne' ca', guzé'ē zéaje' bchálajlene' Dios da guxunne' lasa, na' gunnáqueze' ca da ba gunné' ca'an bache.

⁴⁵Nadxa bezrine' naga zaj zra' benne' ca' dxusédenē', na' guzre' le':

—Le gase na'a, ne le xezí' lazre'. Ba bzrin zra gate neda', Benne' Gulje' Bénneache, tea' lu na' benne' dul-la ca'. ⁴⁶Le chasa, ne le chu'u. Ba za bénnea' dxudé' neda'.

Dxelech'ē Jesús ca tu benne' wen da zrinnaj

(Mr. 14.43-50; Lc. 22.47-53; Jn. 18.2-11)

⁴⁷Ne dxuchálajte Jesús na' gate bzrin Judas. Naque' tu benne' chazrinnu ca', na' zá'acale benne' zante le', benne' zaj nu'e xia ca' ne xaga ca'. Benne' caní zaj naque' benne' gulesel-la benne' xíchaje ca' chee bxruze ca', ne benne' gula sina ca' chee judío ca'. ⁴⁸Judas, bénnea' dxudé' Jesús, ba blé'ene' benne' ca' ca tu da gune' da gulé'e na nu na' naca Jesús. Gunné':

—Bénnea' gunupa' neda', Le' na'. Le che'ē ca tu benne' wen da zrinnaj.

⁴⁹Nadxa bzrin Judas lau Jesús, dxenné':

—Diuzre, Benne' dxusede.

Na' bnupe' Jesús.

⁵⁰Bechebe Jesús:

—Ljwezra', ¿bi chee za'u?

Nadxa gulebiga benne' ca', gulele' Jesús, na' beleché'e Le' ca tu benne' wen da zrinnaj.

⁵¹Tu benne' ca' dxuséde Jesús guléaje' xia chee', ne guchugue' chalá'a naga bi wen zrin chee' bxruze blau. ⁵²Nadxa Jesús guzre' le':

—Begú'u xia chiu' lu zre na, lawe' da xúgute' benne' dxelute benne' nen xia nalá, cá'anqueze gate le'. ⁵³¿Quebe nézenu' wazéqueda' neda' naba' Xra', na' Le' sél-late' na'a naga zua' da zandxa ca chazrinnu cue' gubáz chee' xabáa, zaj naque' zánete tu tu cue'? ⁵⁴Na'a che ca'an guna', ¿ájazra gaca gaca na ca da naxúaj na lu xiche chee' Dios, da dxenná na caní dxal-la' gaca na?

⁵⁵Nadxa guzre Jesús benne' ca':

—Le'e bdxuajle nen xia nalá ca', ne nen xaga ca' chee quélale neda', dxunle neda' ca tu benne' gubán. Xúgute' zra gudxe'a neda' lu xudau' dxusédeda' le'e, ne quebe gudélale neda'. ⁵⁶Xúgute' da caní dxaca na chee' gaca na ca da gulenná benne' ca' buluchálaje' waláz chee' Dios, da na' naxúaj na lu xiche chee' Dios.

Nadxa xúgute' benne' ca' dxuséde Jesús bulucá'ane' Le' tuze', buluxuzrúnnuje'.

Dxezrín Jesús lau benne' ca' chee' xu'u lawe' blau chee' judío ca'
(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷Benne' ca' gulele' Jesús guleché'e Le' lau Caifás, bxruze blau, ga na' zaj nazraga benne' ca' dxuluxuzájle'e da bdixruj be'e Moisés, nen benne' gula sina ca'. ⁵⁸Pedro zéaje nawe' Jesús zítu'la, na' bzrine' chale'aj chee' lizre bxruze blau, na' guxú'e, ne gudxé'e tu zren nen bi xa'aga chee' lé'ene' ájala xexuzre da dxaca na'.

⁵⁹Benne' xíchaje ca' chee' bxruze ca', ne benne' gula sina ca', ne xúgute' benne' ca' chee' xu'u lawe' blau chee' judío ca' belílaje' ájala xuluzría xi'e Jesús, lácala naca na da wen lazre', chee' xelezéquene' xuludé'e Le' gatie'. ⁶⁰Quebe bi belezrelne', lácala belezrín benne' zan benne' gulenné' da wen lazre' chee' Jesús. Naga xeajsete na belezrín chupa benne' wen lazre'.

⁶¹Dxelenné':

—Benne' nigá gunné': “Wazéqueda' neda' guchínnaja' xudau' chee' Dios, na' xexuna' na lawe' chunna zraze.”

⁶²Nadxa guxasa bxruze blau, na' guzre' Jesús:

—¿Quebe bi dxexechebu'? ¿Bizra da dxelenné' chiu' lue'?

⁶³Jesús guzúe' zrize. Nadxa bxruze blau na' guzre' Le':

—Lu La Dios ban dxenná be'eda' lue' nneu' da li. Gunná che nacu' lue' Cristo, Zri'ine Dios.

⁶⁴Jesús guzre' le':

—Nácaqueza' ca dxennáu' lue'. Cá'anqueze dxapa' le'e, walé'ele neda', Benne' Gulje' Bénneache, cue'a chalá'a xabela chee Dios nen xel-la' szren chee', na' xelá'a lu beuj bza chee xabáa.

⁶⁵Nadxa bxruze blau gucheze' zra lané' chee blé'ene' quebe nabague' zria, na' gunné':

—Benne' nigá dxenné' schanni' chee Dios.

¿Nachínnedxadxu benne' xechébe'? Ba bénquezle le'e ca dizra' schanni' dxenné'. ⁶⁶¿Bi dxennale le'e?

Benne' ca' gulenné':

—Nabague' zria, ne dxal-la' gatie'.

⁶⁷Nadxa buluzré'e zrene' lau Jesús, ne belú'e Le', na' xebal-le' belegape' dxu'a lawe'. ⁶⁸Na' gulé'e Le':

—¿Nácaquezu' Lue' Cristo? Gunné xa'a nu be Lue'.

Dxenná Pedro quebe núnbe'e Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹Dxácate na' dxe' Pedro chalé'ajla, na' tu nu'ula wen zrin bzrine' lau Pedro ne guzre' le':

—Cá'anqueze lue' nacu' Jesús, benne' Galilea na', tuze.

⁷⁰Pedro ben chúchue' xrtizre' lówela xúgute benne' ca', gunné':

—Quebe nezda' nu chee na' dxenníu'.

⁷¹Nadxa Pedro zexíaje' chee xedxúaje' chale'aj na', na' ble'e xetú nu'ula ca' le', ne guzre' benne' ca' zaj zre'e na':

—Cá'anqueze benne' nigá dxedálene' Jesús, benne' Nazaret na'.

⁷²Xecha lasa ben chúchue' Pedro xrtizre', na' bzétaje' Dios, gunné':

—Quebe núnbe'a benne' na'.

⁷³Xetú chí'idau' guca belezrín benne' zaj zre'e na' lau Pedro, na' gulé'e le':

—Da li, tuze nácaquezu' nen bènnea' lawe' da xel-la' dxenné chiu' dxunna bea na lue'.

⁷⁴Nadxa guzú lau Pedro dxuzría xi' cuínazqueze', ne dxuzétaje' Dios, dxenné':

—Quebe núnbeaqueza' benne' na'.

Dxácatē na' gudxezre xjeaj. ⁷⁵Nadxa xeajsá lazre' Pedro ca da guzre Jesús le': Nédxudxa ca cuezre xjeaj, lue' wannáu' chunna lasa quebe núnbe'u neda'. Bedxúaj Pedro na', na' gudxézrele'e.

Dxelech'é Jesús lau Pilato

(Mr. 15.1; Lc. 23.1-2; Jn. 18.28-32)

27 ¹Gate guxaní', xúgute benne' xíchaje ca' chee bxruze ca', ne benne' gula sina ca' chee benne' judío ca' belune' tuze dizra' ájala xelune' chee xelútiē' Jesús. ²Nadxa beleché'e Le' nadxéaje', ne xeajlegu'e Le' lau Poncio Pilato, benne' dxenná be'e waláz chee xezr la xu Roma.

Ca guca gate gute Judas

³Nadxa Judas, bénnea' bdeē' Jesús, gate guque bé'ene' ba buluzría xi'e Jesús, bexíajele'ene', na' bunézruje' da chi dxua dumí plata lau benne' xíchaje ca' chee bxruze ca', ne benne' gula sina ca'. ⁴Dxe'e le':

—Neda' bēna' dul-la lawe' da bdea' tu benne' naque' du lazre' chee gatiē'.

Belexechebe benne' xíchaje ca':

—¿Bizra naca cheentu' da nigá? Chiu' lue' naca da na'.

⁵Nadxa Judas buzale' dumí na' lu xudau', ne bezé'e, na' xeajxelú'u du lbe'e.

⁶Benne' xíchaje ca' chee bxruze ca' buluxutupe' dumí na', dxelenné':

—Quebe gaca cú'udxu dumí nigá naga xu'u dumí chee xudau', lawe' da naca na lazruj chee benne' dxute benne'.

⁷Nadxa belune' tuze dizra' xelá'awe' tu xezr la xu nen dumí na' da nazí le na xezr la xu chee wen xesu' zruaga, chee gaca na tu lataj naga xelegache benne' zitu'. ⁸Chee le na' nazí le xezr la xu na' Xezr La Xu Chee Dxen ca lu zra na'a zra. ⁹Caní guca na chee gaca ca da gunná Jeremías, benne' bchálaje' waláz chee Dios, gunné': “Gulequē' chi dxua dumí plata da naca na da zaca Le' da buluzúa benne' Israel. ¹⁰Nen dumí na' belá'awe' xezr la xu chee benne' wen xesu' zruaga, cáteze gunná be'e Xrana' neda'.”

Dxezrín Jesús lau Pilato

(Mr. 15.2-5; Lc. 23.3-5; Jn. 18.33-38)

¹¹Guleché'e Jesús lau bénnea' dxenná be'e waláz chee xezr la xu Roma, na' le' bchebe' Jesús:

—¿Nacu' Lue' Wenná Bea chee judío ca'?

Jesús gunné':

—Ca' naca na, ca dxennáu' lue'.

¹²Gate benne' xíchajē ca' chee bxruze ca', ne benne' gula sina ca' gulawē' zria chee Jesús, na' Le' quebe bi bechebe'.

¹³Nadxa gunná Pilato, dxē'e Jesús:

—¿Quebe dxennu' ca da dxelenná benne' caní chiu'?

¹⁴Jesús quebe bi bechebe'. Ca'an guca bebanne bēnnea', ne quebe bezrela lazre' ájala nne'.

Dxelechugue' chee Jesús gatie'

(Mr. 15.6-20; Lc. 23.13-25; Jn. 18.38—19.16)

¹⁵Gate dxu'u laní na', bēnnea' dxenná be'e na' xu'u lawē' dxusane' tu benne' wen da zrinnaj, núteteze benne' dxelaca lazre' benne' ca'. ¹⁶Ca lu zra na' xu'u tu benne' lizre xia, benne' wēnle'e da zrinnaj, nazí le' Barrabás. ¹⁷Ca zaj nazraga benne' ca' na', Pilato bchebe' le':

—¿Nuzra dxaca lázrele gusana' neda'? ¿Gusana' Barrabás, che Jesús, bēnnea' le' Cristo?

¹⁸Caní gunné' lawe' da ba nézene' buludēe' Jesús lawe' le' lawe' da dxelaque' xa lazre' chee Jesús.

¹⁹Dxácate na' dxe' Pilato naga dxuchi'e chee bēnneache, na' zru'ule' gusel-le' tu benne' xeajezre' Pilato: “Quebe guchixre chiu' da naca chee benne' xrlátaje na', lawe' da guneda' xēla ba dxēle, da bzúale'e na neda' stebe ne chee Le'.”

²⁰Benne' xíchajē ca' chee bxruze ca', ne benne' gula sina ca' belegú'u xele' benne' ca' chee xelenabe' la Barrabás, ne gate Jesús. ²¹Bēnnea' dxenná be'e bchálajlene' benne' ca' xecha lasa. Buchebe' le':

—¿Nula benne' chupa caní dxaca lázrele le'e gusana'?

Benne' zan ca' gulenné':

—Barrabás.

²²Pilato bchebe' benne' ca':

—¿Bizra guna' chee Jesús, benne' le' Cristo?

Xúgute' belexechebe':

—Bde'e xaga béguaj.

²³Nadxa gunná Pilato, dxē'e benne' ca':

—¿Bizra da calela nune'?

Benne' ca' gulezú lawe' dxelebezre xē'e, gulenné':

—Bde'e xaga béguaj. Bde'e xaga béguaj.

²⁴Gate Pilato guque bé'ene' quebe bi séquene', na' benne' zan ca' dxeledábague' le', na' gunná bé'ene' bla' nisa, na' gudibe ne'e lávela benne' ca', dxenné':

—Quebe bi dul-la nabaga' chee xel-la' gute chee benne' xrlátaje nigá. Naca na chee le'e.

²⁵Xúgute benne' ca' belexechébe':

—Netu', ne zrí'inentu' nabáantu' ca naca chee xel-la' gute chee'.

²⁶Nadxa Pilato bsané' Barrabás, ne gunná bé'ene' beleché'e Jesús chee xelu'e Le', na' bdee' Le' chee te'e xaga béguaj.

²⁷Nadxa benne' dxjaque' wedil-la chee bènnea' dxenná be'e guleché'e Jesús, ne gulegú'e Le' lu xu'u lawe'. Belexezraga ca naca benne' dxjaque' wedil-la naga ze Jesús. ²⁸Belequ'é zra lane', ne bulugácue' Le' tu ladxe' bzawe. ²⁹Buluzú'e xíchaje' tu da naca na zruze xaga xeche', ne buluguxre' Le' tu xaga ne'e xabela. Nadxa buluzú zribe' lau Jesús, ne belún le' chee', dxelenné':

—Gaca xabáa chiu', Wenná Bea chee judío ca'.

³⁰Cá'anqueze buluzré'e Le' zrene', na' gulequ'é'e xaga da nuxru Jesús, ne guline' na xíchaje'. ³¹Ca gudé belún le' chee Jesús, na' belexegü'e ladxe' bzawe, na' buluxugácue' Le' zra lánaqueze'. Nadxa beleché'e Le' chee te'e xaga béguaj.

Dxuludé'e Jesús xaga béguaj

(Mr. 15.21-32; Lc. 23.26-43; Jn. 19.17-27)

³²Ca gusiá'que' na', belexezrague' tu benne' xezre Cirene, le' Simón, na' gulenná bé'ene' le' bi'e xaga béguaj chee Jesús.

³³Ca'an guca belezrine' tu lataj nazí le na Gólgota, da dxennadxu, Lataj Chee Zrita Xichaj Benne' Gate. ³⁴Na' bulunézruje' da xi'aj Jesús xrise uva wal-la da nachixre na da sla', san gate bxue Jesús ca naca na, quebe gu'e na.

³⁵Ca bexuzre benne' dxjaca wedil-la buludé'e Le' xaga béguaj, na' gulebéaje' da gaca bea na chee xelexelé'e ca naca zra lana Jesús. Ca'an guca guxá ca da gunná benne' bchálaje' waláz chee Dios, gunné': “Belexelé'e zra lana' leze'. Gulebéaje' da gaca bea na.” ³⁶Nadxa gulebé'e dxuluzuzre' Jesús.

³⁷Buluzrí'e xichaj Jesús na' tu xiche da naxúaj na da nabague', da dxenná na: Jesús, wenná bea chee judío ca'.

³⁸Cá'anqueze buludé'e chupa benne' gubán tu zren nen Jesús le'e xaga béguaj ca', tu'e' chalá'a xabela, ne xetú'e' chalá'a

xéglala ga da' xaga béguaj chee Jesús. ³⁹Benne' dxeledé' na' dxelún le' chee Jesús. Dxulutá xíchaje', ⁴⁰ne dxeleñé':

—¿Dxuchínnaju' xudau', na' lawe' chunna zraze xexunu' na? Bselá cuinu'. Che nacu' Zri'ine Dios, bexetaj le'e xaga béguaj na'.

⁴¹Cá'anqueze belún la chee' benne' xíchaje ca' chee bxruze ca', ne benne' dxuluxuzájle'e da bdxixruj be'e Moisés, ne benne' xudau' fariseo ca', ne benne' gula sina ca'. Dxelé ljwezre':

⁴²—Bselé' benne' xula, san quebe dxezéquene' guselá cuine'. Che naque' Wenná Bea Chee Xezre Israel, dxal-la' xexétaje' le'e xaga béguaj, na' chéajledxu chee'. ⁴³Le' bxren lazre' Dios. Na'a guselá Dios Le' che da li dxaca lazre', lawe' da gunná Le' naque' Zri'ine Dios.

⁴⁴Cá'anqueze gubán ca' zaj da' xaga béguaj ca' nen Jesús gulenné' schanni' chee Jesús.

Ca guca gate gute Jesús

(Mr. 15.33-41; Lc. 23.44-49; Jn. 19.28-30)

⁴⁵Nadxa ca naca xezr la xu na' guchul-la na. Guzú lau na wagubizra ca bzrinte na ca dxedá chunna. ⁴⁶La ná'queze Jesús gudxezre xe'e, dxenné':

—Elí, Elí, ¿lama sabactani?

(Da nigá zéaje na: Dios chia', Dios chia', ¿bizr chee na' nusán lazru' neda'?)

⁴⁷Bal-la benne' zaj zre'e na' belenne' ca da gunná Jesús, na' gulenné':

—Benne' nigá dxenné' Elías, benne' bchálaje' waláz chee Dios.

⁴⁸Dxácaté na' guzá' chegu tu benne' ca', xeajxrí'e tu da dxezrupe nisa, na' ca bsebisé' na nen nupe zichaj, na' bzue' na lawe' tu xaga, ne bzrigue' na dxu'a Jesús chee xrupe' na.

⁴⁹Benne' xezica ca' gulenné':

—Le guxúe xca'. Quebe gunu' ca'. Nná'xquedxu che wida Elías guselé' Le'.

⁵⁰Xecha lasa gudxezre xa'a Jesús, na' gutie'. ⁵¹Lu zra ná'queze ladxe' da ze lu xudau' bdxuaj na chúpala, guzú lau na xíchaje, bedxúajte na dxe'ela. Guzrú' xezr la xu, na' xiaj xre ca' gulúzruqueze na. ⁵²Gulexalaj ba, na' belexebán benne' gate ca', benne' guléajle'e da naca chee Dios. ⁵³Ca gude' bebán Jesús, na'

benne' caní belexedxúaje' lu xedxu ba, ne belexexú'e lu xezre lá'azxa Jerusalén, naga benne' zan belelé'ene' benne' ca'.

⁵⁴Nadxa benne' dxenná be'e lu wedil-la, ne benne' dxjaque' wedil-la, benne' ca' dxuluzuzre' Jesús, gate belelé'ene' guzrú', ne xezícadxa da ca'an gulaca, na' belezrébele'e, dxelenné':

—Da lítegage benne' nigá guque' Zri'ine Dios.

⁵⁵Nu'ula zan zaj zre'e na' dxelenné'e zítu'la, nu'ula ca' xjácálene' Jesús gate bezé'e ga nababa Galilea, ne gulácalequeze' Le'. ⁵⁶Ládujla nu'ula ca' xu'u María Magdalena, ne María xrna Jacobo ne José, ne xrna zri'ine Zebedeo ca'.

Dxulucache' Jesús lu xedxu ba

(Mr. 15.42-47; Lc. 23.50-56; Jn. 19.38-42)

⁵⁷Ca guzú lau dxaca waxrinne, na' bla' tu benne' gunnía le' José, benne' xezre Arimatea, benne' dxéajlequeze' chee Jesús.

⁵⁸Benne' nigá guxíaje' xejchálajlene' Pilato, na' benabe' bel-la' dxen chee Jesús. Pilato gunná bé'ene' xulunézruje' le' bel-la' dxen na'. ⁵⁹Nadxa José bequé'e bel-la' dxen na', na' bchele' na tu ladxe' da naxadxe. ⁶⁰Nadxa gulu'e Le' lu ba da naca na cheéqueze José na', da bene' tu lu xiaj. Gulexrú'e tu xiaj blaga zren dxu'a ba chee Jesús, na' bezé'e ga na'. ⁶¹Gulezrá' María Magdalena, ne xetú María, zaj dxe'e le nna' dxu'a ba na'.

Dxulubia dxuluxue' ba chee Jesús

⁶²Zeaj zra xula, da naca na zra ca gudé zra bulucueze', na' benne' xíchaje' ca' chee bxruze ca', ne benne' xudau' fariseo ca' belezrine' lau Pilato. ⁶³Dxelé'e le':

—Xran, dxeajsá lázrentu' ca naca da gunná benne' wen lazre' na' gate na' zue'. Gunné' gate gaca chunna zra, na' xebane' ládujla benne' gate. ⁶⁴Chee le' na', bdixruj be'ene' benne' ca' xulubia xuluxue' ba chee' na' cadxa gaca chunna zra, chee quebe xelexé' benne' ca' bsédené' xedajlexebéaje' bel-la' dxen na' chizrela, na' te na' xuluzenne' bénneache ba bebane' ládujla benne' gate. Che ca'an gaca, na' dizra' wen lazre' bzebe nigá gun na da zrinnaj zrendxa ca da nedxu.

⁶⁵Pilato guzre' benne' ca':

—Na' zaj zra' benne' dxjaque' wedil-la xuluzuzre' na. Le chjaca le'e, ne le guxúe xanne' ba na' ca se lau séquele.

⁶⁶Nadxa xjaque', xejlexú'e ba na'. Buluchiche' tu da gunna bea na che xalaj ba na', na' bulucá'ane' benne' dxjaca wedil-la ga na'.

Ca guca gate bebán Jesús

(Mr. 16.1-8; Lc. 24.1-12; Jn. 20.1-10)

28 ¹Ca gudé chee zra dxulupá'ana judío ca', ca za dxaní' zra nedxu, na' María Magdalena, ne xetú María na' xjaque' xeajlenné'e ba chee Jesús. ²Chadite guzrú'le'e na lawe' da betaj tu gubáz chee xabáa chee Xránadxu, na' bzrine' dxu'a ba na', ne bequé'e xíajta'a zren na' da zrua na dxu'a ba na', na' gudxé'e lawe na. ³Gubáz na' dxácatite legalé', ne naca chiche zra lane' ca bezxe'. ⁴Gate belelé'e benne' dxjaque' wedil-la gubáz chee xabáa na', na' belezrízene' xel-la' dxelezrebe, ne belexegá'ane' ca benne' gate ca'. ⁵Nadxa gunná gubáz chee xabáa na', dxé'e nu'ula ca':

—Quebe zrēbele. Nezda' dxexílajle Jesús, bēnea' gudé'e xaga béguaj. ⁶Quebe zue' nigá lawe' da ba bebane', cáteze na' gunné'. Le da nna'le lu ba naga gulegú'e Le'. ⁷Le cheajxáquezega, le cheajezre benne' ca' bsédene' ba bebane' ládujla benne' gate, na' chéaje' ga nababa Galilea nédxudxa ca le'e. Na' lé'ele Le'. Da nigá naca na da nabaga'a xapa' le'e.

⁸Nadxa nu'ula ca' besía'que' dxu'a ba na', zeajxaca chégüe'. Dxelezrebe', ne dxelebene'. Zjaque' zeajleguezre' benne' ca' bsēde Jesús. ⁹Dxácate na' Jesús bchague' nu'ula ca', ne bgape' le' diuzre. Belezrine' lau Jesús, dxelúe lá'ane' Le', ne bulunide' ni'a Jesús. ¹⁰Le' guzre' nu'ula ca':

—Quebe zrēbele. Le chjaca, le cheajezre bi bícha'dau' ca' dxal-la' chjaque' naga nababa Galilea. Na' xelexelé'ene' neda'.

Ca da gulenná benne' dxjaque' wedil-la

¹¹Dxácate zjaca nu'ula ca', na' benne' ca' dxjaca wedil-la gulu'e xezre, ne buluchálajlene' benne' xíchaje ca' chee bxruze ca' ca da guca. ¹²Benne' xíchaje ca' buluchálajlene' benne' gula sina ca' chee xelune' tuze dizra'. Nadxa bulunézruje' benne' dxjaque' wedil-la dumí zrente. ¹³Dxelenné':

—Le nna le'e belelá' benne' ca' bsēde Jesús na' chizrela, dxácate dxásele le'e, na' belexexú'e bel-la' dxen chee'. ¹⁴Che benne' dxenná be'e na' xenne' da nigá, netu' guchálajlentu' le', ne gucá'ana cháwentu' chee quebe bi gaca chee le'e.

¹⁵Nadxa benne' dxjaque' wedil-la gulez'í' lu ne'e dumí na', na' besía'que' belune' ca bache zaj nézene'. Da nigá naca na ca dxelenná judío ca' zéajte lu zra na'a zra.

Jesús dxesel-le' benne' gubáz chee' ca'
(Mr. 16.14-18; Lc. 24.36-49; Jn. 20.19-23)

¹⁶Nadxa xjaca benne' chinéaj ca' bsede Jesús, na' belezrine' lu xi'a naga ba guzre Jesús le'. ¹⁷Gate belelé'ene' Jesús, na' bulucá'ana szrene' Le'. Bal-le' gulaca chupa lazre'. ¹⁸Nadxa Jesús gubigue' naga zaj zra' benne' ca', na' guzre' le':

—Neda' ba nazí' lu na'a ca naca xel-la' dxenná bea xabáa, ne lu xezr la xu nigá. ¹⁹Chee le na' le chjaca, le cheajchálajle benne' zaj zre'e du ca naca xezr la xu nigá, ne le cheajsédene' ca naca da bsédeda' le'e. Le guchúe' le' nisa lu La Xra', ne lu La Zrí'ine', ne lu La Be' Lá'azxa. ²⁰Le guséde-ne' xelaque' wezúa dizra' ca naca da ba gunná be'eda' le'e, na' neda' tu súalezqueza' le'e xúgute zra cadxa cheajsé chee xezr la xu nigá. ¡Ca'an gaca na!